

*ASO LUA, 18 MATI 2014*

*Na tauaofia le Fono Aoaofaitulafono i le itula e 9:00 i le taeao e tusa ai ma le Polokalame o Fonotaga a le Palemene 2014.*

*Na nofoia le Nofoa e le Fofoga Fetalai i le itula e 9:00 i le taeao.*

Tatalo.

**MALELEGA MAI LE AO O LE MALO**

*Na fofogaina e le Fofoga Fetalai le Malelega mai Lana Afioga Mamalu, O Le Ao o le Malo.*

1. “TUSI mo:

**Le Fofoga Fetalai:**

**E tusa ai ma le Mataupu 59 o le Faavae o le Malo Tutoatasi o Samoa faapea Tulafono Tumau 95 a le Palemene ua tuuina atu nei le maliega i le Fono Aoaofaitulafono e iloiloina ai Tulafono Tau Faaofi ua faaalua iinei:**

1. Tulafono Tau Faaofi o Teuteuga o le Tulafono o Sone Tau Folauga i le Sami 2014.
2. Tulafono Tau Faaofi o Teuteuga o le Tulafono o le Faafoga o Lafoga 2014.
3. Tulafono Tau Faaofi o Mavaega Tausi 2014.
4. Tulafono Tau Faaofi o Teuteuga o le Tulafono o Kamupani Faava o Malo 2014.
5. Tulafono Tau Faaofi e Taofia ai Faiga Faaterorisi 2014.
6. Tulafono Tau Faaofi o Teuteuga o le Tulafono o le Faamasinoga a le Lalolagi mo Solitulafono Faava o Malo 2014.
7. Tulafono Tau Faaofi o Fua Esecese 2014.

**TUUIINA ATU i lou nei Lima i lenei aso 17 o Mati i le tausaga 2014.**

**(Sainia): Tui Atua Tupua Tamasese Efi**  
**OLE AO O LE MALO.**

18 MATI 2014

Malelega Mai Le Ao o le Malo

2. TUSI FAAMAONIA O LE TULAGA FAANATINATI.

E tusa ai ma aiaiga o le Tulafono Tumau 99(2) O AU, TUI ATUA TUPUA TAMASESE EFI, O LE AO O LE MALO, ua ou tuuina atu nei le Tusi Faamaonia o le Tulaga Faanatinati o Tulafono Tau Faaofi ua faaali atu iinei mo le tagofia e le Fono Aoaofaitulafono i lana Fonotaga o le a usuia i le Aso Lua, 18 Mati 2014.

1. Tulafono Tau Faaofi o Mavaega Tausi 2014.
2. Tulafono Tau Faaofi o Teuteuga o le Tulafono o Kamupani Faava o Malo 2014.
3. Tulafono Tau Faaofi e Taofia ai Faiga Faaterorisi 2014.

TUUINA ATU i lou nei Lima i lenei aso 17 o Mati i le tausaga 2014.

(Sainia): Tui Atua Tupua Tamasese Efi  
O LE AO O LE MALO.”

SAUNOAGA O MALIU

*Na faasilasila e le Fofoga Fetalai le tuumalo o le Afioga ANAULI Pofitu Fesili, o le sa avea ma sui usufono o le Palemene i le aso 3 o Fepuari, 2014.*

*O le Afioga ANAULI Pofitu Fesili sa avea ma se tasi o sui usufono mo le Itumalo Faaalaalafaga o Vaimauga Sisifo i le tausaga e 2006-2011.*

*O le Afioga ANAULI Pofitu Fesili sa avea ma Minisita Lagolago mo le Ofisa o le Suetusi faapea le Faalapotopotoga o Taui mo Faalavelave Faafuasei mai le 2006-2011.*

*Sa avea foi ma Taitaifono o le Komiti o Talosaga a le Palemene mai le 2008-2009 lea sa iloiloaina ai Talosaga Tetee i le suiga o le itu auala.*

*Sa avea foi o ia ma sui usufono o le Komiti o Ofisa o le Palemene, Komiti o Galuega, Felauaiga & Siosiomaga ma le Komiti mo le Toe Iloiloga o Tulafono Faatonutonu mai le 2006-2011.*

*Na tutulai filemu le Maota e faaali ai le faaaloalo i le sui usufono ua tuumalo.*

18 MATI 2014

## ISI FAASILASILAGA A LE FOFOGA FETALAI

**FOFOGA FETALAI:** Ou te manatu o lea ua sausaufialele le manu nai Utufiu, o le tolotolo taua i Samoa e affio ai Aiga Sa-Tupua ma Aiga Sa-Malietoa ma le mamalu i le Faletolu. O lea foi ua faaosofia moegaluaga ma le lagona o le fiafia, aua ua tatou aulia ma tatou taunuu mai i lenei taeao manino ma le taeao totoa. E manatu foi ua punapuna a manu fou lo tatou taeao-na-liugalua aua o lea ua alafai mai i faguga lelei le paia ma le mamalu o le Maota i ona tulaga faalupe.

Ou te ofo alofa atu ma ou faatalofa atu i tulaga aloaia i le alafai mai i faguga lelei o le paia maualuga o lo tatou Maota Fono i lenei taeao. O le aso na lupe, o le aso na atofa aua le seuga na faataatia i malae, o le aso tatou te toe potopoto ai i Tiafau aua le faaauauina o a tatou galuega.

O le agaga faafetai i lenei taeao ona ua vaai atu sulu o le tino ua atoa pulu fagota o lo outou Sa. E manatu o lea o le a sii le vaa tele i lenei aso i taualumaga i tiuga ma faalelegafulu i lenei aso aua a tatou galuega, o le agaga faafetai i le Atua ona o lo o taitaiina lo outou soifua manuia ma lo outou soifua maua i lenei aso.

E momoli atu le agaga faafetai tele i lau Afioga i le Taitai o le Malo, Afioga i Alii ma le Tamaitai Minisita aemaise Afioga i Minisita Lagolago.

I lea foi tala-na-atoa i le afio mai o lau Afioga i le Sui Taitai o le Itu Agai ma lena tala-na-atoa i le paia ma le mamalu o Afioga i Alii Faipule, malo le onosai i lenei taeao.

Ou te faafeiloai atu foi i le paia ma le mamalu maualuga ua tatou aofaga potopoto i lenei aso i tupu ma ee aemaise o a tatou alo ma fanau. O lenei aso e le toe na ma se laina Lipoti faaauau ma polokalame a le Palemene ina ia faaauauina pea le faalauiloaina o mataupu taua i totonu o le Palemene e le gata ia te outou o alo ma fanau a le atunuu, ae faapea foi le loaloa ma le lasilasi o Samoa i ona tulaga faalupe.

Affio maia ma tala mai aao. E talitonu o le agaga autu ina ia outou oo mai i totonu o le Maota Fono i Tiafau tou te silasila ma outou vaavaai i le faafocina o Taulumaga a o alofaiva Taitai o le atunuu o e na tofofi ma filifili e Samoa e omai e fau Upufai o Malo ma fau le Malo, aua se manuia o Samoa nei ma a taeao.

Ou te lagona o le a tatou alo i la tatou polokalame i lenei aso, ia outou tutu i le too ma outou tepa i le ata ma vaavaai i le uiga tonu ua outou agai mai ai i Tiafau e faaauau a tatou polokalame faalauiloa ina ia maua se ai mo outou mo a taeao. O le talitonuga, o outou o alo ma fanau a le atunuu o lo o lalovaoa. E sau se taimi sau se aso outou tulai foi e taitai le atunuu, ae e tataua ona outou silasila ma outou vaavaai i alafua o lo o ua tosi manulauti ma fofola i ai le fala o Taitai o Samoa ina ia faaauauina pea le manuia o Samoa mo a taeao.

E faafeiloai atu ai foi i le paia ma le mamalu maualuga i le aufaigaluega a le Malo i tupu ma ee, o Faauluuluga o Matagaluega ma Faalapotopotoga i lo outou affio ma tala mai aao ma ua tatou faatasi i lenei aso.

18 MATI 2014

### Tuuina atu o Pepa

E manatu foi o lea ua tatou faatasi ma nisi o a tatou malo mai Ausetalia, o i latou nei o lo o omai e matimati le faatulagaina o le faafouina o lo tatou Maota Fono leni. O le agaga ma le faamoemoe ina ia tuu mai atoa o latou aao ina ia fausia so tatou Maota Fono aua ua outou matauina, ua tatau ona fai le galuega ona o tulaga na aafia ai i le louloua o le tau ma nisi o tulaga.

E faafeiloai atu i ona tulaga aloaia, ia affio maia ma tala mai aao.

### TUUINA ATU O PEPA

*Na tolaulauina e le Failautusi Pepa ua tuuina atu e tusa ai ma le T.T.48:*

1. S.R.2014/1, Poloaiga Aoa o Tau o Oloa (Nu.1) 2014.
2. P.P.2013/2014 Nu.78, Lipoti Faaletausaga a le Matagaluega o Leoleo ma Falepuipui mo le Tausaga Faaletupe 2007-2008.
3. P.P.2013/2014 Nu.79, Lipoti Faaletausaga a le Matagaluega o Leoleo ma Falepuipui mo le Tausaga Faaletupe 2008-2009.
4. P.P.2013/2014 Nu.80, Lipoti Faaletausaga a le Iunivesite Aoa o Samoa mo le Tausaga Faaletupe 2013.
5. P.P.2013/2014 Nu.81, Tali atu a le Malo i le P.P.2012/2013 Nu.33, Lipoti a le Komiti o Tupe Maua ma Tupe Totogi i le P.P.2011/2012 Nu.30, Faamatalaga o Tupe a le Pulega o Petipetiga mo le Tausaga Faaletupe faaiuina aso 30 Iuni 2010.
6. P.P.2013/2014 Nu.82, Lipoti Faaletausaga a le Matagaluega o Faatoaga ma Faigafaiva Iulai 2011-Iuni 2012.
7. P.P.2013/2014 Nu.125, Tali atu a le Malo i le P.P.2013/2014 Nu.30, Lipoti a le Komiti o Tupe Maua ma Tupe Totogi i le P.P.2012/2013 Nu.92, Fuafuaga Autasi a le Ofisa o le Failauatusi o le Fono Aoa o Faitulafono 2013-2015.

### TUUINA ATU O LIPOTI A KOMITI FILIFILIA

*Na tolaulauina e le Failautusi Lipoti a Komiti Filifilia nei ua faataatia i luga o le Laulau a Fono e tusa ai ma T.T.51(5).*

1. P.P.2013/2014 Nu.83, Lipoti a le Komiti o Faafoega tau Pulega a le Malo i le P.P.2013/2014 Nu.3, Lipoti Faaletausaga a le Kamupani o Pulega o Faaputugatupe Teufaafaigaluega o Mavaega Tausi a Samoa mo le Tausaga faaiuina aso 30 Iuni 2012.

**Tuuina atu o Lipoti a Komiti Filifilia**

2. P.P.2013/2014 Nu.84, Lipoti a le Komiti o Faafoega tau Pulega a le Malo i le P.P.2012/2013 Nu.44, Faamatalaga o Sini Autasi a le Kamupani o Pulega o Faaputugatupe Teufaafaigaluega o Mavaega Tausi a Samoa 2013-2015.
3. P.P.2013/2014 Nu.85, Lipoti a le Komiti o Tupe Maua ma Tupe Totogi i le P.P.2012/2013 Nu.51 & P.P.2013/2014 Nu.14, Faamatalaga o Tupe a le Komiti o Petipetiga mo le Tausaga Faaletupe faaiiina aso 30 Iuni 2011 ma le Tausaga Faaletupe faaiiina aso 30 Iuni 2012.
4. P.P.2013/2014 Nu.86, Lipoti a le Komiti o Galuega, Felauaiga & Siosiomaga i le Tulafono Tau Faaofi o Aperenitisi 2013.
5. P.P.2013/2014 Nu.87, Lipoti a le Komiti o Galuega, Felauaiga & Siosiomaga i le Tulafono Tau Faaofi o Teuteuga o Eleele, Fuagafanua ma le Siosiomaga 2013.
6. P.P.2013/2014 Nu.88, Lipoti a le Komiti o Tupe Maua ma Tupe Totogi i le P.P.2013/2014 Nu.21, Lipoti Faaletausaga a le Faalapotopotoga Inisiua tau Soifua a Samoa mo le Tausaga Faaletupe 2011/2012.
7. P.P.2013/2014 Nu.89, Lipoti a le Komiti o Galuega, Felauaiga ma Siosiomaga i le Tulafono Tau Faaofi o Teuteuga o le Tulafono o Pule o Vaega Fanua 2013.
8. P.P.2013/2014 Nu.90, Lipoti a le Komiti o Galuega, Felauaiga ma Siosiomaga i le P.P.2012/2013 Nu.71, Lipoti Faaletausaga a le Pulega o Uafu ma Taulaga a Samoa mo le Tausaga Faaletupe na Faaiiina aso 30 Iuni 2011.
9. P.P.2013/2014 Nu.91, Lipoti a le Komiti o Galuega, Felauaiga ma Siosiomaga i le P.P.2013/2014 Nu.6, Lipoti Faaletausaga a le Pulega o Malae Vaalele a Samoa mo le Tausaga Faaletupe na Faaiiina aso 30 Iuni 2011.
10. P.P.2013/2014 Nu.92, Lipoti a le Komiti o Tupe Maua ma Tupe Totogi i le P.P.2012/2013 Nu.61 & P.P.2013/2014 Nu.75, Lipoti Faaletausaga a le Kamupani Vaalele a le Polenisia mo Tausaga Faaletupe Faaiiina aso 30 Iuni 2012 & Tausaga Faaletupe Faaiiina aso 30 Iuni 2013.
11. P.P. 2013/2014 Nu. 93, Lipoti a le Komiti o Mataupu tau Faamasinoga, Leoleo & Falepuipui ma Faamasinoga o Fanua & Suafa i le P.P. 2012/2013 Nu. 91, Lipoti a le Komisi o le Toefuataiga o Tulafono a Samoa i le Tulafono o Fono a Nuu 1990, Lipoti 09/12.
12. P.P. 2013/2014 Nu. 94, Lipoti a le Komiti o Tupe Maua ma Tupe Totogi i le P.P. 2012/2013 Nu. 41, Lipoti Faaletausaga a le Pulega o Tupe Faava o Malo a Samoa mo le Tausaga Faaletupe Faaiiina aso 30 Iuni 2011.

18 MATI 2014

## Tuuina atu o Lipoti a Komiti Filifilia

13. P.P. 2013/2014 Nu. 95, Lipoti a le Komiti o Faafoega tau Pulega a le Malo i le P.P. 2013/2014 Nu. 77, Lipoti Faaletausaga a le Ofisa o le Loia Sili mo le Tausaga Faaletupe Faaiuina aso 30 Iuni 2012.
14. P.P. 2013/2014 Nu. 96, Lipoti a le Komiti o Mataupu tau Aoga, Saienisi, Fesootaiga & Faamatalaga Tekonolosi i le P.P. 2013/2014 Nu. 20, Lipoti Faaletausaga a le Iunivesite Aoo o Samoa mo le Tausaga Faaletupe 1 Iulai 2010 faaiuina aso 30 Iuni 2011.
15. P.P. 2013/2014 Nu. 97, Lipoti a le Komiti o Mataupu tau Faamasinoga, Leoleo & Falepuipui ma Faamasinoga o Fanua & Suafa i le P.P. 2013/2014 Nu. 52, Lipoti Faaletausaga a le Komisi o le Toefuataiga o Tulafono a Samoa mo le Tausaga Faaletupe Iulai 2011 – Iuni 2012.
16. P.P. 2013/2014 Nu. 98, Lipoti a le Komiti o Mataupu tau Aoga, Saienisi, Fesootaiga & Faamatalaga Tekonolosi i le Tulafono Tau Faaofi o Teuteuga o le Tulafono o Fesootaiga 2013.
17. P.P. 2013/2014 Nu. 99, Lipoti a le Komiti o Mataupu tau Aoga, Saienisi, Fesootaiga & Faamatalaga Tekonolosi i le P.P. 2012/2013 Nu. 80, Faamatalaga o Sini Autu o Fuafuaga Autasi a le Pulega o Faailoga ma Tusi Pasi Taualoa a Samoa 2013-2015.
18. P.P. 2013/2014 Nu. 100, Lipoti a le Komiti o Mataupu tau Aoga, Saienisi, Fesootaiga ma Faamatalaga Tekonolosi i le P.P. 2012/2013 Nu. 57, Fuafuaga Autasi Falemeli o Samoa 2013-2015 & P.P. 2012/2013 Nu. 58, Faamatalaga o Sini Autasi – Falemeli o Samoa 2013-2015.
19. P.P. 2013/2014 Nu. 101, Lipoti a le Komiti o le Soifua Maloloina, Galuega tau le Va Fealoai, Mataupu tau Lotoifale ma Atinae o Afioaga ma Agafesootai i le P.P. 2012/2013 Nu. 12, Lipoti Faaletausaga a le Faalapotopotoga Faavae tau Fatugao a Samoa 1 Iulai 2010 i le aso 30 Iuni 2011.
20. P.P. 2013/2014 Nu. 102, Lipoti a le Komiti o Mataupu tau Faamasinoga, Leoleo & Falepuipui ma Faamasinoga o Fanua & Suafa i le Tulafono Tau Faaofi o Teuteuga o le Tulafono o Soligatulafono tau Leoleo 2013.
21. P.P. 2013/2014 Nu. 103, Lipoti a le Komiti o Oloa Gaosia Tulaga Muamua, Mataupu tau Pisinisi, Alamanuia ma Leipa i le Tulafono Tau Faaofi o Teuteuga o le Tulafono o Fefaatauaiga, Mea Tau Pisinisi ma Atiina Ae o Alamanuia 2013.

18 MATI 2014

## Tuuina atu o Lipoti a Komiti Filifilia

22. P.P. 2013/2014 Nu. 104, Lipoti a le Komiti o Oloa Gaosia Tulaga Muamua, Mataupu tau Pisinisi, Alamanuia ma Leipa i le P.P. 2013/2014 Nu. 69, Lipoti Faaletausaga a le Matagaluega o Pisinisi, Alamanuia ma Leipa mo le Tausaga Faaletupe na Faaiuina aso 30 Iuni 2012.
23. P.P. 2013/2014 Nu. 105, Lipoti a le Komiti o Oloa Gaosia Tulaga Muamua, Mataupu tau Pisinisi, Alamanuia ma Leipa i le P.P. 2013/2014 Nu. 40, Lipoti Faaletausaga a le Pulega o Tagata Tafafao Maimoa mo le Tausaga Faaletupe na Faaiuina aso 30 Iuni 2012.
24. P.P. 2013/2014 Nu. 106, Lipoti a le Komiti o Oloa Gaosia Tulaga Muamua, Mataupu tau Pisinisi, Alamanuia ma Leipa i le P.P. 2013/2014 Nu. 5, Lipoti Faaletausaga a le Faaletupe o Atiina Ae o Samoa mo le Tausaga Faaletupe na Faaiuina aso 30 Iuni 2012.
25. P.P. 2013/2014 Nu. 107, Lipoti a le Komiti o Oloa Gaosia Tulaga Muamua, Mataupu tau Pisinisi, Alamanuia ma Leipa i le P.P. 2012/2013 Nu. 76, Lipoti Faaletausaga a le Faalapotopotoga o le Esetete Tausi a Samoa mo le Tausaga Faaletupe na Faaiuina aso 30 Iuni 2011.
26. P.P. 2013/2014 Nu. 108, Lipoti a le Komiti o Oloa Gaosia Tulaga Muamua, Mataupu tau Pisinisi, Alamanuia ma Leipa i le P.P. 2012/2013 Nu. 75, Lipoti Faaletausaga a le Matagaluega o Faatoaga ma Faigafaiva mo le Tausaga Faaletupe na Faaiuina aso 30 Iuni 2011.
27. P.P. 2013/2014 Nu. 109, Lipoti a le Komiti o Mataupu tau le Va i Fafu Fefaatauaiga ma Tupe Maua i le Tulafono Tau Faaofi e Taofia ai Faiga Faaterorisi 2012.
28. P.P. 2013/2014 Nu. 110, Lipoti a le Komiti o Mataupu tau le Va i Fafu, Fefaatauaiga ma Tupe Maua i le P.P. 2012/2013 Nu. 67, Lipoti Faaletausaga a le Matagaluega mo Tupe Maua mo le Tausaga 2008/2009, P.P. 2012/2013 Nu. 68, Lipoti Faaletausaga a le Matagaluega mo Tupe Maua mo le Tausaga 2009/2010, P.P. 2012/2013 Nu. 69, Lipoti Faaletausaga a le Matagaluega mo Tupe Maua mo le Tausaga 2010/2011, P.P. 2012/2013 Nu. 70, Lipoti Faaletausaga a le Matagaluega mo Tupe Maua mo le Tausaga 2011/2012, & P.P. 2013/2014 Nu. 70, Lipoti Faaletausaga a le Matagaluega mo Tupe maua mo le Tausaga 2012/2013.
29. P.P. 2013/2014 Nu. 111, Lipoti a le Komiti mo le Toe Iloiloga o Tulafono Faatonu i Tulafono Faatonutonu S.R. 2013/1, S.R. 2013/2, S.R. 2013/3, S.R. 2013/4, S.R. 2013/5, S.R. 2013/6, S.R. 2013/7, S.R. 2013/8, S.R. 2013/9. S.R. 2013/10.

## Tuuina atu o Lipoti a Komiti Filifilia

30. P.P. 2013/2014 Nu. 112, Lipoti a le Komiti o Mataupu tau Faamasinoga, Leoleo & Falepuipui ma Faamasinoga o Fanua & Suafa i le P.P. 2011/2012 Nu. 105, Lipoti Faaletausaga a le Matagaluega o Faamasinoga ma Pulega tau Faamasinoga mo le Tausaga Faaletupe 2010/2011.
31. P.P. 2013/2014 Nu. 113, Lipoti a le Komiti o Galuga, Tulafono Tumau, Maota Fono, ma Mataupu tau Faiga Palota i le P.P. 2011/2012 Nu. 96, Lipoti a le Ofisa o le Komesina o Faiga Palota mo Faiga Palota Laiti 2011.
32. P.P. 2013/2014 Nu. 114, Lipoti a le Komiti o le Soifua Maloloina, Galuega tau le Va Fealoai, Mataupu tau Lotoifale ma Atinae o Afioaga ma Agafesootai i le P.P. 2012/2013 Nu. 16, ma le P.P. 2013/2014 Nu. 1, Lipoti Faaletausaga a le Matagaluega o Tina ma Tamaitai, Atinae o Nuu ma Afioaga ma Agafesootai mo le Tausaga Faaletupe Faaiuina aso 30 Iuni 2011 ma le Tausaga Faaletupe Faaiuina aso 30 Iuni 2012.
33. P.P. 2013/2014 Nu. 115, Lipoti a le Komiti o le Soifua Maloloina, Galuega tau le Va Fealoai, Mataupu tau Lotoifale ma Atinae o Afioaga ma Agafesootai i le P.P. 2013/2014 Nu. 73, Faamatalaga o Galuega ma Tala o Tupe a le Faaputugatupe o Faamanuiaga mo Tagatanuu Matutua o Samoa 2012-2-13.
34. P.P. 2013/2014 Nu. 116, Lipoti a le Komiti o Galuega, Tulafono Tumau, Maota Fono ma Mataupu tau Faiga Palota i le P.P. 2012/2013 Nu. 25, P.P. 2013/2014 Nu. 53 & P.P. 2013/2014 Nu. 54, Lipoti Faaletausaga a le Ofisa o Komesina o Faiga Palota mo Tausaga Faaletupe 2008/2009, 2009/2010 & 2010/2011.
35. P.P. 2013/2014 Nu. 117, Lipoti a le Komiti o Mataupu tau Aoga, Saienisi, Fesootaiga ma Faamatalaga Tekonolosi i le P.P. 2013/2014 Nu. 72, Lipoti Faaletausaga a le Matagaluega o Fesootaiga & Faamatalaga Tekonolosi mo le Tausaga 2010-2011.
36. P.P. 2013/2014 Nu. 118, Lipoti a le Komiti o le Soifua Maloloina, Galuega tau le Va Fealoai, Mataupu tau Lotoifale ma Atinae o Afioaga ma Agafesootai i le P.P. 2013/2014 Nu. 46, Lipoti Faaletausaga a le Faalapotopotoga o Mea tau Fale a Samoa mo le Tausaga 2012.
37. P.P. 2013/2014 Nu. 119, Lipoti a le Komiti o Galuega, Felauaiga ma Siosiomaga i le P.P. 2013/2014 Nu. 4, Faamatalaga o Sini Autu a le Faalapotopotoga o le Malosi Faa-Eletise mo le Vaitaimi 2013-2015.



18 MATI 2014

## Tuuina atu o Lipoti a Komiti Filifilia

38. P.P. 2013/2014 Nu. 120, Lipoti a le Komiti o Ofisa o le Palemene i le P.P. 2012/2013 Nu. 5, Lipoti Faaletausaga o le Penisione mo le Palemene mo le Tausaga 2010/2011 & P.P. 2013/2014 Nu. 15, Lipoti Faaletausaga o le Penisione mo le Palemene mo le Tausaga 2011/2012.
39. P.P. 2013/2014 Nu. 121, Lipoti a le Komiti o Galuega, Felauaiga ma Siosiomaga i le P.P. 2013/2014 Nu. 15, Lipoti Faaletausaga a le Faalapotopotoga o le Malosi Faaletise mo le Tausaga Faaletupe faaiuina aso 30 Iuni 2012.
40. P.P. 2013/2014 Nu. 122, P.P. 2013/2014 Nu. 123, Lipoti a le Komiti o Mataupu tau Aoga, Saienisi, Fesootaiga & Faamatalaga Tekonolosi i le P.P. 2012/2013 Nu. 26, Lipoti Faaletausaga a le Matagaluega o Aoga, Taaloga ma Aganuu aso 1 Iulai 2011 - 30 Iuni 2012.
41. P.P. 2013/2014 Nu. 123, Lipoti a le Komiti o Mataupu tau Aoga, Saienisi, Fesootaiga & Faamatalaga Tekonolosi i le P.P. 2012/2013 Nu. 11 & P.P. 2012/2013 Nu. 39, Lipoti Faaletausaga a le Faalapotopotoga o Suesuega Faasaienisi a Samoa mo le Tausaga Faaletupe 2010/2011 ma le Tausaga Faaletupe 2011/2012.
42. P.P. 2013/2014 Nu. 124, Lipoti a le Komiti o Faafoega tau Pulega a le Malo i le P.P. 2012/2013 Nu. 42, Lipoti Faaletausaga a le Falemeli o Samoa mo le Tausaga Faaletupe 2009/2010.
43. P.P. 2013/2014 Nu. 126, Lipoti a le Komiti o Tupe Maua ma Tupe Totogi i le P.P. 2012/2013 Nu. 21 & P.P. 2013/2014 Nu. 45, Lipoti Faaletausaga a le Faletupe Tutotonu a Samoa mo Tausaga Faaletupe 2010/2011 & 2011/2012.
44. P.P. 2013/2014 Nu. 127, Lipoti a le Komiti o Tupe Maua ma Tupe Totogi i le P.P. 2012/2013 Nu. 38, P.P. 2012/2013 Nu. 39 & P.P. 2012/2013 Nu. 40, Faamatalaga tau Tupe a le Malo mo Tausaga Faaletupe Faaiuina aso 30 Iuni 2008, 2009 & Tausaga Faaletupe Faaiuina aso 30 Iuni 2010.

**LAFO MO LE FAAUI I TUA O LE TULAFONO TAU  
FAAOFI (T.T.113)**

**FOFOGA FETALAI:** Tulai mai lau Afioa i le Minisita mo Leoleo ma Falepuipui.

18 MATI 2014

**Lafo mo le Faau i tua o le Tulafono Tau Faaofi (T.T.113)**

**Afioga Hon SALA FATA LISATI PINATI (Minisita mo Leoleo ma Falepuipui, Auauunaga o Tinei Mu ma Faalavelave Tutupu Faaufasei):** E muai faafetaia lau Afioga i le Fofoga Fetalai i leni taeao, ua maea ona e siitia le tatou taulaga ae a lo tatou va nonofo ai ma le Atua lo tatou Faaola.

E momoli atu foi lau faamalo ma le faatalofa i lau Afioga i le Palemia, le aiga Kapeneta faapea foi lea itu o le malu i le saofaiga o sui usufono mamalu o le Palemene i le Itu Agai, tainane ia sui usufono mamalu i Minisita Lagolago, faapea Faauluuluga o Matagaluega a le Malo, aemaise alo ma fanau o lo o faapea ona tatou faatasi i leni taeao. Faafetai atu foi e faafeiloai atu foi i le tapuaiga a Samoa o lo o faafogafoga mai i le Fonousu a Samoa i leni taeao fou.

Ou te tulai atu ma lou faaaloalo, lau Afioga i le Fofoga Fetalai ou te faatu le lafo, *Ina ia faau mai i tua le Tulafono Tau Faaofi e Taofia ai Faiga Faaterorisi 2012.*

*Faaluaina e le Minisita mo Galuega, Felauaiga ma Atinae Eseese ma le Minisita mo Punaoa Faalenatura ma le Siosiomaga.*

*Na faamaonia le lafo ma tulai ai le Tulafono Tau Faaofi e Taofia ai Faiga Faaterorisi 2012 ua faau i tua.*

**TULAFONO TAU FAAOFI O FAIGA ALOAIA E TOTOGI AI TUPE  
A LE ATUNUU 2014 – faitauga faatolu**

**FOFOGA FETALAI:** Mo le silafia e le Palemene o le Tulafono Tau Faaofi leni sa faia lona faitauga iloiloga auilili i le aso Fono 24 o Ianuari 2014.

Tulai mai lau Afioga i le Minisita o Tupe.

**Afioga Hon FAUMUINA TIATIA FAAOLATANE LIUGA (Minisita o Tupe):** Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Faiga Aloaia e Totogi ai Tupe a le Atunuu 2014 i lona faitauga faatolu.*

*Faaluaina e le Minisita mo Tupe Maua, Minisita mo Fesootaiga ma Faamatalaga Tekonolosi ma le Sui Palemia.*

*Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoao Faitulafono.*

18 MATI 2014

**TULAFONO TAU FAAOFI O LE KOMISI O LE GAGANA  
SAMOA 2014 – faitauga faatolu**

**FOFOGA FETALAI:** Mo le silafia e le Palemene o le Tulafono Tau Faaofi lenei sa faia lona iloiloga auiliili i le aso Fono 24 o Ianuari 2014.

Tulai mai lau Afioga i le Minisita mo Aoga, Taaloga ma Aganuu.

*Afioga Hon MAGELE MAULIU (Minisita mo Aoga, Taaloga ma Aganuu): Lau Afioga i le Fofoga Fetalai ou te faatu le lafo, Ina ia faitauina nei le Tulafono Tau Faaofi o le Komisi o le Gagana Samoa 2014 i lona faitauga faatolu.*

*Faaluaina e le Minisita mo Faatoaga, Faleoloa o Faatoaga ma Faigafaiva, Minisita mo Punaoa Faalenatura ma le Siosiomaga, Minisita mo Galuega, Felauaiga ma Atinae Eseese ma le Minisita mo Leoleo ma Falepuipui, Auaunaga o Tinei Mu ma Faalavelave Tutupu Faafuasei.*

*Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoao Faitulafono.*

**TULAFONO TAU FAAOFI O TEUTEUGA O LE TULAFONO  
O LE FAALAPOTOPOTOGA O LE MALOSI FAA-ELETISE 2014  
– faitauga faatolu**

**FOFOGA FETALAI:** Mo le silafia e le Palemene o le Tulafono Tau Faaofi lenei sa faia lona iloiloga auiliili i le aso Fono 24 o Ianuari 2014.

Tulai mai lau Afioga i le Minisita mo Galuega, Felauaiga ma Atinae Eseese.

*Afioga Hon MANUALESAGALALA ENOKATI POSALA (Minisita mo Galuega, Felauaiga ma Atinae Eseese): Lau Afioga i le Fofoga Fetalai ou te tulai atu e faatu le lafo, Ina ia faitauina nei le Tulafono Tau Faaofi o Teuteuga o le Tulafono o le Faalapotopotoga o le Malosi Faa-Eletise 2014 i lona faitauga faatolu.*

Ma le faaaloalo.

*Faaluaina e le Minisita mo Punaoa Faalenatura ma le Siosiomaga, Minisita mo Leoleo ma Falepuipui, Auaunaga o Tinei Mu ma Faalavelave Tutupu Faafuasei, ma le Minisita mo Aoga, Taaloga ma Aganuu.*

*Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoao Faitulafono.*

18 MATI 2014

**TULAFONO TAU FAAOFI O TEUTEUGA O LE TULAFONO O  
SONE TAU FOLAUGA I LE SAMI 2014 – faitauga muamua**

**FOFOGA FETALAI:** Tulai mai lau Afioga i le Palemia.

Susuga Hon TUILAEPa FATIALOFA LUPESOLIAI AIONO NEIOTI SAILELE MALIELEGAOI (Palemia): Lau Afioga i le Fofoga Fetalai, ou te tulai atu e faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Sone Tau Folauga i le Sami 2014 i lona faitauga muamua.*

*Faaluaina e le Sui Palemia, Minisita o Tupe ma le Minisita mo Fesootaiga ma Faamatalaga Tekonolosi.*

*Na faamaonia le lafo ma faitauina le Tulafono Tau Faaofi i lona faitauga muamua.*

**FOFOGA FETALAI:** E tusa ai ma le Tulafono Tumau o le a faatulaga le Tulafono Tau Faaofi mo lona faitauga faalua i le Aso Fono lona 3 e mulimuli mai.

**TULAFONO TAU FAAOFI O LE TEUTEUGA O LE TULAFONO O  
FAAFOEGA O LAFOGA 2014 – faitauga muamua**

**FOFOGA FETALAI:** Tulai mai lau Afioga i le Minisita mo Tupe Maua.

Tofa Hon TUILOMA LAMEKO (Minisita mo Tupe Maua): Lau Afioga i le Fofoga Fetalai ua ou tulai atu ma le faaaloalo e faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Faafoega o Lafoga 2014 i lona faitauga muamua.*

Ma le faaaloalo lava.

*Faaluaina e le Minisita o Tupe.*

*Na faamaonia le lafo ma faitauina le Tulafono Tau Faaofi i lona faitauga muamua.*

**FOFOGA FETALAI:** E tusa ai ma le Tulafono Tumau, o le a faatulaga le Tulafono Tau Faaofi lenei i lona faitauga faalua i le Aso Fono lona 3 e mulimuli mai.

18 MATI 2014

**TULAFONO TAU FAAOFI O MAVAEGA TAUSI 2014  
– faitauga muamua**

**FOFOGA FETALAI:** Tulai mai lau Afioga i le Minisita o Tupe.

**Afioga Hon FAUMUINA TIATIA FAAOLATANE LIUGA:** Lau Afioga i le Fofoga Fetalai ou te tulai atu e faatu le lafo, *Ina ia faitauina nei le Tulafono Tau Faaofi o Mavaega Tausi 2014 i lona faitauga muamua.*

*Faaluaina e le Sui Palemia ma le Minisita mo Fesootaiga ma Faamatalaga Tekonolosi.*

*Na faamaonia le lafo ma faitauina le Tulafono Tau Faaofi i lona faitauga muamua.*

**TULAFONO TAU FAAOFI O TEUTEUGA O LE TULAFONO O  
KAMUPANI FAAVA O MALO 2014 – faitauga muamua**

**FOFOGA FETALAI:** Tulai mai lau Afioga i le Minisita o Tupe.

**Afioga Hon FAUMUINA TIATIA FAAOLATANE LIUGA:** Lau Afioga i le Fofoga Fetalai ou te tulai atu e faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Kamupani Faava o Malo 2014 i lona faitauga muamua.*

*Faaluaina e le Sui Palemia ma le Minisita mo Fesootaiga ma Faamatalaga Tekonolosi.*

*Na faamaonia le lafo ma faitauina le Tulafono Tau Faaofi i lona faitauga muamua.*

**TULAFONO TAU FAAOFI E TAOFIA AI FAIGA FAATERORISI  
2014 – faitauga muamua**

**FOFOGA FETALAI:** Tulai mai lau Afioga i le Minisita mo Leoleo, Falepuipui ma Auaunaga o Tinei Mu.

**Afioga Hon SALA FATA LISATI PINATI:** Lau Afioga i le Fofoga Fetalai ou te tulai atu e faatu le lafo, *Ina ia faitauina nei le Tulafono Tau Faaofi e Taofia ai Faiga Faaterorisi 2014 i lona faitauga muamua.*

*Faaluaina e le Minisita mo Galuega, Felauaiga ma Atinae Eseeese ma le Minisita mo Punaoa Faanatura ma le Siosiomaga.*

18 MATI 2014

**Tulafono Tau Faaofi o Teuteuga o le Tulafono o le Faamasinoga a le Lalolagi mo Solitulafono Faava o Malo 2014 – faitauga muamua**

*Na faamaonia le lafo ma faitauina le Tulafono Tau Faaofi i lona faitauga muamua.*

**TULAFONO TAU FAAOFI O TEUTEUGA O LE TULAFONO O LE FAAMASINOGA A LE LALOLAGI MO SOLITULAFONO FAAVA O MALO 2014 – faitauga muamua**

**FOFOGA FETALAI:** Tulai mai lau Afioga i le Palemia.

**Susuga Hon TUILAEPA FATIALOFA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fetalai ou te tulai atu ma le faaaloalo e faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Faamasinoga a le Lalolagi mo Solitulafono Faava o Malo 2014 i lona faitauga muamua.*

*Faaluaina e le Sui Palemia, Minisita mo Tupe Maua ma le Minisita o Tupe.*

*Na faamaonia le lafo ma faitauina le Tulafono Tau Faaofi i lona faitauga muamua.*

**FOFOGA FETALAI:** E tusa ai ma Tulafono Tumau o le a faatulaga le Tulafono Tau Faaofi mo lona faitauga faalua i le Aso Fono lona 3 e mulimuli mai.

**TULAFONO TAU FAAOFI O FAATULAGAGA FAALETULAFONO O FUA O LE MAMafa MA FUA ESEESE O OLOA 2014 – faitauga muamua**

**FOFOGA FETALAI:** Tulai mai lau Afioga i le Minisita mo Pisinisi, Alamanuia ma Leipa.

**Tofa Hon FONOTOE NUAFESILI PIERRE LAUOFO (Sui Palemia, Minisita mo Pisinisi, Alamanuia ma Leipa):** Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Faatulagaga Faaletulafono o Fua o le Mamafa ma Fua Eseese o Oloa 2014 i lona faitauga muamua.*

*Faaluaina e le Minisita mo Tupe Maua, Minisita o Tupe ma le Minisita mo Fesootaiga ma Faamatalaga Tekonolosi.*

*Na faamaonia le lafo ma faitauina le Tulafono Tau Faaofi i lona faitauga muamua.*

*18 MATI 2014*

**Tulafono Tau Faaofi o le Faamasinoga mo Mataupu Faatatau i Aiga  
2013 – faitauga faalua**

**FOFOGA FETALAI:** E tusa ai ma le Tulafono Tumau o le a faatulaga le Tulafono Tau Faaofi i lona faitauga faalua i le Aso Fono lona 3 e mulimuli mai.

**TULAFONO TAU FAAOFI O LE FAAMASINOGA MO MATAUPU  
FAATATAU I AIGA 2013 – faitauga faalua**

**FOFOGA FETALAI:** Mo le silafia e le Palemene o le Tulafono Tau Faaofi lenei sa faia lona faitauga muamua i le Aso Fono 24 Ianuari 2014. Tulai mai lau Afioga i le Minisita mo Faamasinoga ma Pulega Tau Faamasinoga.

**Afioga Hon FIAME NAOMI MATAAFA (Minisita mo Faamasinoga ma Pulega Tau Faamasinoga):** Lau Afioga i le Fofoga Fetalai ou te tulai atu e faatu le lafo, *Ina ia faitauina nei le Tulafono Tau Faaofi o le Faamasinoga mo Mataupu Faatatau i Aiga 2013 i lona faitauga faalua ma ou te fia tautala faamalamalama i ai.*

*Faaluaaina e le Sui Palemia, Minisita mo Tupe Maua ma le Minisita o Tupe.*

**FOFOGA FETALAI:** Tulai mai lau Afioga i le Minisita mo Faamasinoga ma Pulega Tau Faamasinoga e saunoa faamalamalama i le Tulafono Tau Faaofi.

**Afioga Hon FIAME NAOMI MATAAFA:** Lau Afioga i le Fofoga Fetalai ma le mamalu o le Palemene, o lenei Tulafono Tau Faaofi o le faamoemoe ina ia faavaeina se Faamasinoga faapitoa mo mataupu faatatau i aiga, e aveia ma se vaega o Faamasinoga Faa-Itumalo ma aiaia ai ona sui tofia ma lana Pulega Faa-Faamasinoga.

O lenei Tulafono Tau Faaofi e ono ni ona vaega ou te fia tautala puupuu i nisi o vaega taua. O le faavaeina o lenei Faamasinoga mo mataupu faatatau i aiga, ua mulimulitaia ai se tasi o faamoemoe o le Faamasinoga ina ia faavaeina ni Faamasinoga faapitoa e pei ona maea faatulai mai ai foi se Faamasinoga faasino i soligatulafono a tagata talavou po o le Youth Court.

O le agaga o lea faiga faavae po o se uiga galue o le Faamasinoga ina ia tuufaatasia mataupu e agaga faatasi e faafaigofie ai ona tali atu i ai le Tulafono i mataupu e tulai mai i lea taimi ma lea taimi ma ia faatupu ai foi le poto masani o le afaigaluega aemaise alii ma tamaitai o le Faamasinoga, tainane foi o le afaigaluega i le faagasologa o mataupu nei.

18 MATI 2014

**Tulafono Tau Faaofi o le Faamasinoga mo Mataupu Faatatau i Aiga  
2013 – faitauga faalua**

O lenei foi Tulafono Tau Faaofi o lo o faatauaina ai le itu o le sailia pea o se faaleleiga ae lei oo atu le mataupu i luma o le Faamasinoga, e le taumate o lo o malamalama le finagalo o le Maota i le agaga lava aemaise lava o feeseeseaiga i totonu o aiga e tuliloa pea avanoa e toe fafoi ai le maopoopoga ma le nofo lelei o aiga e ala lea i ni faiga e faatupu ai se faaleleiga. E le taumate foi ua silafia e le Maota ua faatulaga mai nisi o faiga ua aloaia e le Faamasinoga e faatupuina ai le agaga o le faaleleiga po o le foia lea o ni faafitauli i ni itu o lo o faafinauina ni mataupu po o le tau faapapalagi, o le alternative dispute resolution ma le itu o lea foi ua maua e le Maota ua amata foi ona faatulaga mai se tino faapolofesa o i latou ia e tau o mediators po o sooupu faaetulafono e mafai ona foia ai se feeseeseaiga ma maua ai se nofo lelei e aunoa ma le oo atu i luma o le Faamasinoga e fai mai i ai faaiuga e tusa ai ma Tulafono ua faataatitia.

O le isi vaega lau Afioga i le Fofoga Fetalai ou te fia tautala puupuu i ai, o nisi o Tulafono o le a faaaogaina i lalo o lenei Tulafono faavae fou i mataupu faatatau i aiga e aofia ai a tatou Tulafono o Tamaiti, Tulafono o le Saogalemu o Aiga lea na tatou pasia i le tausaga ua mavae, le Tulafono o le Tausiga ma le Faamaoniga o Tama, le Tulafono o le Mafuaaga o le Tatalaga o Faaipoipoga, le Tulafono o Faaipoipoga, le Tulafono o le Faamauina o Pepa Fanau, le Fananau mai o Tagata Maliliu ma Faaipoipoga.

O nisi nei o Tulafono Autu o le a limataitaiina ai le galuega a le tatou Faamasinoga fou lea. O le faafoega o galuega a lenei Faamasinoga, o le a faafoeina lava e le Matagaluega i ona tulaga masani i le vasega o Resitala ma le aufaigaluega o lo o nafa ma le faagasologa o mataupu i lalo o galuega a le Faamasinoga Faaitumalo.

O le isi itu taua i le Vaega 6 i aiaiga eseese o lo o faatulaga mai ai le faatonutonuina o Tulafono, o rules, o le vaega lea e nafa ma le vasega o Faamasino, ae faapea foi Tulafono Faatonutonu, o le vaega lea e feagai ma le Pulega e faagasolo ai galuega a le tatou Faamasinoga fou lea.

O sau faamatalaga lea ma le faaaloalo lau Afioga i le Fofoga Fetalai ma le mamalu o le Palemene.

**FOFOGA FETALAI:** Malo saunoa faamalamalama i lau Afioga i le Minisita e a ia le Tulafono Tau Faaofi, ma e manatu o lena ua maea ona tuuina atu uma kopi o le tatou Tulafono Tau Faaofi taua lenei, o se tasi lenei o Tulafono Tau Faaofi ua faatulai mai e le Matagaluega, ona o le faataua lava o tulaga i totonu o tatou aiga. E le na ma se laina foi le tele ma le anoanoai o faafitauli o lo o tulai mai i lea taimi ma lea taimi, e le gata o le tatou atunuu nei, a ua tatou aafia ona o tu ma aga a atunuu mai fafo. Ma o lea ua faatulaga ai e lenei Tulafono Tau Faaofi taua ni aulape ma ni alafua fou e limataitaiina ai le galuega a le Matagaluega ina ia mafai ona foia ma soalaupule mataupu e tulai mai i lea vaitaimi ma lea vaitau.



18 MATI 2014

**Tulafono Tau Faaofi o le Faamasinoga mo Mataupu Faatatau i Aiga  
2013 – faitauga faalua**

O le taimi lenei o tatou felafolafoaiga, tulai mai lau Afioga i le sui usufono mo Faasaleleaga Nu.2 ona faasolosolo ai lea o sui usufono mamalu.

Susuga PAPANII LIO FAAVAIVAIOMANU TAEU MASIPAU (Faasaleleaga Nu.2): Faafetai i lau Afioga i le Fofoga Fetalai faapea foi le paia o le Maota mo le avanoa.

E momoli le faafetai tele i lau Afioga i le Minisita e tusa o le faatulai mai o lenei Tulafono Tau Faaofi. Ou te iloa o le taimi muamua foi lenei ua faatino ai lenei Tulafono Tau Faaofi ma lenei vaega o le Faamasinoga i totonu o lo tatou atunuu. O lea ua saunoa le Minisita i itu lelei ma itu ua talafeagai ai i lenei taimi i lo tatou atunuu ma ua tatau ai ona faatu lenei faamasinoga faapitoa, aemaise lava o mataupu i lotoifale i mea nei o aiga; ua malo faafetai. E i ai lava nai fesili ma nai manatu e fia tuuina atu i lau Afioga i le Minisita, aua e aoga foi mo lenei Tulafono Tau Faaofi a o le i tuuina atu i lona tulaga auiliili ma saililiga a le Komiti.

O le fesili lava e tulai mai i lou nei sui usufono, po o ua lava ni mataupu ua faatoai atu i le Matagaluega o Faamasinoga ma Pulega tau Faamasiniga e faatino faapitoa ai lenei Faamasinoga faapitoa? Ona o le matau i lenei vaitaimi i le vaavaai i ai, pe tasi lava le aso o le vaiaso e faatino ai lenei faamasinoga faapitoa mo aiga. I le tulai mai la o lenei Tulafono Tau Faaofi o le fesili lena ua tulai mai, po o ua lava ni mataupu e faaono faatino ma faapitoa ai se faamasinoga mo aiga?

O lea ua maua ua tofia se tasi o tamaitai aua lenei tofiga e avea ma Faamasino. E pei o le agaga lena aua o lea ua matau atu o lea ua faatino foi ma le Faamasino i lenei faamasinoga faapitoa. O le fautuaga, o le faamasinoga lava e mamafa i lou nei sui usufono, o le Faamasinoga o Fanua ma Suafa. I le molimau mai le Matagaluega, o lo o tele lava a tatou mataupu o lo o i totonu o le Faamasinoga Apili i le Faamasinoga o Fanua ma Suafa pe a ma le 500 mataupu tuua.

Faafetai lava i le Faamasino Sili ma le Pulega o Faamasinoga i le tofiga talu ai nei o se tasi o tamalii o lea ua fesoasoani i le Afioga i le Peresetene, ae manaia foi lenei tamaitai aua o le tamaitai le Faamasino Faapitoa, e manaia foi le fesoasoani i ia foi tulaga i a tatou faamasinoga aemaise o measina a le atunuu. Atonu e aoga foi se sao o lenei Tamaitai Faamasino aua a tatou faamasinoga o fanua ma suafa tuua i le vaitaimi nei. O le agaga lena e avatu e faataatia i autafa o lau Afioga i le Minisita mo le agai i luma o lenei Tulafono Tau Faaofi ma le Matagaluega, faafetai.

**FOFOGA FETALAI:** Malo faafetai. Tulai mai le sui usufono mo Falealupo, malie le sui usufono mo Faleata Sisifo ona o lea sa tulai muamua mai le Afioga i le Sui Taitai o le Itu Agai.

18 MATI 2014

**Tulafono Tau Faaofi o le Faamasinoga mo Mataupu Faatatau i Aiga  
2013 – faitauga faalua**

**Afioga Hon AEAU PENIAMINA LEAVAISEETA (Falealupo):** Faamalo lava i lau Afioga i le Fofoga Fetalai ma le mamalu o le Maota aemaise foi o tatou uso a malo o lo o tatou faatasi.

Lau Afioga i le Fofoga Fetalai, e lagona lava i tino matagi lelei pe a fetai. O atinae ia ma fuafuaga a le Afioga i le Minisita ma le mamalu o le Matagaluega, ia faaleleia. A faapuupuu lava ia faaleleia ma faafaigofieina galuega, a o le agaga tonu lava lea sa saunoa atu ai lou uso a sui usufono lea talu ai nei, e taua tele ma o le matua taua lava ina ia faafaigofie. A aumai lava mataupu e faapitoa i aiga, the question is – so o se aiga lava o a latou problems ia o fanua ma suafa. O le a la le mataupu lea faapitoa i aiga, o misa? E pei o le mea lena o lea e tuliloa. Aua o le mea foi lea o lea e mamafa ia te au lea na saunoa atu ai lou uso nei. Tulou lava o le upu e to ia ate au, e toatele ua fai i lagi, o o tatou matua ae e le i faia faamasinoga ia. O le concern lena o lo o i le atunuu. E taua tele lau Afioga i le Minisita, o le taua ia o lena mataupu. A o nai ona autafa ia o lea e ave i ai le faamuamua, le lagona ma le faasinomaga.

A faapea ua 10 pe 20 tausaga o tolo mataupu ia i fanua ma suafa a o lea o le a toe aumai si a tatou mea fou lea, e taua tele e pei lava ona fai atu e taua, a o le faamuamua ma le lagona o lo o i le mamalu o le atunuu i nuu i tua ua aafia ai le atunuu atoa. Se i silasila.....

**Afioga Hon Fiamé Naomi Mataafa:** Lau Afioga i le Fofoga Fetalai.....

**FOFOGA FETALAI:** Malie le sui usufono mamalu o lo o saunoa, se i tulai atu le Afioga i le Minisita leaga o le auga e tasi la oulua mataupu. O lea na amatamea le sui usufono mo Faasaleleaga Nu.2 a o lea ua toe faamalalalama atili e lau Afioga i le sui usufono mamalu.

Tulai mai lau Afioga i le Minisita mo Faamasinoga ma Pulega tau Faamasinoga.

**Afioga Hon Fiamé Naomi Mataafa:** Lau Afioga i le Fofoga Fetalai o se mataupu e fia faasao.

E moni lava saunoaga a sui usufono ona o lea na amata mai e le sui usufono mo Faasaleleaga Nu.2, a o lea ua saunoa mai le sui usufono mo Falealupo i le mataupu lea o le faatauaina o le Faamasinoga o Fanua ma Suafa. Tatou te tofua lagona uma lava lena mea, ae faamolemole lau Afioga i le Fofoga Fetalai, o le tatou Tulafono o le Tulafono Tau Faaofi i mataupu e faatatau mo aiga. Pe mafai ona tatai mai i le moa o le ala finagalo o sui usufono ona e mafai lava ona ou aumaia se Tulafono o le Faamasinoga o Fanua ma Suafa ona tafili saunoa lava lea o le Maota, ae faamolemole mo le tatou galuega ina ia tuutuu mai i le moa o le ala?

Ma le faaaloalo lava.

18 MATI 2014

**Tulafono Tau Faaofi o le Faamasinoga mo Mataupu Faatatau i Aiga  
2013 – faitauga faalua**

**FOFOGA FETALAI:** Ua lelei, o lea ua maua le finagalo o lau Afioga i le Minisita. O le ala foi lea o lou tuua o le avanoa ona e le mafai ona manino le Maota i atugaluga o le sui usufono po o le a le mea na aumai ai le Tulafono Tau Faaofi lenei mo aiga a o lea e tele le backlog i le Faamasinoga o Fanua ma Suafa. A o le a fesoasoani atu le Nofoa, o fautuaga nei na aumai, na aumai i le Ofisa o Faamasinoga ma Pulega tau Faamasinoga. O i latou tonu lava ia e faagaoioia galuega tau faamasinoga ma o i ina lea e ala ai ona aumai le Tulafono Tau Faaofi lenei. O le tele o mataupu tau fanua ma suafa e aafia ai mataupu faale-aiga. O lona uiga a pasia loa mataupu faale-aiga, ona vaelua loa lea o oulua atugaluga i a oulua faamasinoga na e le i faataunuaina, a o le fesoasoani atu lena ina ia taatia i lagatonu, faamuamua le aiga – family first, suafa and land later, ae faamuamua aiga aua o i ina e maua ai le saogalemu ma le toafilemu o aiga taitasi.

E i ai se isi sui usufono e toe fia saunoa ae e manatu ua malamalama. Tulai mai le sui usufono mo Faleata Sisifo.

**Tofa LEALAILEPULE RIMONI AIAFI (Faleata Sisifo):** Faafetai lava mo le avanoa. E faatalofa atu foi i lenei taeao i le paia o le Maota o Samoa aemaise o le faafofoga a le atunuu aemaise foi o nai fanau ua faaauauina le latou polokalame. Ia talosia ia outou tutupu ae ma avea outou ma ni Taitai lelei o Samoa mo le lumanai ae ua fetai foi ma le faia o le Tulafono Tau Faaofi lenei.

Faafetai lava mo le Tulafono Tau Faaofi, ae ou te fia faamamafaina finagalo o nisi o sui usufono. E tele ni suiga lelei ua faatinoina e le Matagaluega o Faamasinoga ma Pulega tau Faamasinoga e le gata i vaega eseese o faamasinoga i le puipuiga o Tulafono, a o le faavaeina ma le faatuina. O mea lava ia e agai i ai le tele o atunuu tetele o le lalolagi. E toatele tagata o lo o i ai, e tele faalavelave ma tele soligatulafono. E le faapea foi la e le o faatuputupulaia soligatulafono i totonu o Samoa. O lea faatoa maea ona faatuina atu le isi lala fou, le vaega lea i mea tau mediation lea foi na ave i ai le tatou lagolago ona o se tulaga lelei e faagasolo ai le faagaoioia o le tele o soligatulafono i soligatulafono mama. Sa faapea foi o i ina o le a maua ai avanoa mo aiga aemaise mea ia o domestic i le va lava o ulugalii ma fanau e faaoga ai lea vaega. Ou te le ma iloa po o le a se manaoga tele o i ai e ono faavae ai se vaega faapitoa mo soligatulafono ia ia atugaluga faapea. Aua o le tele o vaega nei, e le o ni soligatulafono foi lena o criminal, o feeseeseaiga faale-aiga po o se ulugalii ua fia tetea, po o le va ma fanau ma tulaga faapea. O le popolega ona o le tele o Tulafono ia ua faatulai mai a o le faagaoioiga ma le faatinoina.

O le Aso Toonai lea na mavae nei sa ave ai a ma malo ua leva ona le toe oo mai i Samoa, sa faamatamata i le taulaga. Sa matou amata la i le NPF Plaza if ale aiga o i ai ma matou talatalanoa ai.

*18 MATI 2014*

**Tulafono Tau Faaofi o le Faamasinoga mo Mataupu Faatatau i Aiga  
2013 – faitauga faalua**

O le mau a i laua ua manaia suiga tetele ua i ai Samoa, ae i ai la se suiga faigata po o se suiga le lelei ua o faatasi ma suiga nei. O le taimi a o matou i ai i ina sa matou faitauina, e toasefulu tamaiti eseese e o atu ma mea foi nei e faatau atu. Ona matou o lea i Mataupu i le isi vaega lea i le Mariner e faaauau ai le matou evaga lea e pule ai le Sui Palemia, na matou o atu foi i ina faitau e toaono tamaiti na o atu.

O vaega ia o lea e popole ai le taofi, o i ina e tataua ona agai i ai aua ua leva foi ona tatou pasia le Tulafono lea a le Leipa ma le Tulafono lea e vaavaai ai tamaiti ia e le o i le aoga, a o le atugaluga lea ua tele Tulafono ua faatulai mai, a o lo o vaivai le faataunuuna po o le monitor ina o mea nei.....

**Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai.....**

**FOFOGA FETALAI: Malie le sui usufono mamalu, se i tuu atu le avanoa i le mea e fia faasao.**

**Susuga Hon Tuilaepa Fatialofa Lupesoliai Aiono Neioti Sailele Malielegaoui: Na ona ou fesili atu lava i le sui usufono po o le Aso Toonai ea lea na alu ai lana tafaoga? Ina ne i t e i ua faalauaitale na tamaiti, a o la e faaoga lelei le Aso Toonai. Afai o le Aso Toonai, e leai ni aoga i ni Aso Toonai.**

**FOFOGA FETALAI: O le Aso Toonai Leala?**

**Tofa LEALAILEPULE RIMONI AIAFI: E sao lelei le Afioga i le Palemia, o le Aso Toonai, ae le na o le Aso Toonai e tafao ai Lealailepule. O Lealailepule e tafao mai lava i le Aso Gafua seia oo lava i le Aso Toonai, ona oo lea i le Aso Sa alu i le lotu ma sisii lima e faafetai i le Atua i lona alofa.**

**O lona uiga o nei faiga.....**

**Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai.....**

**FOFOGA FETALAI: Ia, se i tulai mai le Afioga i le Palemia.**

**Susuga Hon Tuilaepa Fatialofa Lupesoliai Aiono Neioti Sailele Malielegaoui: O au foi ou te tafao i le Aso Toonai e tai pei foi o nai tamaiti ia sa tafafao i le Aso Toonai, a o la e tafafao aoga tamaiti. E pei o le tulaga lena ina nei tei ua maumau lau saunoaga i le tatou Tulafono Tau Faaofi ona o lea o le a alu tele i tamaiti ia sa tafafao ma faapea mai e le o i ni aoga, a o lena o le Aso Toonai. Tatou te tafafao uma lava i le Aso Toonai.**

*18 MATI 2014*

**Tulafono Tau Faaofi o le Faamasinoga mo Mataupu Faatatau i Aiga  
2013 – faitauga faalua**

**FOFOGA FETALAI:** Tulai mai le sui usufono e faaauau le saunoaga. Se i taumafai mai i le moa o le ala i le tatou Tulafono Tau Faaofi.

**Tofa LEALAILLEPULE RIMONI AIAFI:** E sao le Afioga i le Palemia aua o ia foi e tafao, e tafao lava i lona falesa, ae e le tafao tele i le taulaga le tocaina.

A o mea ia, e leai o vaega e pei e faaataata a lafoga ae e tatau ona ave i ai le faamuamua a le Matagaluega. Se i tagai i vaega nei aua o lea e tele vaega aoga o lo o tulai mai a o atugaluga na e tatau ona tagai i ai. E le faapea e le lagolagoina suiga lelei aua o suiga lelei lava e tatau ona faaauau, a o vaega ia e tatau ona tagai lelei i ai.

O lea foi sa saunoa le Afioga i le Tamaitai Minisita i le Mediation, o se mea aoga lea. Pau lava le faanoanoaga e fia faaleo atu, ua ou vaai i ata o i latou ia. E le faapea e faatauagavale i ai, ae sa tatau aua e tele tagata o le atunuu e agavaa i ai aemaise o le aufaifaatoaga, o le aufaipisinisi. O le isi mea o lea out e vaai atu o lo o sau ai ma ata o loia pe afai e moni au. Sa ou faapea au e le tatau ona i ai loia i totonu i le vaega lea ona o le a conflict ai.

**FOFOGA FETALAI:** Ou te faamalulu atu i le saunoaga a le sui usufono mamalu.....

**Tofa LEALAILLEPULE RIMONI AIAFI:** E ui i lea, o nai motugaafa na se i silasila ane i ai le Matagaluega.....

**FOFOGA FETALAI:** Malie Lealailepule se i fai atu le tala lea a le Nofoa leaga o lea e tautalagia filifiliga ma tofiga ua maea ona faatinoina e le Afioga i le Faamasino Sili ma lona Ofisa. E talii foi ae popoe ona o le va fealoaloai ona o lea e taua i latou ma o i latou tonu o lo o aumai o latou ata i totonu o nusipepa. Ia faataatia ese le talanoaina o tulaga ia ona o mea ua uma ona fai i ai le faaiuga a le Matagaluega aemaise foi le fitoitonu ia i latou e le mafai ona tali mai, ae tulai maia e faai mai le saunoaga.

**Tofa LEALAILLEPULE RIMONI AIAFI:** Faafetai ma e faamalulu atu i lea vaega, ae ou te le o tautala e faaleaga, ae na o se manatu na taumafai e avatu.

O nai motugaafa na aua le Tulafono Tau Faaofi e pei ona tuuina mai, faafetai.

**FOFOGA FETALAI:** Malie le sui usufono mo Gagaemauga Nu.2 se i lafo i lea itu o le Malu. Se i tulai mai le Afioga i le Minisita Lagolago ona toe tuu atu ai lea o le avanoa i lona Itu.

Tulai mai se tasi o sui usufono mo Faasaleleaga Nu.1, Afioga Hon Gatoloaifaana Amataga Alesana Gidlow.

18 MATI 2014

**Tulafono Tau Faaofi o le Faamasinoga mo Mataupu Faatatau i Aiga  
2013 – faitauga faalua**

**Afioga Hon GATOLOAIFAANA AMATAGA ALESANA GIDLOW (Faasaleleaga Nu.1):** Faafetai tele lau Afioga i le Fofoga Fetalai mo le avanoa.

Ou te tulai atu e fia faamauina le agaga faafetai aemaise le lagolagoina o lenei Tulafono Tau Faaofi taua. E fia faafetai ai i le Tamaitai M inisita ma le Matagaluega aua a tuu i le loloto o lenei upu o measina a le atunuu, o lou talitonuga e leai se mea e sili atu i lo aiga, fanau, o le fatu o aiga aua o i ina e mapuna mai ai mea lelei uma i lo tatou atunuu.

Ou te faafetaia le agaga ua faatauaina ai aiga i le faapitua lea o se vaega o le faamasinoga e lotea ai mataupu lava ia tau i aiga, aemaise o a tatou fanau. E tele faafitauli ua tulai mai, a o le agaga lava ina ia aua ne i lipoi faatasi ma isi soligatulafono matuia ma tetele atu, aemaise o lea ua faitau atu e faatauaina le tulaga lea o le faaleleiga o totonu o aiga i fanau ma matua ma vaega eseese e afaina ai le nofo lelei. Pau lava o lea lau Afioga i le Fofoga Fetalai e avatu ai pea se tuualalo i le Matagaluega e ala atu i le Afioga i le Tamaitai Minisita, o le tulaga lea i le toe tulituliloaina, o a ni faaiuga e faia i totonu aemaise lava pe a agai i alo ma fanau. O ni faaiuga e faia i totonu o le faamasinoga lenei, ia i ai se agavaa o le toatele o le aufaigaluega e mafai ona gafatia le galuega o le tulituliloaina ina ia mautinoa ai o lo o mautu le agaga na fai ai faaiuga i totonu o le Faamasinoga lea o Aiga.

O le agaga lena lau Afioga i le Fofoga Fetalai, e fia faamauina le agaga faafetai ma se tuualalo ina ia atoatoa le aoga o le tatou Tulafono Tau Faaofi ua i ai nei i le tatou Maota. Faafetai tele mo le avanoa.

**FOFOGA FETALAI:** Malo faafetai saunoa. Se i tulai mai le sui usufono mo Gagaemauga Nu.2.

**Tofa LEVAOPOLO TALATONU (Gagaemauga Nu.2):** Faafetai i lau Afioga i le Fofoga Fetalai. E leai e puupuu lava foi so matou lagona i lenei mataupu taua. E faafetai atu lava i le Afioga i le Tamaitai Minisita, e taua le Tulafono Tau Faaofi ona o le tulimataiina o le saogalemu o aiga ma tulaga faapena.

Ae pau lava se lagona lau Afioga i le Fofoga Fetalai, a o gatasi loa le faatauaina ma le amanaia o le soifua saogalemu o aiga ma le fesoasoani foi i aiga i le tulaga o le faatinoga o le Tulafono Tau Faaofi, e pei ua manaia atu lena. O aso ia lau Afioga i le Fofoga Fetalai, o le uiga o sau faamatalaga, sa i ai lava fale faamasino foi nei i totonu o itumalo sa au i ai le auunaga a le Matagaluega. Pe le mafai i lea tulaga ona faalautele atu le auunaga i le vaega lea, faapea foi lele pe fia ni mataupu i i le itumalo o Falealili, ona atofa lea o se aso e fai uma ai ae malaga uma i ai Faamasino ma nisi foi e faia le mataupu, ina ia fesoasoani i le tulaga lava ia o le saogalemu o aiga ma le faaaluina o latou seleni i le tau malaga mai i Apia.

18 MATI 2014

**Tulafono Tau Faaofi o le Faamasinoga mo Mataupu Faatatau i Aiga  
2013 – faitauga faalua**

O lona lua lau Afioga i le Fofoga Fetalai, po o i ai la se auaunaga faapena i le motu tele i Salafai, aua o lea e foliga mai e toatasi lava le ua tofia tonu i le vaega lea, ae o lo o i ai foi nai mataupu faapena i Salafai e tatau ona au i ai le auaunaga. Faafetai.

**FOFOGA FETALAI:** Malo faafetai saunoa. Malie le sui usufono mo Aana Alofi Nu.3 sei lafo i lea Itu o le Maota.

Tulai mai se tasi o sui usufono mo Falealili, Tofa Tusa Misi Tupuola ona sosoo ai lea ma le sui usufono mo Aana Alofi Nu.3.

**Tofa TUSA MISI TUPUOLA (Falealili):** Faafetai lava i lau Afioga i le Fofoga Fetalai mo le avanoa. E faatulou atu foi i le paia o le Palemene ua potopoto i leni taeao. Ae ou te tulai atu foi ma le agaga faaaloalo e avatu ni manatu e tusa o le Tulafono Tau Faaofi e pei ona saunoa i ai le Afioga i le Tamaitai Minisita.

O le manatu lau Afioga e fia tuuina atu, ona o lo o i ai nisi o popolega agai i le tulaga lea i Faamasinoga o Mea Tau Aiga. E taua aiga, pei lava o le mau e masani ai lau Afioga ma le mamalu foi o le Palemene, o aiga, o manuia ia o nuu, a lelei aiga ua manuia le Ekalesia, a lelei aiga, ua manuia foi alo ma fanau a le Ekalesia. E pei la o le taua lea lau Afioga i le Fofoga Fetalai ona o le tulai mai o leni Tulafono Tau Faaofi mo Aiga i totonu o le atunuu. Ae o lo o i ai se vaega foi e taua ai lau Afioga i lou manatu le Tulafono Tau Faaofi, ou te faafetai i le Afioga i le Minisita ma le Matagaluega, ona o se tofa ua ae ua mafai ai ona faatulai leni mataupu po o leni Faamasinoga, ona o le tele o nisi alo ma fanau a le atunuu ua mafua ona o ese ona o fevesiaiga ma misaaga i totonu o aiga. Ona aumai lea o tamaiti nei ua ave solo ae lei faia i ai se iuga a le Faamasinoga po o le a le tulaga o nei tamaiti, alo ma fanau laiti lea o lo o tulai mai. Aua o lou lava talitonuga ma lau vaai i ai, o le tele o nisi tamaiti nei e feaveai solo i nisi aiga ma mea faapena, e lei i ai ni poloaiga e faamaonia e le Faamasinoga e faamaonia ai le latou order of custody o tamaiti nei. O la e pei ua feoai solo lava, ae a tutupu mai la faalavelave i se taimi mulimuli, ia o ai o le a tua i ai faalavelave nei lau Afioga.

O le tasi itu ou te lagolagoina ai le Tulafono Tau Faaofi leni, o se Tulafono Tau Faaofi e tatau ona vave loa, e le tatau ona umi pei o le faiga lea e fai ai le Matagaluega o Faamasinoga e tai fia vaiaso pe tai fia masina faatoa faalau lea Faamasinoga. Ae a toe tulai mai loa ni vevesi i totonu o aiga, ua tatau loa ona foia nei, aua a tuu nei, ou te le iloa la po o le a le uiga o le Tulafono Tau Faaofi. Ae na o se fautuaga lau Afioga ma le mamalu o le Palemene i lau Afioga i le Minisita ma le Matagaluega, pe le ua tatau loa ona toe vaavaai e toe fai a tatou Faamasinoga i tua, district court lea e masani ona fai i tua ona o sao lava lea o latou i afioaga ma itumalo e fai ai Faamasinoga nei ina ia vave ona foia ai faafitauli o mea nei o aiga.

18 MATI 2014

**Tulafono Tau Faaofi o le Faamasinoga mo Mataupu Faatatau i Aiga  
2013 – faitauga faalua**

E pei o lau tulai atu lea ma le faaaloalo e avatu ai nai motugaafa e fesoasoani ai. Ae ou te lagolagoina le Tulafono Tau Faaofi. Ma lou faaaloalo lava.

**FOFOGA FETALAI:** Malo faafetai mo le saunoaga a le sui usufono mamalu. Tulai mai le sui usufono mo Aana Alofi Nu.3.

**Afioga TOEOLESULUSULU CEDRIC POSE SALESA SCHUSTER (Aana Alofi Nu.3):** Faafetai i lau Afioga i le Fofoga Fetalai mo le avanoa. Ou te tulai atu, muamua e avatu le faamalo ma le faafetai i le Afioga i le Minisita, ae le gata i lea o le Pulega o Faamasinoga i le tapenaina o lenei Tulafono Tau Faaofi ua matuai ou lagolagoina le faatinoina o lenei Tulafono Tau Faaofi.

Lau Afioga o le vaega e atili ona ou lagolagoina ai lenei Tulafono Tau Faaofi ona ua loa foi tausaga o tatou tagatagai ma outou silasila pea i nusipepa ma news i le tele o aafiaga i totonu o aiga a o alo ma fanau. Ou te talitonu o se tasi lenei o vaega taua ua ae ai se tofa i le Matagaluega aemaise o le Vasega o Faamasinoga e ao ona tapenaina se Tulafono Tau Faaofi faapenei.

E faamauiina foi le agaga faafetai i le Minisita ma le Matagaluega o Faamasinoga ona ua amatamea. E ui ina o lea e faatalanoaina le Tulafono Tau Faaofi, ae o lea ua maea ona latou tofiaina se Faamasino faapitoa mo lea vaega. O lea foi ua tapena ua maua ua uma ona fai aoga faapitoa ina ia maea atu le Tulafono Tau Faaofi, a ua lava tapena le Vasega o Faamasinoga ina ia faatino le Tulafono Tau Faaofi.

Lau Afioga na pau se vaega e avatu ai tuualalo lau aFioga i le Fofoga Fetalai ona o lea ua faatino le auala e mafai ona foia ai, ae o le naunautaiga ina ia mafai ona fesoatai, ia aua faatoa oo i totonu o le Faamasinoga faatoa fofo ai, ae le gata o le Vasega o Faamasinoga, a o Matagaluega ma le Pulega ma Faalapotopotoga taitoatasi foi i totonu o le atunuu, ia mafai ona galulue e fesoasoani i totonu o aiga aemaise o fanau ina ia mafai ona faaitiitia le oo atu i totonu o le Tulafono nei aafiaga.

E pei ona taua foi e le Afioga i le Minisita se tasi o galuega ua faatino e le Pulega i le faia lea o le mediation. E talitonu le agaga lau Afioga, faafetai ua vaaia foi nisi o i latou sa faatasi ai. O le tuualalo i totonu o afioaga ma alaalfaga, e pei lava o Susuga i Faafeagaiga, o i latou nei o lo o faapea ona oo i ai ma toai i ai faalavelave po o feeseeseaiga i totonu o aiga, pe ao ona silasila totoa i le lumanai i ni aoaoga ina ia mafai foi ona maua e i latou i nuu i tua aemaise lava i latou e le gata o Pulenuu, o Sui o le Malo ae le gata i lea o Faifeau, ina ia maua foi e latou lo latou tomai e mafai ona fesoasoani ai ina ia faaitiitia ia ituaiga faalavelave a o lei oo mai i totonu o le Faamasinoga. O se fesoasoani lea lau Afioga i le Fofoga Fetalai.

**FOFOGA FETALAI:** Malo faafetai fesoasoani i le tatou mataupu.



18 MATI 2014

**Tulafono Tau Faaofi o le Faamasinoga mo Mataupu Faatatau i Aiga  
2013 – faitauga faalua**

O le a tuu atu le avanoa mulimuli mo le Afioga i le sui usufono mo Falelatai ma Samatau ma se tasi o sui usufono mo Salega, Afioga Afualo Wood Uti Salele ona tali ai lea o le Minisita.

Tulai mai lau Afioga i le sui usufono mo Falelatai ma Samatau.

**Afioga TAEFU LEMI (Falelatai ma Samatau):** Lau Afioga i le Fofoga Fetalai, e fia avatu foi se motugaafa a lenei itumalo e tusa ai o le Tulafono Tau Faaofi. Lau Afioga ona ua ou taua lou itumalo, ou te faanoi atu lava sei momoli nai faamafanafanaga ma nai faamaisega i si ou itumalo aua le valaau paia a le Atua i se tasi o faaaloaloga o le tatou nuu, le Afioga Lupematasila. Ou te faamaisega atu ai i le faletua faanoanoa ia Fiasili aemaise foi le Afioga Misa ma le paia o le aiga. Ia maua pea le lototele ma le mafanafana, ma ia tatou pea ia maua se nofoaga mau o le Afioga i le faaaloaloga ia Lupematasila i le nuu o lo o taufaisinio uma i ai i tatou uma nei.

Lau Afioga i le Fofoga Fetalai, na pau lava lou faanoanoaga i le Tulafono Tau Faaofi lenei, ua leva ona tatau ona fai, ua leva ona tatau ona fai le Tulafono Tau Faaofi lenei a o lei faia le Juvenile Centre la e i Oloamanu. Ia paga lea ua muamua tatou agai ua tele a tatou tamaiti ma solitulafono e aafia ai, ae ua fai foi le Olomanu Centre lea i o, a o lea ua faatoa aumai le Tulafono Tau Faaofi.

Ou te tulai atu la e momoli lau faafetai i le Afioga i le Minisita mo Faamasinoga ma Pulega tau Faamasinoga, leaga o lea ua tulai mai le Minisita na te taulagalaga ma fai le Tulafono Tau Faaofi lenei, ua leva lava ona tatau ona fai. Faafetai foi i le Minisita o lo o lagolago i le Minisita o tulai mai ona o le taulagalaga ma le faamaitemea ua fai ai le Tulafono Tau Faaofi lenei. Na pau lena o se manatu.

**FOFOGA FETALAI:** Tulai mai le Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoui:** Lau Afioga i le Fofoga Fetalai, o lea e te faafofoga mai o lea e talie mai le Itu Agai ona o le Minisita Lagolago la e saunoa e faanoanoa, o le Minisita Lagolago i le Matagaluega o Faamasinoga. O le a e toe faanoanoa a o le a le mea na e le vave ai i i ma ave i ai lau fautuaga? O Minisita Lagolago uma lava, aua tou te nofonofa, e le o ni agelu foi nei e tauavea. A i ai loa ni fautuaga, vave mai i Minisita semeamanu ua leva lava ona aumai. O lea ou te tilotilo atu i le Minisita mo Faamasinoga ma Pulega Tau Faamasinoga, o lea faatoa aumai lava lea o sau fautuaga.

**FOFOGA FETALAI:** E leai o le faamaninoga o le finagalo o le sui usufono loau Afioga i le Palemia, e faanoanoa fiasia. O lea e faanoanoa toe fiasia o lea ua talanoa le Tulafono Tau Faaofi i le taeao nei. Sei tulai mai le sui usufono mamalu mo Falelatai ma Samatau.

18 MATI 2014

**Tulafono Tau Faaofi o le Faamasinoga mo Mataupu Faatatau i Aiga  
2013 – faitauga faalua**

**Afioga TAEFU LEMI:** Ia o le agaga faanoanoa fialia lena lau Afioga i le Fofoga Fetalai ona o lea ua tulai mai ni toamanumanu e nafa ma le vaega o le tautuaina o lea vaega o le tatou Faamasinoga. O lea ua fai le Tulafono Tau Faaofi faavae le Faamasinoga lea, ae pei ua tautuauega ua muamua faavae le tatou Centre i tua i Olomanu. Faafetai tele i le Afioga i le Minisita ma le faamoemoe o lo o faavaeina ai le tatou Tulafono Tau Faaofi lenei, o se mea ua leva ona tataua ona fai. Sa tataua ona fai e isi Minisita, a o lea faatoa oo i ai se fuafuaga a Minisita ma Minisita Lagolago o lo o i ai i lenei taimi. Ia manuia le Fono lau Afioga i le Fofoga Fetalai.

**Tofa Lealailepule Rimoni Aiafi:** Lau Afioga i le Fofoga Fetalai, o le mea fia faasao lau Afioga.

**FOFOGA FETALAI:** O le a le mea e fia faasao lau Afioga i le sui usufono mo Faleata Sisifo?

**Tofa Lealailepule Rimoni Aiafi:** Leai ou te faanoanoa lava i le le malamalama o le Minisita Lagolago i ona tiute la e fai. O Olomanu e ese lava le mea na faavae ai o mea o criminals, mea o solitulafono foi nei ogaoga. O i ia e pei o mea tau family courts. Ma le faaaloalo lava.

**FOFOGA FETALAI:** O lou lava lena finagalo le sui usufono mo Faleata Sisifo, ae taatia pea le saunoaga a le sui usufono mamalu o la e sao le faamalalamalama. O le tele o cases la e i Olomanu, o family cases. O lona uiga o lea ua muamua le taavale solofanua ae mulimuli le solofanua. E ui i lea, e faapena lava le aluga o le tatou savaliga, o nisi foi taimi ua televave mea tutupu, ae ala ona fau Tulafono ona o mea e tulai mai. Faafetai le sui usufono mo Falelatai ma Samatau.

Ia malie sei tulai mai le Afioga i le Palemia. Ia, toe tasi lava le saunoaga toe o se tasi o sui usufono mo Salega, Afioga Afualo Wood Uti Salele ona tuuina atu lea o le avanoa i lau Afioga i le Palemia. Tulai mai le sui usufono.

**Afioga AFUALO WOOD UTI SALELE (Salega):** Faafetai i lau Afioga mo le avanoa, e fia faamauina foi le agaga faafetai o Salega i le Afioga i le Tamaitai Minisita ma le Matagaluega ona o lenei Tulafono Tau Faaofi taua. Mai lava i le amataga, o le foafoaga o mea nei o aiga o lo o lotolotoi i totonu o le foafoaga a le Alii. Ia o le mau foi a nisi Ekalesia, e faavavau mea nei o aiga. O le galuega o lo o faatinoina ma galueaiina i tua i aiga e le gata i nuu aemaise Ekalesia, e moni lava o lea ua faataoto mai Tulafono e 10, o lea ua aumai ai taiala mo i tatou, Aua e te mulimua, Ia e ava i lou tina ma lou tama e faalevaveina ai ou aso, ma isi vaega la e i ai o le Tulafono.

18 MATI 2014

**Tulafono Tau Faaofi o le Faamasinoga mo Mataupu Faatatau i Aiga  
2013 – faitauga faalua**

A o le aoga lea, o lau faafetai e faafetai faapitoa i le Tamaitai Minisita ma le Matagaluega ona o lea ua taoto mai i totonu o le Afioga a le Atua taiala mo i tatou, a o lea ua toe silasila i tua atu o taiala ina ia mafai ona mautinoa lelei ua maua e mea nei o aiga Samoa le saolotoga ma le filemu lea tatou te anau nei i ai. Aua ua matua le maua se malologa e fai o le ao a o le po e le gata i tua i aiga, a o lea tatou te molimauina lava. A o le fatu atoa o nei mea uma, ina ia mautinoa lelei ua fesootai ma fiafia ia le amataga o aiga e amata mai i ulugalii. O lou popolega la i ai i le Tulafono ma le Faamasinoga, ina ne i te i ua oo atu le lima malosi o le Faamasinoga i tofaga o le atunuu. Ina ia silasila lelei i ai lau Afioga, ina ia mautinoa lelei ia puipuia ia vaega ia i tua aemaise lava o la e i ai pulega mamalu a alii ma faipule, aemaise foi o ekalesia o lo o feagai ma le ola faale-Agaga o aiga. Ia ae faafetai tele lava mo le Tulafono, o se Tulafono Tau Faaofi e lelei. E tatau ona tatou lagolagoina ina ia mautinoa lelei, ua lelei faatino ia le taoto mai o le pulega o aiga aemaise lava le lumanai o le tatou atunuu, aua o mea nei o aiga, o i e tua i ai. Faafetai i lau Afioga i le Fofoga Fetalai.

**FOFOGA FETALAI:** Malo faafetai faasoa. Ia lafo atu i lau Afioga i le Palemia mo lau saunoaga ona tuu atu ai lea e talifuaiteu le Minisita.

**Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fetalai e na ona faaopoopo atu, o lena ua sausaunoa sui usufono, faamalo i le Minisita ma le Matagaluega i le latou tapenaga. O lea foi ua uma ona sausaunoa nisi o le Tulafono ua leva ona tatau ona fai, ae a silasila foi i le Tulafono, o le Tulafono Tau Faaofi lena e faaulutala o le Tulafono 2013, o lona uiga na aumai lava ia Ianuari o le 2013. Ae tele lava mea e fai i ai, e faaliliu, ia ona faasolosolo mai lea i le mauga o Tulafono ia e faasolosolo mai. O lona uiga la e le faapea o le tuai, ua leva lava ona i ai le tatou Tulafono. E le faapea foi o se Tulafono e falala atu fua i isi mea, a o le manaia ia o le Tulafono lea ua matua faataoto mai lava e pei ona saunoa le Afioga i le Minisita, o mea tonu lava ia e tagofia, mea e masani ona tutupu mai i le va o ulugalii, ae manatua foi o mea lava na, o lea foi e i ai le tatou lava Tulafono o pulega mamalu a alii ma faipule, e fai lava pulega mamalu a alii ma faipule latou i tulaga o le agaifanua, ia o mea lava e aafia ai Tulafono a le Malo, e le tuua, e tatau lava ona faatino. A oo i le taimi e fai ai faaiuga a Faamasinoga, ia e mulimuli atu lava i tulaga masani, o le taulealea lea ua uma ona fai lana sala i le lē popoi i le afafine ma le fanau, ua uma ona fai lana sala, ia ona logo foi lea o le Faamasino, ona faapea mai foi lea o le Faamasino, ia o le a aoai lē sa tatau ona 20 tausaga e loka ai oe, ae o lea o le a tuu atu na o sina fitu. O lea lava e i ai auala e faatino ai.

18 MATI 2014

Tulafono Tau Faaofi o le Faamasinoga mo Mataupu Faatatau i Aiga  
2013 – faitauga faalua

A o le taua o le Tulafono, o le puipuia o vaega ia, aemaise lava sei silasila ane, te i foi ua laaloa ai se, o lea lava ua oooo i ai le tofa maualuga i mataupu lava nei i lalo o mea o faasalalauga, faasalalauga lava nei o mea o tualumaga, o lea foi ua faataoto mai i i e le Tulafono ia le tulaga o le faautautaga tatau e faatino ai le galuega a o faagasolo, ia e i ai lava mataupu e faaeteete i ai, aemaise lava pe a aafia ai fanau laiti, ma o le taimi e faasalalau ai, aua o mea nei o faasalalauga ua tatou malamalama lelei i ai, o isi a tatou leitio ia e fiafia tele i le vave ona fesilisili po o ai? Sau loa le faasalalauga, o le igoa o le fanau laiti. Ia o tamaiti la nei a iloa nei ae ave i le aoga, o le a avea na tamaiti ma faalumalumaina i luma o le aoga ia ma le nuu. O le mea la lena e taua tele ai le puipuiga o le tauleleia o aiga, o lea ua oo foi i ai le Tulafono o lea ou te matau atu, e le i oo i ai ia se saunoaga foi a sui usufono o le Maota lenei, ae ne i te i foi ua alu atu i tua ae sasapala mai ai le Tulafono. Ae mo mea o puipuiga o mea nei o aiga, a o lea foi e i ai le avanoa o lo o tau mai lava i le 10(e), e i ai lava le faatagana e ave mo mea o reporters news media faapitoa, a auai i totonu o mea o tualumaga, ia e le taumatea o le a faatonutonu lava e le Court mea e tatau ona alu, ae taofi lava mea nei o igoa, ona o le taua tele o le puipuiga o le tauleleia o mea nei o aiga.

O le isi itu lau Afioga ne i te i ua i ai ni atugaluga, o lea lava e taoto lava i lalo o le 18 ia le tulaga foi lea mo mea o Tulafono Faatonutonu e faatonutonu ai galuega a le Faamasinoga, aemaise lava le taimi lenei e le gata i Faamasinoga Maualuga ae faapena foi i le Faamasinoga o Fanua ma Suafa, ia o nisi o Faamasinoga ua fia tausaga o faatali le atunuu. O lea la ua sausaunoa ia nisi o outou, e tatau ona vave, ma o mea na o lea lava o lo o i ai le avanoa i lalo o le 18 mo mea o Court Rules, e mafai ona agai i ai ia mafauauga ina ia faataoto ai ni taiala e faatino ai galuega a le Faamasinoga e amata atu i i se taimi e faataoto mai ai foi mea ia o Tulafono Faatonutonu, ona amata atu ai, ona o le isi lea faafitauli o lo o faafeagai nei ma le Faamasinoga, o le fai fai o Faamasinoga uma, ae fiu e faatali ni Iuga. O isi Iuga ua ova i le tolu tausaga o faatali e lei aumaia lava ni Iuga, e aofia ai e le gata i Faamasinoga o Suafa, a o le Faamasinoga foi o Solitulafono o Faamasinoga Maualuga. O itu la na o lea lava e faasolo malie i ai mafauauga a le Malo, ona ua oo mai foi ia te au ia manatu na, a o lea e maua lava avanoa i le taimi e faatino ai i lalo o Regulations a o faagasolo ia galuega faapenei, Tulafono Faatonutonu ia e ono amata ai i se taimi oi luma ona faataoto atu ai faapena e fesoasoani foi i le Faamasinoga latou, atonu e lagalaga ai foi po o le le o toe moomia nisi Faamasino, ia o mea na mo le agai i luma ma le faaleleia o le tatou galuega.

Lau Afioga i le Fofoga Fetalai, o le toe faaopopo atu lena i nisi o vaega ia e aumai manino i totonu o le Tulafono, ae ou te faalogologo atu e lei oo mai i ai a outou saunoaga ina ia outou silafia ai le tele o le galuega sa faatino e le tamaitai Minisita ia ma le latou foi Matagaluega.

18 MATI 2014

**Tulafono Tau Faaofi o le Faamasinoga mo Mataupu Faatatau i Aiga  
2013 – faitauga faalua**

**FOFOGA FETALAI:** Malo faafetai fesoasoani mai i lau Afioga i le Taitai o le Malo, ua faamanino ma faamalamalama nisi o mataupu aua le faalauteleina o le taua na tuuina mai ai lenei Tulafono Tau Faaofi i le Maota. Ae tulai maia lau Afioga i le Minisita e faaiu maia le saunoaga, po o i ai nisi mea e toe fia faamalamalama?

**Afioga Hon FIAME NAOMI MATAAFA:** Faafetai lava i lau Afioga i le Fofoga Fetalai. Ou te faafetai foi i sui usufono o e sa saunoa, ma ou te manatu i le agaga lava o le felafolafoaiga o le faaalua o finagalo ma taofi e faalolotoina ai foi ia le malamalama i le Tulafono ma fautuaina ai foi ia nisi manatu e fatufatu atili ai le faaleleiga o so o se Tulafono e faatulai mai i lea taimi ma lea taimi.

Ae e i ai lava nisi o faafesili po o mataupu sa laga ou te fia tautala puupuu i ai. Ma o le fesili lea, pe o lava o mataupu ua faavae ai se Faamasinoga Faapitoa? O le tali lau Afioga, i, ua lava mataupu. Pe manatua e le tatou Maota sa pasia le tatou Tulafono foi lea o le Saogalemu o Aiga – ma e atonu o se tasi lea o Tulafono o le a autu i ai le tele o galuega a le Faamasinoga lenei. Ma e afua mai e pei foi ona sauai nisi o finagalo faaalua, e faatupulaia pea le tele o solitulafono i totonu o aiga i le sauaina o tina aemaise foi o a tatou fanau – ma o le mea moni lava o le itu lea ua uunaiina ai le Faamasinoga, ina ia tapenaina ia le Faamasinoga lenei, ma a faapea e mafai ona tatou talanoa i feagaiga tuai faale-Tulafono ma feagaiga fou, o le feagaiga tuai faa-Faamasinoga i mea nei o moliaga i soligatulafono i totonu o aiga po o nisi lava....aemaise lava soligatulafono i totonu o aiga, pei sa i ai se tulaga e puipui e le Tulafono lē na faatupua ia le faalavelave po o le perpetrator, ona o le agaga foi lea e tauleleia lava le tagata ma lana amiotonu vagana ua fai se faaiuga a le Faamasinoga e faamaonia ai lana soligatulafono, innocent until proven guilty, ae peitai, e avea lena vaaiga aemaise lava i mataupu nei tau eseesega ma sauaga i totonu o aiga, ua pei ua ave i ai se faamamafa e puipui ia i latou sa faatupuina lenei ituaiga solitulafono ae leai se faamamafa ia i latou o e ua aafia victims. Ma e ou te talitonu, o le isi itu taua lava lea o le tatou Tulafono o le saogalemu o aiga ina ia tutusa le vaaiga a le Tulafono i ana faiga faagasologa o Tulafono ia faapea ona tutusa le puipui o i latou o lo o aafia. Ia ae le aveesea ai lava le agaga lea o molimoli mai pea i le Tulafono e saili pea ia auala e toe faafoi ai i se faaleleiga po o le foia ai o ni feeseeseaiga tuga o lo o tulai mai i totonu o tatou aiga. Ma o se tali puupuu atu lena i le tatou mataupu lena, pe o lava mataupu, lava ma totoe. Ae ina ne i te i ua faatupu i so outou finagalo po o se tatou mafauauga e faapea, po o a nei mau Faamasinoga Faapitoa ua faavae? O le mea moni lava, e tasi lava le tatou Faamasinoga i ona vaega esee. O le autu o le faatulai mai o Faamasinoga Faapitoa ina ia faatupu ma faamaopopo se tino galue o lo o faasino i lea mataupu ma lea mataupu e faafaigofie ai ona faafoe e le Faamasinoga, a body of work, po o mataupu tau aiga, po o mataupu tau autalavou.

18 MATI 2014

**Tulafono Tau Faaofi o le Faamasinoga mo Mataupu Faatatau i Aiga  
2013 – faitauga faalua**

O a lava isi soligatulafono ua amata ona faatulai mai ma ua foliga mai o se mea ua faatupulaia, o le tapenaga lea a le Faamasinoga ina ia mafai ai ona faafaigofie ona tali atu i le tulai mai o ia mataupu, ina ia faamaopoopo ia faamatalaga o Tulafono o ala o mea, ina ia le tau faapea a tupu lava le faalavelave faatoa saili lea i le Faamasinoga lea o le a nafa ma ia ia le mataupu, pe faapena foi ona tapena agai i ai le aufaigaluega. Ae peitai a maopoopo ia le vaaiga i tulafono e pei o le Tulafono lenei, e faafaigofie ma vave foi ona tali atu le Tulafono i mataupu o lo o tulai mai.

E taua le mataupu sa laga mai e le tamaitai sui usufono mo Faasaleleaga Nu. 1, Afioga Hon Gatoloaifaana Amataga Alesana Gidlow mai le mea lava lea o le faamalosi o faaiuga a tatou Faamasinoga. E le o se mea fou lea, o fea o i ai nifo o le malosi o faaiuga o le Faamasinoga e faataunuu ai. E pei lava ona silafia e lau Afioga ma le mamalu o le Maota, ia o le Tulafono lava ia e fai le faaiuga a le Faamasinoga, ae i ai isi Lala o le tatou Malo e faapea ona faatinoina ma faamalosi le faaiuga ua fai. O gaioiga foi a le Malo lea ua galue ai nei i tulaga tau Lala po o Sectors, ia o le isi agaga lea, aemaise foi i lenei Lala o le Amiotonu ma Tulafono, Law and Justices taumafai lea i le fesootaiga o vaega eseese o le Faamasinoga, o Leoleo, o Falepuipui, ia ma isi foi Faalapotopotoga i tua atu o le Malo o e o lo o lagolago i galuega tau i le Tulafono ina ia mafai ai ona fesootai lelei ma molimoli atu ia taunuuga lelei i mataupu tau Faamasinoga. Ae ou te manatu o se lui tele lea mo tatou, aua o le a ea le uiga, e pei ona saunoa mai foi nisi o sui usufono, o le a le uiga o tatou Tulafono, o le a le uiga o faiga o faaiuga? Ae le mafai ona tatou tuliloaina ia faaiuga ma faamalosi faaiuga ua fai.

Na saunoa nisi o sui usufono i le tulaga lava lea o le faaoo atu o le auaunaga i tua, ia e le fou foi lea mataupu sa laga mai foi e o tatou sui usufono. Ae i le tulaga lava ia o le Faamasinoga lea o mataupu faatatau i aiga i le fesili lea sa faatulai mai, pe oo i Savaii? Ioe, e oo i Savaii aua o le taimi nei o lo o i ai le Faamasinoga Faaitumalo i Savaii, o lea foi Faamasinoga, o lo o i lalo o le faamalu lautele o le Faamasinoga Faaitumalo, ma e faapena ona faaoo atu ai le auaunaga i le tatou motu i Salafai. Ua tatou talanoa i le District Court, ona ou mafaufau lea i le ata tifaga foi lea o le Back to the Future, ua tatou toe tepa i tua i le mea sa tatou omai ai. Ma e i ai lava mafuaaga sa faapena ona faagasolo ai tatou Faamasinoga i tua, aua o lenei taimi sa faafaigata ona feafioai le atunuu. I lenei taimi, ua tatala atu o tatou auala, ua tau le mafai ona feoai i luga o auala i le tele o pasi ma loli ma taavale, o lea lava o lo o i ai le auala e mafai ai ona autovaa mai le mamalu o le atunuu i mea o lo o faatulaga ai tatou Faamasinoga i nei i Upolu i le nofoaga i nei i Mulinuu ma Savaii i le nofoaga i Tuasivi.

18 MATI 2014

Tulafono Tau Faaofi o le Faamasinoga mo Mataupu Faatatau i Aiga  
2013 – faitauga faalua

O le maopoopoga foi o se auaunaga o le mafai ona i ai o se nofoaga lelei o lo o i ai uma vaega o le auaunaga, aua a faasavali nei, o le tele o le tau ma le taugata ma tulaga faapena e fuafua i ai le tatou auaunaga ma le faasoa foi o le tamaoaiga i le mea e ave i ai le faamuamua.

E taua se tasi o mataupu sa faatulaga mai i le agaga lava lea o isi auala e foia ai faafitauli, lea ua taua ai tatou alternative dispute resolution po o tatou mediators foi, ae i ai le mataupu foi lea o le vave pai atu o se fesoasoani, early intervention lea o lo o taua ai a tatou Faafeagaiga, tatou nuu, tatou tuaoi, o Faalapotopotoga o lo o i ai tomai faapitoa mo le foia o faafitauli faapenei, ou te manatu o le isi itu taua lava lea i le faasologa o nei ituaiga mataupu o le mafai ona vave oo atu se fesoasoani, oo atu se upu faamafanafana, oo atu se laveai, early intervention e mafai ona foia ai nisi o ogaoga po o taunuuga o ia ituaiga faalavelave. Atonu o le mataupu lea sa laga mai e se tasi o sui usufono mo Salega, Afioga Afualo Wood Uti Salele, pei o le popolega lea ina nei afaina le privacy. O lea sa ou tau pue atu e leo malu tele le sui usufono e tau le lagona lelei atu, ae faapea nei tei ua aapa tele atu lenei Tulafono Tau Faaofi i tofaga o le atunuu.

Ia, lau Afioga i le Fofoga Fetalai ma le mamalu o le Palemene, o outou lava o tama ma tina o le atunuu, o le faafesili aemaise lava i faalavelave i totonu o aiga, le upu foi lea e tau o le domestic disputes. O le tele o vaaiga faaletulafono i domestic disputes po o faalavelave i totonu o aiga e faapea, e tataua ona papuipua e le tataua ona oo atu i ai le Tulafono ona e tapu, ona o aiga nei, e le tataua ona oo atu i ai le malosi faaletulafono.

Ae peitai, lau Afioga i le Fofoga Fetalai ma le mamalu o le Palemene, i le ogaoga o taunuuga o saunoaga i totonu o aiga, lea ua oo ina aapa atu le Tulafono, e le gata o Samoa nei, a o le lalolagi. This is the international trend. Ua teena lea mafauaiga e faapea e sa taputapu lio o le aiga e le oo atu i ai le Tulafono. A o le a le uiga o le Tulafono ma tatou ua tatou tusilima tatou te ola ma soifua i le Tulafono? E i ai tagata e oo i ai puipuiga a le Tulafono, ae i ai tagata e le oo i ai le puipuiga a le Tulafono? Aemaise lava la mataupu i totonu o aiga, aemaise tina ma a tatou fanau. O le tau faapapalagi, o i latou nei o le vaega e vulnerable, e vaivai. A le oo atu la se fesoasoani mo e vaivai, o fea le mea e tuu i ai le Tulafono ma lona amiotonu? E pei foi ona ou talanoa atu muamua i le fauina o le tatou Tulafono Tau Faaofi o le Family Safety Act po o le Saogalemua o Aiga, o lea ua ave tutusa le puipuiga mo itu uma o le Faamasinoga, o i latou na faatupuina le faalavelave ma i latou ua afaina ma aafia i se faalavelave.

O le saunoaga a le Afioga i le Palemia, ou te talitonu e le gata i le faalauteleina o le matuapu, ae faapea foi ona talifuaitau atu le Afioga i le Palemia i nisi o vaega taua o tapenapenaga ina ia faaleleia pea le auaunaga. Aua o vaega ia o le Tulafono Tau Faaofi sa taua e le Afioga i le Palemia, e lua ona maga, o le rules ma le regulations.

18 MATI 2014

**Tulafono Tau Faaofi o le Faamasinoga mo Mataupu Faatatau i Aiga  
2013 – faitauga faalua**

O rules o le vaega lea o Tulafono e faatino e le Vasega o Faamasinoga, e faatulaga mai e latou pe faapefea ona faagasolo se faiga o se Faamasinoga. O regulations, e faafoeina ma o le matata lea e nafa ma le vasega o le Pulega.

Ou te faafetai tele i le lagolago mai o le Minisita Lagolago, e sao ia, ua tuai tele lenei mea ua leva ona tatau ona fai, ae tau lava ina ou faamanatu atu, o Olomanu pei ona... e moni ua faavae Olomanu, ae aua nei galo o lea foi ua taatia le tatou Tulafono Tau Faaofi o le Faamasinoga Faapitoa mo Tagata Talavou.

Lau Afioga i le Fofoga Fetalai, taatia atu ia lenei Tulafono o lo o Tau Faaofi i ala masani a le tatou Fono sei silasila foi le tatou Komiti o e nafa ma tatou Tulafono Tau Faaofi, e le gata foi i lea o le avanoa e autovaa mai le atunuu e aumai so latou finagalo e uiga i le Tulafono Tau Faaofi ua faataatia i luga o le Laulau a Fono. Ma lou faaloalo lava.

**FOFOGA FETALAI:** Malo faafetai i le saunoaga malamalama a lau Afioga i le Minisita mo Faamasinoga ma Pulega Tau Faamasinoga. E manatu ua talatala ma le la lou finagalo, ma ua manino foi le mata o le vai ma ua toa le tai. O finagalo foi ma manatu ma lagona sa saili i ai le faautautaga a sui usufono mamalu na sausaunoa, ua manatu le Fofoga Fetalai ua manino ma malamalama le mataupu e ala i lau faatofalaiga.

*Na faamaonia le lafo ma faitauina le Tulafono Tau Faaofi o le Faamasinoga mo Mataupu Tau i Aiga 2013 i lona faitauga faalua.*

**FOFOGA FETALAI:** E tusa ai ma le Tulafono Tumau o le a tuuina atu le Tulafono Tau Faaofi i le Komiti o Mataupu Tau Faamasinoga, Leoleo ma Falepuipui ma le Faamasinoga o Fanua ma Suafa mo le toe iloilo ma toe lipoti mai i le Fono Aoaofaitulafono i le Fonotaga o lumanai.

E manatu ona o lea ua tatou taunuu tonu i le tatou taimi malolo. E momoli atu le faafetai tele i le paia ma le mamalu o le tatou Maota i lenei taeao ona o le onosaia o le taamilosaga muamua o le tatou aso faatulagaina. Ae faasilasila atu o lo o i ai se faaloalo o lo o gafataulimaina ai le gasecina o taumafa i lenei taeao i le Maota. O lo o i ai se tamalii mai Siamani, o ia o lo o foaiina mai ni meaalofa taua mo le Pulega o Tine Mu. Sa ia foaiina mai le taavale ambulance mo le tatou Matagaluega, ae o lenei taeao ua faaopoopoina mai lana foai i se mea e tau o se kitchen, mobile kitchen. O lona uiga o le ituaiga umukuka foi lea po o a taimi o faafitauli, e fetosoai i le atunuu e mafai ona fafaga ai tagata e toafa i le toalima afe i le taimi e tasi. O lea la na talosaga mai le Afioga i le Minisita mo le Soifua Maloloina ona o se foai taua, e tatau foi ona molimauina. Ona ou talosaga lea i ai, e manaia pe a sau sei kuka le tatou taumafagata i le taeao nei ma sauni tulaga uma leaga o lea e faaletonu le tatou umukuka.



18 MATI 2014

**Tulafono Tau Faaofi o le Faamasinoga mo Mataupu Faatatau i Aiga  
2013 – faitauga faalua**

O lea la ua taunuu mai ai le faaaloalo a leni tamalii mai Siamani, o tagata lelei tagata mai Siamani. O lona uiga e faaauauina pea le latou tautua mai nei tausaga e tele.

O le Susuga ia Wolfgang ma o ia o se alii Siamani ua faafesootai atu i le Amepasa, ma ua faaalua lona agaga foi pea mo Samoa, ma e faaalua i le faaaloalo i leni taeao, e maitau atu o lea ua taatia i tuafale i le fale e lufilufi ai taumafa lana faaaloalo, ma o le a tatou molimauina.

O le a faataatia ese Tualumaga a le Fono Aoaofa Faitulafono mo lana malu o le taeao.

*Na faataatia ese Tualumaga a le Fono Aoaofa mo lana malologa masani i le itula e 10:47 i le taeao ma toe faaauau i le itula e 11:30 i le taeao.*

**FOFOGA FETALAI:** Ou te faasilasila atu ua toe amata nei Tualumaga a le Fono Aoaofa Faitulafono. E manatu o lea ua tatou taunuu i le vaega mulimuli o le tatou Fonotaga i leni taeao. E momoli atu le agaga faafetai tele i le paia ma le mamalu o le tatou Maota e ala i la outou faatofalaiga i le taimi ua sola ma le taeao analeila. E talitonu ua tele ma anoanoai le tatou galuega ua maea ona faatinoina, ma e manatu foi o lea ua matu i fau le taliga o le sua, palega auau foi le tauteaga aua leni aso ma le faaaloaloga a nisi foi o a tatou Malo alolofa mai, aemaise o nisi o tamalii ua tuuina mai ma ua tatou molimauina leni tulaga taua i leni vaega o le aso.

Ua tatou see mai i le faaauauina o le tatou Galuega i le Tulafono Tau Faaofi Nu.12.

**TULAFONO TAU FAAOFI O TEUTEUGA O LE TULAFONO O LE  
FAALAPOTOPOTOGA FAAVAE TAU FATUGAO A SAMOA  
2013 – faitauga faalua**

**FOFOGA FETALAI:** Mo le silafia e le Palemene, o le Tulafono Tau Faaofi leni sa faia lona faitauga muamua i le Aso Fono 24 Ianuari 2014. Tulai mai lau Afioga i le Minisita mo le Soifua Maloloina.

**Afioga Hon TUITAMA TALALELEI TUITAMA (Minisita mo le Soifua Maloloina):** Lau Afioga i le Fofoga Fetalai, ou te talitonu o lea ua palega auau le taliga o le sua, ua sao i alo foi le faamalosiga o le tino i le la Itu o le Maota faapea foi leni Itu o le Maota, ae tainane foi le tapuaiga mamalu a Ofisa Sili o Pulega o Matagaluega ma sui o Matagaluega o lo o tatou mafuta i leni taeao. Ae le tuua ai foi le tapuaiga mamalu a lo tatou atunuu o lo o tapuai mai aua le faatinoina o ou faiva ma o matou tiute.

18 MATI 2014

**Tulafono Tau Faaofi o Teuteuga o le Tulafono o le Faalapotopotoga  
Faavae Tau Fatugao a Samoa 2013 – faitauga faalua**

O lea e momoli atu ai le agaga faafetai tele i lau Afioga i le Fofoga Fetalai.

Ae le gata foi i lea lau Afioga i le Fofoga Fetalai, e ao lava ona avea foi se leo i leni taeao ona o lea ua tomua ia te au ona fai o se tala. Ia e faaoo atu ai le agaga faafetai tele i le Afioga i le tatou uo, paaga o lo o tuutuu mai foi le tauau e lagolagosua i a tatou galuega fai mai Siamani, le Afioga ia Wolfgang. Aua a silasila lau Afioga e le gata ina tatou molimauina i le aso le aoga tele o leni foi foai o le mobile kitchen lea pei ona ta feiloai ai i le aso ananafi ma ou faaoo atua le agaga fia tuutuu mai o le tauau o lo tatou uso nei mai Siamani, ae ou te talitonu foi ua talafeagai i le aso nei ona tatou talia leni meaalofo ma ia tatou faamanatuina ai foi, aua o le tausaga leni e atoa i ai le 100 tausaga talu ona tuua e Siamani lo tatou atunuu. O lea la ua taua ai tele le foai i leni taeao ona e le gata o le taavale e feaveai ai gasegase le ambulance lea na tuuina mai ananafi, a o leni foi fesoasoani tele lea ua tuuina mai e fesoasoani mo tulaga e faafuaseia ai i ni afa po o mala faanatura e manaomia ai se fuafuaga vave aua le tausiga mo i latou o le a galulue i nofoaga e faatino ai lea faamoemoe. Ou te tautala atu ona o le tasi leni Matagaluega sa feagai ma le vaaiga o le soifua manuia ma le sologa lelei o le soifua o i latou sa aafia i le tsunami. E atoa le lua i le tolu vaiaso o faagasolo galuega i lea nofoaga, a o le tasi lea itu sa matauina sa faigata tele ona faatino, o le gasegase o taumafa aua le mamalu o i latou na galulue fesoasoani ma i latou foi sa aafia i aafiaga o lena foi mala faanatura ogaoga sa feagai ma lo tatou atunuu na maumau ai soifua o le toatele.

Lau Afioga i le Fofoga Fetalai, e fia faamauina foi le agaga faafetai o leni itumalo i le Afioga ia Wolfgang mo leni faamoemoe, atoa ai foi ma le aao mafola e fesoasoani mai ai i lo tatou atunuu. Ua ou matauina foi i leni aso ma lou vaavaai atu i le matagofie o le taliga o le sua ma le faamalosiga o le tino, ua tutupu ae ai foi lagona. Tailo i ai i le faautautaga i lau Afioga i le Fofoga Fetalai, ae ou te manatu o le nofoaga talafeagai foi leni e faaaogaina ai lea foai, ae se i vagana ua oo i ni aso ua manaomia ai le tuuina atu i tua, ona ave foi lea i tua ae faaoga e lo tatou Maota nei. E fetuunai lava e lau Afioga i le Fofoga Fetalai ma e o lo o vaaia ma tuuina atu i ai leni meaalofo.

Lau Afioga i le Fofoga Fetalai, ua ou tulai atu ma le faaaloalo tele ou te faatuina le lafo, *Ina ia faitauina nei le Tulafono Tau Faaofi o Teuteuga o le Tulafono o le Faalapotopotoga Faavae tau Fatugao a Samoa 2013 i lona faitauga faalua ma ou te fia tautala faamalamalama i ai.*

*Faaluaina e le Minisita o Tupe, le Minisita mo Faatoaga ma Faigafaiva, le Minisita mo Aoga, Taaloga ma Aganuu ma le Minisita mo Punaoa Faanatura ma Siosiomaga.*

**FOFOGA FETALAI:** Tulai mai lau Afioga i le Minisita e te saunoa faamalamalama.

18 MATI 2014

Tulafono Tau Faaofi o Teuteuga o le Tulafono o le Faalapotopotoga  
Faavae Tau Fatugao a Samoa 2013 – faitauga faalua

**Afioga Hon TUITAMA TALALELEI TUITAMA:** Lau Afioga i le Fofoga Fetalai ma le mamalu o lenei Fonotaga, o lenei Tulafono Tau Faaofi na faavaeina i le 2005. Ia manatua foi o le tausaga lea na amata ai ona le toe faaauuina le faamamaina o toto o a tatou gasegase ua afaina fatugao i Niu Sila, o lea na fai faanatinati ai le tulaga i lenei auaunaga i totonu o lo tatou atunuu. O lea na faatuina ai loa le fale faamama toto ma faavae ai loa le Tulafono lea ua taua nei o le Tulafono Autu.

Ua fai la sina leva o faagasolo mai galuega i le Tulafono e ui ona o lea sa faanatinati ona tapena i le vaitau lea, ae ua leva foi ona tatau ona i ai ni suiga i le Tulafono lenei, ae peitai, ona o le tulaga ese o lo o i ai le auaunaga lenei i totonu o Samoa aua ona pau lava lenei o le atunuu o le Pasefika o lo o faatino ai le auaunaga lenei. Sa taumafai foi e nisi atunuu ae e le i mafai ona faaauau. O lo o iloilo foi e le tele o nisi o atunuu o le Pasefika pe tatau ona faatu pe leai. E toatele foi nisi ua malaga mai i o tatou atunuu tuaoi e fesiligia, sailiili ma matamata i le faatinoga o le tatou auaunaga lenei ma fuafua pe talafeagai, pe gafatia ona latou faatinoina le auaunaga lenei. Peitai ane la, o lea e oo mai lava i le aso ona pau lava lea o le atunuu lea e faatino ai le auaunaga lenei.

Mo le silafia, i le tapenaga o le faatinoina o le auaunaga lenei sa galulue faatasi i ai ma tuu mai ai le fesoasoani a isi Matagaluega mo le faatinoga o lana Komiti Faatonu faapea foi ma tagata faigaluega. O le ala lea o lea sa i ai avanoa ma vaega ia e tatau ona faatinoina, lea na oo mai ina ua fai le fuafuaga e toe tilotilo totoa i le faatinoga o suiga o faiga faavae a le Malo, a o lo o tumau pea lava le tatou auaunaga lenei i le tulaga tuai. O le ala na tuai ai ona faatino ia fuafuaga ona sa mataitu pea pe ua tai oo i se taimi, pe ua talafeagai ona tauave pea le auaunaga lea ma tumaoti i sona tulaga e pulea ai lava e ia lava.

I le tilotilo la i ai ma le matau i lenei vaitau, na amata mai le tatou auaunaga na o le toaono gasegase, a o le taimi lenei ua oo atu i le 75 gasegase o lo o faaaogaina nei le auaunaga lenei; ma le vaega foi lea e faatalitali o lea e lata atu i le 300 i latou. O lea foi la ua amata ona tilotilo le Matagaluega ma le auaunaga lenei i le faatuina o ni nofoaga e faatino ai le auaunaga i falemai i tua.

E pei ona silafia, o lea ua i ai le auaunaga i Salafai mo i latou o i ai i Salafai. O lo o amata foi ona vaavaai i isi falemai i tua i Upolu pe ono mafai ona faatino ai le auaunaga lenei. Aua o le faatinoga o le auaunaga lenei, o lo o faatino lava e gasegase latou ia masini e faatutu solo i nofoaga talafeagai i totonu o le atunuu, ona faagasolo lea i ai o gasegase e o atu lava latou faatino a latou faamama, ona toe o lea o latou e fai a latou galuega. A fealuai fealuai foi afai ua tau mamao mai ma le falemai o lo o i ai, a o se isi fale o latalata ane i ina e agai i ai e faamama ai le toto ina ia aua ne i toe tau sau i le nofoaga mamao e faatino ai le auaunaga lenei.

18 MATI 2014

**Tulafono Tau Faaofi o Teuteuga o le Tulafono o le Faalapotopotoga  
Faavae Tau Fatugao a Samoa 2013 – faitauga faalua**

Lau Afioga i le Fofoga Fetalai ma le mamalu o leni Maota, ua agai atu pea le auaunaga leni i se tulaga e manaomia ai le toe faatetele o fale e faatino ai le auaunaga ma toe manaomia ai le toe faaopoopoga o ni masini faapea foi ma ni tagata faigaluega. Ua taua la ia itu lau Afioga i le Fofoga Fetalai mo le faatinoga o ia tulaga ina ia talafeagai ma le Tulafono, o lea ua manatu ai le Pulega ma le Matagaluega ua i le taimi ua tata ai loa ona aloaia suiga o faiga faavae a le Malo mo Komiti Faatonu o Faalapotopotoga Tumaoti a le Malo lea ua aveesea ai Minisita ma tagata faigaluega a le Malo i le avea o sui i totonu o Komiti Faafae. Ma le tasi lau Afioga i le Fofoga Fetalai, ia aloaia ai foi le i ai o ni tagata faigaluega tumau a le Faalapotopotoga aemaise o le tofiga o se Pule Sili. E puupuu lava la manaoga o le Teuteuga leni o le Tulafono ua tuuina mai i totonu o le Maota e faia i ai se finagalo.

O le Fuaiupu 1 o leni Tulafono Tau Faaofi ua aiaia ai le Igoa Puupuu ma le Amataga.

O lona Fuaiupu 2 ua teuteuina ai le Fuaiupu 7 e faapea: Muamua, o le Fuaiupu 7(2) o le Tulafono Autu lea o lo o taua ai le fuaitau o le faafuaiupu 13 ia suia i le Fuaiupu 7E fou ua fuafuaina.

Lua, o le Fuaiupu 7 o le Tulafono Autu mo le faafuaiupu (3) e oo atu i le (15), ia suia i faafuaiupu fou (3) ma le (4) ua fuafuaina, ae vagana ai ua aiaia e faapea; ua iloiloina e le Kapeneta ni taiala fou pe a oo ina fautuaina le Ao o le Malo e uiga i se sui auai fou o le Komiti Faatino o Faatonu.

Tolu, o le Fuaiupu 7B fou ua aiaia ai mo le avanoa o le tofi o se Faatonu.

Lima, o le Fuaiupu 7C fou ua aiaia ai mo Tulafono faafae ia e faaoga i se fonotaga a le Komiti Faatino.

Ono, o le Fuaiupu 7D ua aiaia ai mo alauni o Faatonu.

Fitu, o le Fuaiupu 7E fou ua aiaia ai mo le tofiaina o le Failautusi o le Komiti Faatonu.

O le Fuaiupu 3 ua suia ai le fuaiupu 8 o le Tulafono Autu; ma le

Fuaiupu 4, ua aiaia ai mo mataupu tau soloaiga mo tagata faigaluega ma le Failautusi o lo o galue i le taimi nei mo le Komiti Faatonu.

Lau Afioga i le Fofoga Fetalai, o le faapuupuuga lena o le Teuteuga ua manaomia i totonu o leni Tulafono Tau Faaofi, ae e mafai ona ou avatu sina faamatalaga puupuu i le amata mai o le Faalapotopotoga.

Na faatino ina ua faamuta e Niu Sila le feagaiga ma Samoa i le togafitia lea o gasegase o fatugao mai Samoa. O se taumafaiga fou le atinae leni i totonu o le Pasefika i Saute ma e oo mai i le taimi leni, na o Samoa lava ua faia ai leni togafitiga e le aofia ai atunuu o lo o pulea e Amerika e pei o Tutuila. O le amataga sa faaoga ai e le Malo tomai faapitoa mai Matagaluega ma Faalapotopotoga a le Malo e tau faavae ma galueaiina le NKFS po o le National Kidney Foundation of Samoa. E tele tausaga o tau silasila le Malo pe mafai ona faaauau leni auaunaga ma fuafua pe o le a le tulaga tau pulega talafeagai e faaauau ai.

18 MATI 2014

### Lafo mo le Suia o Itula Fono

O le masina o Me 2015 e atoa i ai le 9 tausaga talu ona faavae lenei auunaga, ma e manatu le Malo, ua talafeagai le tumaoti loa o lona Pulega ma faaauau loa ana galuega e aunoa ma le toe faalagolago i isi Matagaluega ma Faalapotopotoga a le Malo.

Lau Afioga i le Fofoga Fetalai, o lona le otootoga o le lafo faatu aua leni Tulafono Tau Faaofi o Teuteuga o le Tulafono o le Faalapotopotoga Faavae tau Fatugao a Samoa 2013. Ma lou faaaloalo.

**FOFOGA FETALAI:** Malo faafetai. Ae lei tuuina atu le avanoa mo felafolafoaiga, e faamalulu atu i le Maota o lo o i ai le lafo i le Afioga i le Palemia ona o le taimi faatulagaina o a tatou galuega. Tulai mai lau Afioga i le Palemia.

### LAFO MO LE SUIA O ITULA FONO

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai, ou te tulai atu e faatu le lafo leni ona fai ai lea o sina au faamatalaga e faaopoopo atu e faamalalama atili le fesoasoani atu e toe faaopoopo atu i le saunoaga matagofie a le Minisita.

Ou te tulai atu e faatu le lafo, *Ina ia suia itula Fono i itula nei: 9:00 i le taeao i le 1:00 i le aoauli, ona toe amata lea i le afiafi mai le 7:00 i le 11:00 i le po.*

O nei itula e amata atu i le asō e le natia lau Afioga i le Fofoga Fetalai, a ou tilotilo lelei i le Polokalame, se i vaai i le mafiafia o le Polokalame o Fono ia, oka, oka. E tatau lava ona faauma mea nei i le Fonotaga leni ma e leai lava se mea e toe tuua. O Tulafono Tau Faaofi uma lava ia e i ai iinei ma Lipoti uma nei, o le a faauma i le Fono leni. Ua tupu ae le fia fono lau Afioga i le Fofoga Fetalai, ua mafua ona ua vaavaai atu i le mafiafia o le mea lea. A le faia le mea leni, o lona uiga ua atili ai ona tele a tatou galuega tuua ma e alu ai ma le vaiaso lea. O le uiga lena o le lafo, ae talu ai ona e matau atu o nisi o outou ua matutua toe malulu tele le fale nei, ia sau le tagata ia ma afifi mai lona palanikeke nanei ne i te i ua faavaveina atu se isi i le tatou naunau fono, a o le mea foi lea ua pisi le faamai mata.

O lona uiga la lau Afioga i le Fofoga Fetalai, o le agaga lena. O le a faaalu uma a tatou galuega uma. O le ala lena o lea e talosaga atu ai ma le agaga fiafia ina ia faaauau le tatou Fono i le 7:00 i le 11:00 i le po seia oo lava ina uma le tatou Polokalame.

*Faaluaina e le Sui Palemia, Minisita o Tupe, ma le Minisita mo le Soifua Maloloina.*

*Na faamaonia le lafo.*

18 MATI 2014

**Tulafono Tau Faaofi o Teuteuga o le Tulafono o le Faalapotopotoga  
Faavae Tau Fatugao a Samoa 2013 – faitauga faalua**

*Na toe faaauau felafolafoaiga i luga o le faitauga faalua o le Tulafono Tau Faaofi o Teuteuga o le Tulafono o le Faalapotopotoga Faavae tau Fatugao a Samoa 2013.*

**FOFOGA FETALAI:** Tulai mai lau Afioga i le Palemia.

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai, e tasi lenei Tulafono taua tele, ona e foliga e faigofie a o le mea moni lava o lea ua siitia le tatou falemai mo Fatugao i le isi laasaga mauuluga. Ua ou taua lea itu, ou te faamalo atu ai foi i le Afioga i le Minisita ma le latou Matagaluega, ona o le gasegase lenei o le fatugao e le o agai i lalo ae o lo o faateteleina pea.

Pe a toe tomanatu i le 2005 na faaulufale mai ai le Tulafono ma faatu ai le falemai lenei faapitoa mo gasegase fatugao, na o le toafa ea tatou mai la e togafiti i Niu Sila, ae alu ai le tatou \$5miliona Niu Sila, o le matautia lena o le gasegase lenei. Ma latou uma na ave i Niu Sila e togafiti ai ua le toe mafai ona toe omai i aiga, sa fesoatai ai le tatou Malo ma le Malo o Niu Sila ina ia fai se faiga faapitoa e mafai ai ona maua a latou nofomau, ona e tai tolu aso ma togafiti. O lona uiga la i le tai tolu aso, e faatolu i le vaiaso ona tui e faamama le toto.

O tulaga ia na mafua ai ona tapa e le Malo ia le Minisita o le Falemai, o le a tataua ia ona faatu se tatou falemai mai le taimi o le Afioga ia Misa, sa sailiili ai le Afioga i le Minisita ma maua mai ai i le fesili atu i le tau ma tau mai o le faatinoga o le mea lea i Tutuila le falemai lea i Tutuila e faatino e le Malo o Amerika, ae \$40miliona e faatino ai i le tausaga.

O le mafuaaga lena sa toe faatonuina ai e le Kapeneta ia au ma Minisita o le Kapeneta sa i ai le Minisita o le Falemai ina ua sui le Paeaiga ua Minisita le Tofa i le sui usufono le Tofa Hon Mulitalo Siafausa ua tuu i ai le avega lea, ona malaga faapitoa ai lea o Mulitalo ma Director i lena taimi le Afioga ia Lolofie e sailiili maua mai i Ausetalia le fesoasoani le kamupani e mafai ona latou faia. Ae tau mai le tau, e AUSS\$40miliona.

O le matautia o lena mea ma le tulaga e ono aafia ai lo tatou Malo, e taulamua ai lava fomai i le aumaiga o le ata ma faaali ai le ata lea faapitoa o le faatinoga ma le fautuaga, ‘aia ne i faia se Maota Fatugao e le gafatia e Samoa,’ ona toe taofi ai lea o lena foi faamoemoe, ae sa galue pea Mulitalo e fesoasoani i ai ma le tatou fomai o lo o nafa ma le vaaia o tatou gasegase i Niu Sila le susuga ia Papalii Benjamin.

O le tulaga la na tulai mai i ina i mea o fesoataiga faapitoa, o i la na feiloai ai Mulitalo ma le Minisita o le Singapore Kidney Foundation, SKF e faaoga foi e tatou ia initials na e faaigoa ai tatou, SKF.

18 MATI 2014

Tulafono Tau Faaofi o Teuteuga o le Tulafono o le Faalapotopotoga  
Faavae Tau Fatugao a Samoa 2013 – faitauga faalua

Ona talanoa ai lea ma le Minisita o le lipoti na aumai, na ona amata lava o le feiloaiga lea tutulu loa ma Mulitalo, tutulu ai lava Mulitalo ua le mafai lava tapa ifo loa Mulitalo i lona ofu sisi ae i luga soloi ai mata, ua tagi ai foi ma le tamaloa ia Singapore le Minisita, ma faatonu ai loa lana Director, ‘aua ne i toe aumai ni tagata tagivavale faapenei,’ fai le mea lea e manao i ai le Minisita lea. O lena la na maua ai le tatou... i se tau taugofie, ona faatonuina ai lea o mai i Niu Sila, e omai iinei o le a togafiti i Samoa nei. E lei fia omai i le amataga, ae ina ua iloa mulimuli ane, e sili atu le fou o a tatou masini ia na aumai i Sigapoa nai lo Niu Sila, o lena la na omai ai loa. E oo mai la i le taimi lenei, ua ova i le....se pei lava toeitiiti oo i le 100 ua togafiti i uta, ae sa na o le 4.

O le mea lea ua i ai, o lea pei ua ova i le 200 tagata ua lavea i le mai lea ua afaina o latou fatugao. Muamua atu, o le tele lava o taimi a sau loa lava ua....ia ona tui lea e le fomai i na ona aso sa leai ni tau togafitiga, ia ona fai loa lea isi toeaina, ia o lena ua uma lou tiga ua uma foi ma lou mai, ona uma lea o le tiga, ia e le umi lava ae uma le soifua. Ae mafai e le togafiti lea ona faaauau pea lou soifua. E i ai le isi Siamani na ou feiloai i ai i lau malaga na ou alu i Siamani, e tatala le Museum, fai mai le tamaloa, o lou tama ua 97 tausaga o la lava e treat lava e togafiti lava lona gasegase lona fatugao. O lona uiga, e mafai lava ona faaumiumi lou gasegase fatugao pe a toaga e alu e fai le mea lea. E i ai le isi Samoa i Hawaii, e i ai le mea na fia alu i ai, ona alu atu loa tui, e tatau ona atoa ea se fia itula o e malolo, ae na o ni nai minute lava alu loa, e lei leva lava ona i le taavale ae uma le soifua. E i ai le isi tagata ua lele mai fafo i le taimi lena, ona sau lea iinei, o lona tolu ai o aso sa tatau ona i ai i uta, ae toe oso i le vaalele alu i Niu Sila. Sa tatau o le Samoa o lo o paralyze i Niu Sila, ona sau lea i le vaalele o le lona tolu o aso na toe tuli ai Niu Sila e musu e paralyze i uta, na ona alu ese lava ma le vaalele i Aukilani savali atu lava loa i totonu, se i tulou le Maota, e agai i le fale le taua, ua fiu lo latou aiga e faatali, e alu atu ua uma mai i totonu o le potu ona o le tulaga ua faatamala sa tatau ona fai lona togafitiga iinei.

O le mea la lea ua i ai nei, talu ai le tatou Falemai lea ua i ai, ua faigofie ia o tatou tagata o le atunuu i fafo ona malaga mai ma fesootai mai, faamolemole faaavanoa ifo e fia maua se faatagana e fia togafiti au i ina, o lea la ua uma foi ona fai le iuga a le Kapeneta, e tuu i ai le discretion le pule faitalia i le tulaga o le tofa mamao i le Afioga i le Minisita e silasila lelei i a tatou tagata ia mai fafo, ina ia ave foi i ai le faatagana – ma o lea foi la ua faafaigofie foi mo le mamalu i Savaii lea foi ua faatu le falemai o Fatugao i Savaii, pei lava o le tausaga ea lea na faatu ai ina ua uma ona aumai le mataupu i totonu o le Kapeneta ma avatu ai le faatagana. I le taimi la o lea ua amata ona faaopoopo pea ma faaopoopo pea le toatele nai lo le toafa lea sa mai i Niu Sila, o le mafuaaga lena ua tatau nei ona matua siitia le tulaga o le galueaiina o le tatou falemai o Fatugao, ina ia ave le tautua i lo tatou atunuu.

18 MATI 2014

**Tulafono Tau Faaofi o Teuteuga o le Tulafono o le Faalapotopotoga  
Faavae Tau Fatugao a Samoa 2013 – faitauga faalua**

E le natia lau Afioga i le Fofoga Fetalai, o e lava e gasegase i le fatugao e amata atu i le mai suka, ia po o latou foi e le taofiofi le tausami, e le lava le faagaioi i le tino. O le ala foi lena o lea e fai ai ma le isi polokalame a le tatou falemai, polokalame lea o lo o faasalalau atu i le atunuu, ina ia puipui ai le soifua maloloina o le uunaia o o tatou tagata e faagaioi le tino ina ia taofiofi ai le gasegase lea o le fatugao ona ua toatele tele tagata ua aafia ai, ae o le taimi lenei mo le tala fiafia, ia o lena lava e silasila i ai outou o le Komiti o Faamatalaga o Tupe a le Malo, na o le \$5miliona le vaegatupe lea o lo o i ai i le Tala o le Tupe mo le faatinoga o fuafuaga ia. O lo o talia foi i latou o lo o fia saosao mai mo togafitiga ona e le taugofie togafitiga, ae peitai, o lea ua i ai le potu masani i o tatou fomai. Sa leai muamua, a o lea ua i ai i latou ua avatu i fafo ma toe taliu mai ma o lea ua tatau ai ona siitia le falemai mo fatugao i se tulaga maualuga e mafai ai ona vave togafitiga mo nai o tatou tagata, ma saga faaopoopo ai pea le soifua faafualeva o tatou tagata ua gasegase ona o taumafa.

Lau Afioga i le Fofoga Fetalai, e aoga foi le faamalamalamaga a le fomai, le Minisita mo le Soifua Maloloina ma lana Tulafono e faamalamalama ai ma lapataiga mo i latou uma o lo o faafogafoga mai, ona o masini ia na o le pau lava le mai la e togafiti ai, o fatugao, ae e le togafitia ai lou fatu. O lona uiga e tatau lava ona uunaia lou toaga e vaai lau taumafa ma toaga e faagaioi le tino aua o lea ua togafiti oe iinei, ae a e soona taumafa pea ma e le vaai lelei i au fualaa o le fatu, ia e le fesoasoani la le masini lea ia te oe. O lea ua fofu fatugao, ae a oti le fatu ona e faavaveina ai lea i luga i le ola e faavavau ae e le i lava le tapenaga.

Lau Afioga i le Fofoga Fetalai, o le toe faaopoopo atu lena i le faamalamalamaga matagofie a le Minisita ma lana Tulafono.

**FOFOGA FETALAI:** Malo faafetai le faaopoopo mai i le saunoaga faamalamalama a lau Afioga i le Palemia.

O lea ua avanoa le Maota mo felafolafoaiga e ala i le Tulafono Tau Faaofi. E toe faamanatu atu i sui usufono mamalu, e le o le Tulafono Autu lenei a o le Tulafono Tau Faaofi Toe Teuteu, ina ne i mea ane ua agai mai sui usufono e toe talau uma mai mea tau fatugao, a o le faamalamalamaga o le faatauaina o le Tulafono Tau Faaofi lea na tulai atu ai le Malo ma le Minisita, ae agai tonu mai saunoaga i Teuteuga o le Tulafono Tau Faaofi aua e puupuu lava.

Tulai mai le sui usufono mo Gagaemauga Nu 2.

**Tofa LEVAOPOLO TALATONU:** Faafetai i lau Afioga i le Fofoga Fetalai mo le avanoa. Sa usi lava le faalogologo a o tau faamatala ma tau faamalamalama si tamai Tulafono a le Minisita mo le Soifua Maloloina ma le Afioga i le Palemia. Sa faalogologo lava ma le totoa ona e pei e sao ai le saunoaga a lau Afioga i le Fofoga Fetalai, na o le lua lava fuaiupu o le Tulafono ae ua lua faamalamalamaga ma ua tele ai lava ni o matou manatu e faaali i le Tulafono Tau Faaofi lenei.



18 MATI 2014

**Tulafono Tau Faaofi o Teuteuga o le Tulafono o le Faalapotopotoga  
Faavae Tau Fatugao a Samoa 2013 – faitauga faalua**

O le matau ma le totoa i le faamalamalama a le Minisita mo le Soifua Maloloina, e pei faatoa toe maua lava masalo o le 30 minute, e oo loa i le 29 minute lana saunoaga ae faatoa maua tonu lava lana Tulafono na aumai o le suiga ma le faia o le Faatonu Sili ma tulaga faapena.

Lau Afioga i le Fofoga Fetalai, o le lagona i le vaega lea ua toe sui ai le mea lea, o lea ua toe siitia foi iinei le isi vaegatupe e faaagaga i le auunaga lea i le faamamaina o fatugao. E maitau atu foi i le saunoaga a le Minisita e na o Samoa lava e i ai le auunaga leni. O le fesili lea aua ua tutupu mai lagona ia te au, o le a tonu la le sao o le mea lea pe afai na o Samoa? O le mea muamua e na o Samoa e gafatia le tulaga lea o le faia o se auunaga faapea, ma lona lua pe ua na o Samoa ua matua tetele ai le gasegase lea pe a fua i ai i le tatou vaavaai ma la outou silasila? O le a le mea ua numera tasi ai Samoa i le faamamaina o toto? O lona uiga ua matua malosi le gasegase i Samoa nai lo isi atunuu o le Pasefika?

Ona pau le isi mea lea ou te faalogologo atu i ai o le faia o le tatou falemai faamama toto ua encourage ai i ina le tatou atunuu e faifai pea le mea lea o le taumamafa i meaai le paleni ma tulaga faapena, ae ua tuu ai le sasaa o a tatou seleni i a tatou polokalame ia o le prevention, aua o i ina tonu lea e tatau ona matua sasaa i ai lo tatou malosi ina ia aua ai ne i alu nisi tupe i le faiga o tatou falemai faamama toto, ma tuutuu mai i lalo a tatou tupe faaalua i gasegase o lo o avatu i fafo.

O le isi itu e ao ona silasila totoa i ai lau Afioga i le Minisita, o meaai tuuapa ia e aumai i atunuu i fafo, aemaise lava taumafa ia e aumai i atunuu o Asia. O le tele o na taumafa e le o i ai ni label faa-Peretania e mafai ai ona malamalama lelei le tatou atunuu i le select ina o a latou taumafa e tatau ona i ai aua na o le maua mai lava o taumafa ua faaletonu. O le tasi lona vaega e tatau ona silasila i ai lau Afioga i le Minisita, a o le mea taua lea ua ou toe faamanatu mulimuli atu ona e le logo malie i leni itumalo lau saunoaga faapea na o Samoa ua i ai le vaega lea. O lona uiga ua tele le faaletonu i le tatou atunuu. Faafetai mo le avanoa.

**FOFOGA FETALAI:** O lea o le a tali atu le Minisita mo le Soifua Maloloina i le faasaoga o lana saunoaga. Ua na o Samoa ua i ai le fale fatugao e sili ona taugofie. O le faamalamalama lena a le Minisita, ae se i tuu atu pea le avanoa.

Malie lau Afioga i le Minisita se i tuu pea le avanoa e aumai fesili ona tuu atu loa lea o le avanoa e te tali ai.

Tulai mai le sui usufono mo Gagaifomauga Nu 1.

**Tofa TUILOA ANETELEA (Gagaifomauga Nu.1):** Faafekai mo le avagoa aua e seasea maua. O lea ua maua i lelei aso ma ou ke fia kaukalo i le makaupu lea a le Migisika mo le Soifua Maloloiga.

18 MATI 2014

**Tulafono Tau Faaofi o Teuteuga o le Tulafono o le Faalapotopotoga  
Faavae Tau Fatugao a Samoa 2013 – faitauga faalua**

Ou ke auai i loga figagalo, ae ou ke kalosaga aku oga o le faamai lea o fakugao, ua sosolo e le koe mafai oga kaofi. E kalosaga aku ona e fai siga mamao o makou, o lea ua auguua i kokogu o Apia kalu ai le fale faamama koko lea e i uka. O le agaga lea o lou kulai aku oga o makou foi o la e i ai le falemai, ae po o le a sou figagalo ae ia alofagia e fesoasoani mai i legei guu aua koekiiki akoga le kausaga o ou lavea i uka i le fale faamama koko. Ou ke le ma e kau aku, masalo na o au lava lea e i kokogu o le Palemege legei ua ou aafia i le mea lea. O le mea e makegakega a o loga kulai mai e aafia ai le kagaka ola, ae ou ke kau aku ia alofagia o le makou falemai e pei o le falemai la e i Chicago. Gi gai masigi lava se lua e kuu i ai, aua a e gofo i Safoku ae e kausavali mai i Kuasivi, e ke sau ua leai sou koko ua masaa i le aualakele, ae ou ke kalosaga aku po o le a sou figagalo mo lenei vaikaimi o le olaga. O lau mau aga leai le fale faamama koko la e i Mokookua, ua uma le kakou akuguu. Ua keke kagaka e aafia i legei mea o fakugao, koko maualuga ma le mai suka, ae ou ke kau aku i kokogu o le Maoka legei ua ou aafia ai ma ou ke le ma e kau aku, ua ave au ma kaulogologo. O le akuguu legei o Samoa, a le logologo ua keke iga feoki, a o le mea ga ala ai oga ou sau i le falemai lea e i uka oga ua ou magaomia se fesoasoagi, ae ga ou malaga i Giu Sila ona ou alu lea i le falemai, ae ga faakeia au i kala a loomakukua Samoa ga fai mai po o fea ga ou alu i ai, ae ou fai i ai ga ou alu aku e faamama lou koko i Niu Sila, ae ke i ua fai mai le kala a le fafige, “O lega mea aua le faamamaina lou koko, o le mea lega o le faamama o le koko a faamama nei oga e gofo lea ua leai sou koko, ae ua e fealua ae ua e oki.” Ga ou koe sola mai i Giu Sila i igei, ga ou sau loa i igei ou alu ia Ben ma maua ai le faamakalaga e faamama lou koko. O lea la ua i ai i le kaimi legei ma ua ou oo i ai, e leaga le mea e magaia. Ga o ka faapea o le a o ka oki, ae ga faamama loa lou koko i le aso e kasi, ou koe faalogo aku ua ka ola. E pei o le mea lega, ae e kolu aso o le vaiaso e faamama ai lou koko, o le Aso Gafua, Aso Lulu ma le Aso Faraile. O le magaia ia i le faalogologo, e ke fiu e moe i kokogu o le falemai. O lea ou ke kalosaga aku ai i gi gai masigi lava se lua e ave i le makou falemai i Safoku iga ia faaoga i le makou guu, aua o le makou guu ua ou vaaia ua ae ai le faamai lea. O lea foi ou ke vaai aku i lo kakou Maoka gei, e koakele i lakou vaeaku lava, ua kakau oga o e faamama koko. A le faamamaina koko ia pe kipi ese le ulu.

Ia alofagia mai e le Akua le kakou kalagoaga i legei aso ia maua se kakou kasi aua le kakou akuguu ma laga faafogafoga mai. Ia maguia le aso.

**FOFOGA FETALAI:** Malo - o le tatou talosaga na latalata ona talia a o le a le talia talu lau saunoaga, ae faafetai atu i manatu faaalua o le sui usufono mamalu.

Tulai mai le sui usufono mo Faasaleleaga Nu 4.

18 MATI 2014

**Tulafono Tau Faaofi o Teuteuga o le Tulafono o le Faalapotopotoga  
Faavae Tau Fatugao a Samoa 2013 – faitauga faalua**

**Afioga PESETA VAIFOU TEVAGA (Faasalelega Nu.4):** E momoli atu le faafetai tele i lau Afioga i le Fofoga Fetalai ona o le avanoa ua maua e lenei sui usufono e faaalua ai se taofi i lenei Tulafono Tau Faaofi e pei ona talanoaina. E momoli atu ai le lagolago ma le faafetai tele i lau Afioga i le Minisita m le Soifua Maloloina ona o lenei Tulafono Tau Faaofi, ona o le tasi lenei Tulafono Tau Faaofi e molimaaina ai lava le eseese o tupe faaalua mai lea atunuu i lea atunuu pe a fuafua i tupe o lo o faaalua nei i totonu o le falemai i Motootua.

E matua lagolagoina lava e lou nei sui usufono le tulaga ua i ai le Tulafono pe a fua i tupe o lo o totogiina e pei o Amerika Samoa ma Niu Sila i pili ia o i latou o lo o totogiina e i latou o lo o fia faamamaina toto. Masalo e foliga mai e \$10.00 le pili o lo o totogi atu i uta pe a faamama ai lona toto. A fua i Amerika Samoa ma isi atunuu e \$200 Amerika. A fua mai i le tulaga lea ua fuafua i ai le Matagaluega mo lea siitaga, o se tulaga ua matua lagolagoina e lenei sui usufono aua o lea foi sa talanoaina le health promotion i mea lava ia o lo o tulai mai i meaai e tatau i lea taimi ma lea taimi, ae afai o le tulaga lea e le o i ai se taiala ina ia faamalosi ai le health promotion, o lona uiga e iu lava foi i le faamama o le toto. O lea ou te tulai atu ai e lagolagoina le Tulafono Tau Faaofi ona i lau matau pe a fua i tupe faaalua, ou te matua lagolagoina lava le fuafuaga ua i ai a le Matagaluega.

Ma lou faaaloalo lava.

**FOFOGA FETALAI:** Malo faafetai saunao. Tulai mai le sui usufono mo Faasalelega Nu 2.

**Susuga PAPALII LIO FAAVAIVAIONA TAEU MASIPAU:** Faafetai i lau Afioga i le Fofoga Fetalai mo le avanoa. O le agaga lava ia e fia faasoa foi i le taua o lenei Tulafono Tau Faaofi ua faatulai mai, i suiga a le Afioga i le Minisita mo le Soifua Maloloina. Talu ai ona o lenei itumalo i Tuasivi ua filifilia e lau Afioga i le Minisita ma le Matagaluega mo le tatou fale faamama toto i Savaii, o le agaga lena e momoli atu ai le faafetai tele o lenei itumalo, malo faafetai mo le filifilia o lenei itumalo mo le tatou falemai faamama toto i le motu i Savaii. E pei lava ona lauga i lenei Maota Fono i le tele o taimi, o lenei lava itumalo o lo o tautua lava i le tatou Malo i le tele o matata e oo foi i Falemai, Matagaluega o Leoleo ma le Matagaluega o Faamasinoga. O le agaga faafetai lea o lenei itumalo i le tatou Malo ma fuafuaga. A o se avanoa foi lenei lau Afioga i le Minisita mo Galuega, Felauaiga ma Atinae Esee, e i ai se auala lena e i autafa o le falemai leaga a oo ina tulai mai faalavelave faafuasei faalenatura, e oo foi i gasegase, e pei o gasegase faapenei, i tei ua faafuaseia se Tsunami i Tuasivi, ae i ai se auala lena e i autafa o le falemai, e aoga e vave ona aveese ai tatou gasegase i Tuasivi ae faamei atu i uta i auala galue mo se laveaia i faalavelave faalenatura. Ia, o le tatalo lena i lau Afioga i le Minisita.

18 MATI 2014

**Tulafono Tau Faaofi o Teuteuga o le Tulafono o le Faalapotopotoga  
Faavae Tau Fatugao a Samoa 2013 – faitauga faalua**

A o leni Tulafono Tau Faaofi lau Afioga, malo faafetai. Ua maua ua tele foi nai suiga ma fetuutuunaiga, aemaise lava le tau totogiina o tatou gasegase aemaise o tatou tagata mai fafo ua maua foi le fiafia o nai tatou tagata pe a taunuu mai, o lo o i ai lava le fetuunaiga. E moni lava o nai o tatou tagata o lo o i fafo foi ma tagatanuu i fafo, ae omai iinei o lea lava e fetuutuunai le tatou Matagaluega. Malo faafetai.

O le agaga o le Tulafono Tau Faaofi e pei ona taatia i le Laulau a Fono, o tatou Komiti Faatonu. E leai na o se... o lea foi ua saunoa lau Afioga, ua faateleina leni gasegase aemaise o lea e fou mai le 300. E manatu lava pei ona saunoa se tasi o sui usufono, e fuafua lava i a tatou tupe faaalua. A o le talitonuga, ia fai foi se aoga o leni fuafuaga ina ia faaitiitia ai aemaise lava a tatou polokalame faalauiloa ina ia faaitiitia ai leni faamai ua matua tele naua i totonu o le atunuu. O le mea lea e talitonu foi, o se fautuaga lena e taatia atu i autafa o lau Afioga, ia aoga tatou seleni e alu i Komiti Faatonu ma tulaga faapena, ia i ai foi se aoga ina ia puipuia mai ai nei faamai ina ia aua nei faateteleina i totonu o le atunuu. O lea foi ou te vaai i le Komiti, o lea e i ai ma inisinia po o se inisinia faapitoa o masini nei faamamatoto po o le a le ituaiga inisinia lea ou te vaai i ai i le Komiti, atonu o se taimi saunoa lau Afioga ina ia faamalamalama lea tulaga. Ae faafetai tele lava i lau Afioga mo leni Tulafono Tau Faaofi. E talitonu foi o lea ua saunoa se tasi o tama o le Maota, le sui usufono mo Gagaifomauga Nu.1 ua oo i ai, ou te talitonu foi o le tasi lea fesoasoani mo i tatou uma. E pei foi ona saunoa le tama lea, le sui usufono mo Gagaifomauga Nu.1 i se isi taimi, pe tau tiga foi i le isi taimi nai tui o lo o fai, ae silasila pea i ai lau Afioga ma le Pulega, po o le a se auala e faafaigofie ai ma fesoasoani ai foi i nai o tatou tagata. O le fesoasoani lea i le tatou Tulafono Tau Faaofi. Ma le faaloalo lava.

**FOFOGA FETALAI:** Malo faafetai saunoa. O le a avatu le avanoa i lau Afioga i le sui usufono mo Faleata Sisifo ona sosoo ai lea ma le sui usufono mo Aana Alofi Nu.3.

Tulai mai le sui usufono mamalu mo Faleata Sisifo.

**Tofa LEALAILPULE RIMONI AIAFI:** Faafetai i lau Afioga mo le avanoa, faafetai foi i le faamalamalamaina o le fesuaiga o le Tulafono Autu. O le a agai tonu se manatu i le suiga ua tuuina mai. Muamua, e avatu le faafetai tele i le suiga o lea ua atagia i le Tulafono Tau Faaofi fou lea le fetuunaiga o Komiti. O lea ua sau tonu lava i le numera lea e faatulafonoina i lalo o le Public Bodies Act le fuainumera lea e toafitu. E le gata i lea, a o lea ua manino mai i le vaega o fesuaiga, o lea ua tofia manino lava le tagata e fai ma failautusi ina ia aveesea ai lea feteenaiga.

O le isi vaega lea e atagia lelei mai i le Tulafono Tau Faaofi lea, o le tapulaa lea o taimi o tagata faatonu i le lua terms. Pei o se vaaiga mamao lea ma lelei ina ia fesuisui ai foi i latou e auai atu i o latou tomai faapitoa e sui foi mafaufauga mai lea taimi i lea taimi.

18 MATI 2014

**Tulafono Tau Faaofi o Teuteuga o le Tulafono o le Faalapotopotoga  
Faavae Tau Fatugao a Samoa 2013 – faitauga faalua**

O suiga lelei ia ma talafeagai ua tuuina mai i le Tulafono Tau Faaofi. Ae i ai nai mea ia e fia fesili ai i lau Afioga i le Minisita, muamua, o le Vaega 3(8), le filifiliina o le Pule o le Matagaluega, o lea o lo o manino mai i le Tulafono Tau Faaofi e filifili mai e le Komiti lea, le Board. Po o le faiga fou lea o le a i ai, o le a le toe tuuina atu i le Kapeneta mo se faamautuina pei o isi Komiti. Pe o le mea o le a le toe avea i ai se fesoasoani tau tupe a le Malo? A o lea e maua i le saunoaga a le Palemia, e \$5miliona i le tausaga lea e ave i ai. Ia, e le afaina la pe afai o le tulaga lea o fesuaiga ua i ai ma atagia i totonu o le fesuaiga lea aumai nei.

E le gata i lea, o le (2) lava o le vaega lea, e mafai e le Komiti Faatonu ona ave le malosiaga i le Pule e filifili ai lava e ia ana tagata faigaluega. O lona uiga, o le malosiaga lea sa tatau ona i le Komiti Faatonu, a o lea ua atagia mai i le Tulafono Tau Faaofi lea vaega, e mafai lava ona tuuina atu le malosiaga lea i le Pule e faatino ai e ia lea vaega o le galuega.

O suiga ia o le Tulafono Tau Faaofi e tatau ona toe tagai i ai e avatu ai foi le faamalo ma le faafetai i lau Afioga. E le iloa e lou sui usufono pe faapefea ona measure, pe faapefea ona fuafua leni atinae po o leni foi fale e togafitia ai i latou ua maua i lea gasegase. Sa ou faapea a faatupulaia mai, o lona uiga e faaali mai ai, e pei e le o lelei tele le faatinoina o le galuega. Ia, aua e tatau ona toalaite. Ae faigata ona e pei o le vaega lea e taunuu mai i ai i latou foi nei ua siliga tali i seu i uta i togafitiga masani i le falemai.

O le uiga la o lau faamatalaga, e tatau lava ona galulue faatasi le Matagaluega i le tulaga ogaoga lea o le NCDs, lea e mafua ai le faamai leni. Faafetai o lo o faatinoina le tou galuega faifaipea i tua i maketi ma nofoaga faitete e tau sailia ai tagata ua maua i le mai. Faafetai foi i le Matagaluega i le vaega fou lea ua galulue i ai nisi o foma faapitoa e pei o le Susuga a Satupaitea Viali i tua i le heart, po o le mai fatu, aua o i ina lea e mafai ai ona puipuaia mai nei i le oo atu i le ogaoga.

Ou te talitonu o le mea foi lea e tatau ona agai i ai le Matagaluega, aemaise o le faaaogaina o le Komiti Faapalemene foi lea o le SPAGHL e o i tua e advocate tulaga ogaoga o le faamai leni. Aua sa ou taua pea i tausaga ua mavae, sa i ai le Heart Foundation a le falemai, ua le iloa po o fea ua oo i ai lena Faalapotopotoga i leni taimi. O le Faalapotopotoga lena e link, e matua taua tele agai i le vaega lea.

O lo o maitauina foi le faatupulaia o le promote ina o exercise i tua i nuu i tua ma le aufaigaluega a le Malo, o se mea lelei tele. Ae i le vaai i ai, e pei na o se mea foi lele e faaoso faavaitaimi ma toe tuu, e lea se agaga e faaauau pea nei mea lelei. Pe le mafai e le Matagaluega ona faaoso se Tulafono Tau Faaofi ina ia muamua Samoa i le Pasefika ma le Lalolagi i itula taitasi o le aso e ave e koloni ai tagata, e lavea i totonu o le totogi.

18 MATI 2014

**Tulafono Tau Faaofi o Teuteuga o le Tulafono o le Faalapotopotoga  
Faavae Tau Fatugao a Samoa 2013 – faitauga faalua**

O le tele o Matagaluga a le Malo, o la e ua i ai a latou fale koleni, gyms, po o se tausaga sei vaavaai ma faamasani ia sui mafauauga o tagata, le attitude foi lea ina ia faamasani i le mea lea o le koleni, ina ia fesoasoani ai ona o lea ua matua faatupulaia le mea leni i gasegase nei ua mafua ai le tulaga o le tatou fale faamamatoto lea. Faafetai lava i lea auunaga, aua e moni e i ai nisi ua oo i i ona o le faatamala foi po o le tulaga o le gasegase ua le mafai ona togafitia, ae i ai foi nisi o fanau laiti ua oo i ai ona e i ai lava mai ua mafua ai ona oo i tulaga ia.

A o le fautuaga lena i lau Afioga ma le Matagaluga, afai o lea o lo o faatupulaia mai le 6 – i le 75 i totonu o le valu tausaga, o lona uiga, e pei ona saunoa se tasi foi o sui usufono, pei o lea tatou te fetagofi e faamalosi, ae tataua ona tatou galulue faatasi i ni suiga lelei, ina ia taumafai le atunuu e avoid, ia aua nei oo i le tulaga lea ua i ai nei. Ma le faaaloalo lava faafetai.

**FOFOGA FETALAI:** Malo faafetai. Faafetai saunoa, faafetai mo lou sao taua. Ia, o le avanoa mulimuli, tulai mai le sui usufono mo Aana Alofi Nu.3.

**Afioga TOEOLLESULUSULU CEDRIC POSE SALESA SCHUSTER:** Faafetai i lau Afioga i le Fofoga Fetalai mo le avanoa sei faaali foi sina tuualalo. Faafetai i lau Afioga i le Minisita mo le suiga o le Tulafono Tau Faaofi, e talitonu foi leni sui usufono o ni suiga taua.

O le vaega muamua lau Afioga i le Fofoga Fetalai, e faamauiina le lagolagoina o le vaega lea i le tofiaina o i latou i totonu o Boards, ona ou te lagona o se faatatauga talafeagai lea. Atonu foi o le tuualalo lau Afioga i le Fofoga Fetalai mo le alualu i luma o nisi foi o Pulega o Faalapotopotoga a le tatou Malo, ina ia taumafai lava i latou o lo o i ai le potu ma tomai faapitoa i totonu o vaega ina ia i ai i latou i totonu o Boards nei.

Lau Afioga i le Fofoga Fetalai, e avatu foi ona e tusa ai o se maitau ma se fautuaga lava e le gata mo le Board lea o lo o tuuina mai i le Tulafono Tau Faaofi, ae o nisi foi o Board mo Faalapotopotoga a le tatou Malo, ona e maitauina e le gata ina maua alauni i fonotaga, ae ua oo lava i nisi foi o tulaga ua faapea ona afifio i ai i latou o Komiti Faatonu ae ua maua ai alauni. Atonu o le fautuaga ina ia mafai ona silasila le tatou Malo, aemaise lava i Komiti Faafae ina ia faatapualaina avanoa pei ona taua i totonu le Tulafono Tau Faaofi, ina ia pau lea o vaega e maua ai alauni mo i latou.

Lau Afioga i le Fofoga Fetalai o le vaega mulimuli e fia oo i ai se faamatalaga, faafetai o lea e maua atu i le saunoaga a le Afioga i le Minisita i le fuafuaga mamao, tusa lea o le faa-independent ina o foundations nei. E talitonu le lagona o se vaega taua pei ona saunoa foi le Afioga i le Palemia, o le tau amata lea o le tatou Malo i le fausia ma le atiaaina o nei Faalapotopotoga.

18 MATI 2014

**Tulafono Tau Faaofi o Teuteuga o le Tulafono o le Faalapotopotoga  
Faavae Tau Fatugao a Samoa 2013 – faitauga faalua**

A o le faaunautauga, o vaega nei o foundations e tatau ona independent. A i ai se fesoasoani tau seleni a le Malo e ave i ai e galucaina ai, a o le talitonuga ina ia faamalosi e leni Faalapotopotoga le sailia o seleni, e le gata i Faalapotopotoga eseese i totonu o Samoa, a o i latou foi o lo o i atunuu i fafo, ina ia mafai ona faalava le seleni e faatinoina ai le latou tautua, aemaise foi o lea e maitau atu ua alualu i luma le tele o i latou o lo o faaogaina le tele o nei auaunaga. E talitonu e ao ona faatauaina, e le gata i le Komiti Faafae, a o i latou o le a puleaina le sailia o seleni mai Faalapotopotoga mai fafo. Faafetai.

**FOFOGA FETALAI:** Malo faafetai. Ou te manatu o lea ua maea finagalo o sui usufono lau Afioga i le Minisita mo le Soifua Maloloina. Ia, tulai maia e talifuitau ona tuuina atu ai lea o le tatou fesili.

Tulai maia lau Afioga i le Minisita mo le Soifua Maloloina.

**Afioga Hon TUITAMA TALALELEI TUITAMA:** Lau Afioga i le Fofoga Fetalai, e momoli atu le faafetai tele i le mamalu o le Maota, ua lagona lava le mafanafana ma le agaga faagaetia i leni itula o le aso ma le faagasologa o le tatou Fonotaga, i le maitau atu i le faatauaina tele i finagalo ma le tofa liuliu i le mamalu o sui usufono i totonu o le Maota o leni auaunaga. Ou te talitonu e le toe tau faamatalaina le aoga o leni auaunaga, o lea ua tele molimau e le gata ia i latou o lo o latou faaogaina, a o nisi foi e tau i e o lo o latou faaogaina leni auaunaga, o i latou ia o lo o avea ma molimau i le matagofie o leni faautautaga ma le tofamamao i taitai o le tatou Malo na asaina le gasu o le taeao e tusa ai ma le faatuina o leni auaunaga i totonu o Samoa.

O le vaega lea sa lagaina mai e le sui usufono mo Gagaemauga Nu.2, o lea sa faapea pe aisea ua na o Samoa ai e fai ai le faamamatoto. Ia, sa ou faapea lava ai ua manino lea vaega, aua e le na o le pau leni o le taimi ua ou talanoa ai i le faamamatoto i totonu o leni Maota, aua e i ai lona piitaga ma lona sootaga i gasegase ia pei foi o lea sa saunoa i ai nisi o sui usufono lea o lo o taua atu nei tatou NCDs, lea e i ai le suka, totomauluga ia ma isi gasegase o le fatugao, e faapena foi le gugu po o le gout, ia tasi lea vaega e ono aafia ai i latou. Ma e le aveesea ai lava infections ia po o faamai e aafia ai fatugao i siama, lea o lo o i ai nai tamaiti pe toalua pe toatolu nai tamaiti la o lo o faamama toto ona ua faaleagaina o latou fatugao i siama po o mea ia o bacteria lea e aafia ai e infect ai latou fatugao ma faaleagaina ai lava ma oo ai lava ina manaomia le faamama toto.

Ae o lau tali i ai aua ou te talitonu e tofua tatou ma le tali, a o le agaga moni o le Malo sa fai ai leni mea, silasila ma le alofa i ai latou o lea na aafia i le gasegase leni, pei ona ou fai atu na oo pe latalata i le toasefulu i latou na avatu i Niu Sila e faamama le toto, i le taimi lea na faatu ai le tatou Fale Faamamatoto, ua totoe nei na o le toaono i latou, ona omai lea o le toalima ae nofo le toatasi pei sa tau ave ai ona o le faamamaina i o.

18 MATI 2014

**Tulafono Tau Faaofi o Teuteuga o le Tulafono o le Faalapotopotoga  
Faavae Tau Fatugao a Samoa 2013 – faitauga faalua**

O le toalima lena na omai nei faaauau ai le faamamaina o le toto, ma e mafai ona ou faapea atu, o lo o i ai ia le gasegase e oo atu i le taimi lea ua sefulu tausaga talu ona faamama lona toto i Niu Sila, lea la e oo mai i le taimi lenei, o lea e faamama lava lona toto, o lea ua savali atu nei masalo la po o ua sefuluvalu nei tausaga o la e faamama lava le toto. Ae pei ona saunoa le Afioga i le Palemia i le taimi ua mavae i lana faamalalamalama foi ma lana lagolago i le Tulafono Tau Faaofi, lea sa taua ai le tasi tama ua oo i le 75 tausaga o lo o faamama pea lona toto. O lau la tali i ai i le vaega lea, o le tatou faatauaina lea o o tatou tagata ua aafia i le gasegase lenei aemaise o tama ma tina matutua, atonu o se tali faigofie lea. Ona o le tatou aganuu, e tatou te le tuulafoaiina ai o tatou tagata mamai po o tatou tagata ua gasegase. Silasila foi i le faatauaina e Samoa o le auaunaga aua na le mafai ona faatino i le taimi na le mafai ai e Samoa ona faatino iinei, ona ave lea i Niu Sila sa totogi e le Malo o Samoa. O le tau sa faamama ai le toto o le tagata e toatasi i Niu Sila, e NUS\$1,000 ma le toalima lea, o lona uiga e \$5,000 i le faamama ae faamama faatolu i le vaiaso, o lona uiga e \$15,000 i le tagata e toatasi i le vaiaso. O le fesili la lea e faapea, pe aisea ua na o Samoa ai? Ia ae a na o Samoa e alofa moni i ona tagata, ae a na o Samoa e moni le alofa o ana Faigamalo i ona tagata ua aafia i gasegase e le mafai ona togafitia. Ina ua oo la ina ua fetagi mai i ala ia ē e gasegase ua fia vaai i le atunuu ae le mafai ona oo mai i Samoa, aua e le mafai ona motusia le auaunaga. O i ina lea na faavae ai le finagalo o le Malo, fai loa se mea e taumafai iinei e aumai ia suli o le atunuu o lo o fia oo mai i Samoa e mafuta ma aiga ma fanau, ia tasi lena tali.

O le isi tali, i lou taimi na oo mai ai, pei ona ou fai atu, na omai sui o atunuu tuaoi ia e sailili mai i Samoa, pe faapefea ona fai e Samoa? E le talitonu, e tatou te mafai ona tatou faia le auaunaga lea, aua foi o lea na taua e le Palemia, e \$40miliona. O fea e aumai ai tupe a Samoa lea e faatino ai? O fesili ia na omai ma tagata nei. Omai lea vaai, o lea ua uma ona fesoasoani mai i Sigapoa o la ua toe foi Sigapoa, a o lea ua fai lava e tatou le auaunaga lea. Na omai lea fesili, aisea ua mafai ai e Samoa ona fai lenei auaunaga ae le o mafai e isi atunuu? Ia o le tala lena. Na sau le sui mai Tonga oo atu lea, fai mai ua fia lava i lau Afioga, ua ou sau ou te fia vaai, po o le a lava le mea, o Niu Sila e 70 loa tausaga o le tagata i Niu Sila e le toe faamamaina, e i luga atu loa o le 70 e pule oe, a e le mafai ona totogi, e le toe avea i ai le avanoa e faamama ai. A o Samoa nei, e 70, 80, 90 e faamama lava, e faamama lava. A aumai lava ua manaomia le faamama, e faamama lava. Ia o le fesili lea, a o le a le mea ua ala ai ona...aisea le mea ua faamama ai le toto o lenei tagata o nei gasegase a o lenei ua lamalama faaiu lo latou soifua?

**FOFOGA FETALAI:** Malie lava lau Afioga i le Minisita, sei tuu atu lava le avanoa i le sui usufono mo Gagaemauga Nu. 2.



18 MATI 2014

**Tulafono Tau Faaofi o Teuteuga o le Tulafono o le Faalapotopotoga  
Faavae Tau Fatugao a Samoa 2013 – faitauga faalua**

**Tofa Levaopolo Talatonu:** Lau Afioga i le Fofoga Fetalai, faafetai lava, a lailoa le Afioga i le Minisita. Na mafua ona ou fesili analeila, ona sa ou fesilisili foi au i nai isi atunuu ia o le tatou atumotu Pasefika, na ou fesili ai, po o le a le mea e leai ai se latou falemai faamamatoto? O le latou tali, e le worth ona fai e latou se falemai faapea, leaga e leai lava ma ni tagata o le latou atunuu e mamai i mea ia o mai suka ma....e mamai lava pe feoloolo. Pei o le mea lena na agai atu ai, a o lea ua maua atu nei, o le mamai tele o le tatou atunuu lea ua fai ai le mea lea.

**FOFOGA FETALAI:** O lea ua maua le faamalamalamaga. Faaauau le faamalamalamaga lau Afioga i le Minisita.

**Afioga Hon TUITAMA TALALELEI TUITAMA:** Ia o le tasi foi lea vaega e faaeteete tele i ai tatou foi lea e tau o le mea o le tae tala, e o tufitufi solo mai faamatalaga foi ia e le sao, ona aumai lea i totonu o le Maota lenei ua tele ai le agasala. Aua ou te tautino atu lau Afioga....

**Tofa Levaopolo Talatonu:** Lau Afioga i le Fofoga Fetalai, o ia lea sa tae tala muamua i le Tonga lea na la talanoa.

**FOFOGA FETALAI:** Leai, malie ia le sui usufono mamalu, o lea ua malamalama. Tulai mai le Minisita.

**Afioga Hon TUITAMA TALALELEI TUITAMA:** O faamaumauga lau Afioga, e le na o Samoa, o le Pasefika ua taua nei o le Tsunami, ua taua ia faamai nei o tsunami. Talu ai o le aafiaga o le Pasefika atoa o Nauru e tau mai i le tausaga na tea nei o numera tasi, ia sei fai atu lau tala, a o se tamai atunuu. O le faaiuga o le tausaga na tea nei, e numera tasi ai Amerika Samoa. A o isi foi atunuu ia o Tonga, lea ou te tala atu lava leaga o lea ua vave tu mai a o lea e faasolo atu lau faamatalaga, o le sui lea na sau e saili mai le togafitiga iinei le faiga o le tatou....pe faapefea ona tatou faatinoa le auauna lenei? E mai Tonga. Ona oo atu lea o le fesili, aisea le mea ua outou naunau ai e fai le...aisea, a o le a le mea ua faamama ai ma tagata o lea ua malamalama lagoto lo latou soifua? Ia o lau tali na ave i ai, tou te le o maua le agaga o Samoa, o le talitonuga o Samoa, o i latou ia o teu oa a le atunuu, lea e i ai le oa o le tamaoaiga o le tofa ma le faautautaga latou te faafoeina aiga e fautuaina fanau, o latou te fautuaina le pule o lo o faia tonu i totonu o nuu, o ekalesia, o le sao lena o i latou ia. Pe ua 60, 70, 80 tausaga e le o toe faigaluega, ae o lo o i ai le oloa taua o lo o latou teuina mai i le latou soifuaga atoa, lea e faasoa atu ma tufa atu i fanau i alo ma aiga latou te fautuaina ai ia e o lo o pulea nuu, e o lo o pulea ekalesia, e o lo o agai mai iinei i Faigamalo, e toatele i tatou o lo o i ai iinei o la ua afu le soifua o matua. E a e le o fautuaina oe e lou tama po o lou tina i le taimi lena? Ia e le iloa po o le mea lena o lea e te faapena ai.

18 MATI 2014

**Tulafono Tau Faaofi o Teuteuga o le Tulafono o le Faalapotopotoga  
Faavae Tau Fatugao a Samoa 2013 – faitauga faalua**

Lau Afioga, o le ala lea o lea e faataua ai e Samoa nei, aua e tele lo tatou sao o lea e maua mai ia i latou nei o lo o gasegase, o lo o tele pea lo latou sao e auala i le fautuaga aoga lea o lo o fatufatuai o tatou aiga.

Ona ou oo mai lea i le vaega lea na fesiligia, ai e ala ona tolaulau atu ia le tulaga lea faapea o lea o le a toe fai nisi fuafuaga e faalautele le auaunaga, o lona uiga o lea o le a faatagi i se tupe, vaai i le mea ua oo i ai mafaufauga, mo tagata faipisinisi, na o tupe, tupe, tupe latou mafaufau. Ae e mamao lava le fuafuaga a le auaunaga ma le Matagaluega ma lea mea ua oo i ai lau faautautaga, fai mai, ia o lona uiga o lea ua vaai i ai, ua na predict ina o lea o le a avatu le talosaga e toe faaopoopo le tupe e fai ai le auaunaga. Ia sei silasila i ai....

**FOFOGA FETALAI:** Malie le sui usufono o lo saunoa, leaga o lea ua taua mea tau tupe, sei tulai mai le sui usufono mamalu leaga o lea sa....Tulai mai le sui usufono mo Gagaemauga Nu. 2.

**Tofa Levaopolo Talatonu:** Lau Afioga i le Fofoga Fetalai o se mea e fia faasao. E leai lava se mafaufau ua oo i ia mea ua saunoa i ai le Afioga i le Minisita. Masalo ana saunoa tonu lava i lana Tulafono lea ua aumai manu e sao lelei, ae leaga ua toso lava le laau felefele ma sese atili ai lana saunoga ua fai mai. Pau lava le agaga na ou fai atu ai, ou te le talia ai le faalautele o falemai ma auaunaga faapena, e encourage ai lo tatou atunuu i le mea lea o le fai pea le tatou mea lea o le mea sili ua i ai le tatou falemai i i le tatou itumalo e tatou te o i ai e faamama ai o tatou toto. E pau lava lena o le agaga, ae lei mafaufau tele ia se isi i se tulaga o ni mea e maua ai ni tupe.

**FOFOGA FETALAI:** Malo. Ia tulai mai le Minisita e faaauau le tali mai.

**Afioga Hon TUITAMA TALALELEI TUITAMA:** Lau Afioga i le Fofoga Fetalai, ia ua uma ai foi ma avanoa o le sui usufono o lea ua uma lana faalua.

Ou te faamalamalama atu, ia faatoa filemu le popolega o si ou a sui usufono, e leai, e leai se fuafuaga o fofou mai e aumai i ai i le Maota e toe faaopoopo ai ni tupe o le auaunaga lea. O lea la o le a ou fai atu le talaaga, o le taimi lea na o le toalima gasegase lea na omai mai iinei, ua fua e le Malo i le tupe sa faaalu i Niu Sila e tusa lea ma le \$6miliona, tusa e \$1miliona a le tagata e toatasi sa faamama ai le toto, pei ona ou taumafai atu i le taimi muamua e \$1,000 Niu Sila i le faamama e tasi, tusa la o le tupe na faaalu, e \$6miliona i le tausaga mo tagata ia e toaono, tusa e \$1miliona a le tagata.

18 MATI 2014

**Tulafono Tau Faaofi o Teuteuga o le Tulafono o le Faalapotopotoga  
Faavae Tau Fatugao a Samoa 2013 – faitauga faalua**

Ona oo loa lea ina ua omai i latou nei le mamalu o a tatou tama foi ma tina sa fai i ai le auunaga i Niu Sila ma omai iinei, fua loa e le Malo, tuu la i ai se \$5miliona, e fuafua agai i le galuega lea ma le tupe lea sa faaalu i le faamamaina o latou toto i Niu Sila. O le \$5miliona lena i le 2005, ae na o le toaono gasegase sa fai i ai, e oo mai i le aso, o lea ua 75 tagata ua faamama toto na o le \$5miliona lava, e lei toe faaopoopoina lava se tupe e tasi talu mai le 2005 e oo mai i le aso. O lea la, na faafilemu ou popolega, e le o faaopoopoina ni tupe e faaalu i le auunaga lena, a o lona aoga ua ogaoga ma tele lona sao i le soifua o matua, o alo ma fanau lea o lo o togafiti iinei.

Ona ou oo mai lea i le tulaga lea, po o tuua ai la le ave o tupe prevention? Ia o mataupu lava ia sa laga nei, ae e le...pei lava o le upu foi lea e fai soo e tatou, 'e le aiuli le isi Toga i le isi Toga,' e le mafai ona tuua ai fua le prevention, ae le mafai foi ona tuulafoai o tatou tagata o lea e manaomia le auunaga. O lea o le a tatou talanoa i le faatinoga o le auunaga, e tatou te le o talanoa i le prevention. O le a sei ou talanoa la i le prevention. Aua o le mataupu lea o lea foi sa ou talanoa i ai i le tatou fono o le tatou Paketi i le tausaga ua mavae na aumai ai foi le tulaga lea i le prevention, ma o lea sa ou taumafai e tautau atu, o le galuega faitele lea a tatou, o le faalavelave lea e tupu nei, o lea e tatou te tilotilo i le Matagaluega a le Soifua Maloloina, e fai lava e outou le prevention, o le tou galuega lena o le prevention. E faapefea ona o atu le Matagaluega e prevent oe mai lou lau o twisties ma fagu suamalie i lau fanau? E o atu le Matagaluega e taofi mai outou aua tou te faaaogaina meaai gaoa? Na pau lava le malosiaga o le Matagaluega lea e i ai, o le faasoa atu i luga o le ea, aoao atu i le afaigaluega o lo o autovaa atu i tua ma talai atu, aua le faia, fai le mea lea tou te manuia ai, toaaga e tausasami i fualaaauina, fruits, vegetables. A lea foi ua taulamua le SPAGHL. Vaai i le SPAGHL o lea ua o e taamilo i tua e toto laauina? Ona o le – that's part of prevention. E le o atu le Matagaluega e vaai au meatausami i luga o lau laulau, pe faapefea... o lau matafaioi lena, o lou tiute lena...

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai...

**FOFOGA FETALAI:** Malie lau Afioga i le Minisita sei tulai mai le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Ou te fia fesili atu i le Afioga i le Minisita ona ou te le o malamalama po o le a tonu le mea lea e saunoa i ai. O lea sa saunoa mai le sui usufono mo Gagaemauga Nu.2 o le a tele tupe e alu i le prevention.

18 MATI 2014

**Tulafono Tau Faaofi o Teuteuga o le Tulafono o le Faalapotopotoga  
Faavae Tau Fatugao a Samoa 2013 – faitauga faalua**

O au nei, ou te le malamalama i lenei mea o le prevention ona ai lava e fenanui lava le itumalo o le sui usufono ma le sui usufono, ae ou te le o malamalama. Pe mafai lava ona faamalamalama mai, ona o lea e faafogafoga mai lou itumalo, e leai lava se isi o lou itumalo e iloa nanu. Pe mafai ona faa-Samoa mai po o le a lea mea o le prevention?

**FOFOGA FETALAI:** Malie lau Afioga i le Minisita sei tulai mai le sui usufono mo Gagaemauga Nu.2.

**Tofa Levaopolo Talatonu:** Lau Afioga i le Fofoga Fetalai, e pei lava o le a tososese e le Afioga i le Minisita le mataupu, ona e leai sau faamatalaga a mea pe tuuese ai le prevention. Na pau lau faamatalaga na avatu, afai e \$5milionia e ave i le falemai faamamatoto, ave se \$10milionia i le prevention lea e te talanoa mai ai ia faaleleia ai le tatou polokalame e puipui ai o tatou tagata mai gasegase mai le oo i o i le mea e faamama ai na mea.

**FOFOGA FETALAI:** Ia, o lea ua ou maua atu le saunoaga a le sui usufono. Malie lau Afioga i le Minisita o lea o le a tulai mai le sui usufono na taua le prevention.

**Tofa Lealailepule Rimoni Aiafi:** Faafetai, ona sa tele foi se vaega na ou talanoa ai i mea tau puipuiga po o le prevention. O lea e saunoa le Minisita i mean foi nei tau logologo. A tatou fua i le TV lea e i ai nei, e lima ads o le fagupia, ae tasi le ad a le health, po o le 10 o ad i fagusuamalie ma mea faapena, ae leai se ad a le health i le po e tasi. O lona uiga, ua televave tele le sau o le faatosina i le mea lea o le mai o tagata, ae tuai le sau a le Matagaluega.

**FOFOGA FETALAI:** Ia, o le a lafo atu, faaauau le faamatalaga o le prevention po o le upu lea na taua lau Afioga i le Minisita.

**Afioga Hon TUITAMA TALALELEI TUITAMA:** Lau Afioga, ou te fia tali puupuu lava i si tamai mea lea na toe faaopoopo mai nei e le sui usufono mo Gagaemauga Nu.2 lea e faapea mai afai e \$5milionia lea e ave i le fale faamamatoto, o le a le mea e le ave ai se \$10milionia i le prevention? Ia, ou te ofo lava au ia, o tagata faipisinisi ua tataua ona pei o le ao ia latou nei mea. O le tulaga moni lava, e ova atu i le \$10milionia lea e faaalu nei i le tatou prevention, leaga o lea e tilotilo pei foi ona silasila i ai le sui usufono mo Faleata Sisifo, o lea e silasila na o mea ia e sau i le TV. Ae a faapefea le anoano o le mau mea ia e fai nei o le o atu i tua e talai atu ma faasalalau mea tusitusia i laupapa ma mea faapena e faali i tua? E 180 nuu ia e fai ai siva. O lona 180 o nuu, e tofu ma le laau foi lea e ta ai pese ma speakers tetele e tusa lona tau ma le \$6,000 e faatino ai na o le mea lea.

18 MATI 2014

**Tulafono Tau Faaofi o Teuteuga o le Tulafono o le Faalapotopotoga  
Faavae Tau Fatugao a Samoa 2013 – faitauga faalua**

Mo se faaitaiga lea, lea ua agai i le mea lea aua pau lea o le mea e malamalama gofie ai lau talanoa atu i mea tau prevention, ae tele ma anoanoai prevention activities lea e faatino i le taimi nei. Ae sei agai la i le mea lea o le faamalositino, e \$6,000 ae 180 nuu...

**FOFOGA FETALAI:** Malie le Minisita sei tuu atu le avanoa i le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o lea faatoa ou maua atu i le faamalalamalama a le sui usufono mo Faleata Sisifo le uiga o le upu prevention, o le puipuiga a? E ala ona ou tulai atu, ona o le toatele o le tatou atunuu la e faafogafoga mai e le o malamalama i le mea lea tatou te talanoa i ai, ona e lua vaega o lo o faatino e le Soifua Maloloina, na o le lua lava vaega o lana matafaioi.

O le vaega muamua, o le togafiti i tui po o le taoto, tipi, po o le togafiti i vailaau. Ma le vaega lona lua la lea o le puipuiga. O lea la faatoa ou maua atu nei, o le mea lea o lo o aafia ai le tele o atunuu, e agai lava i le togafiti o le tui, tipi, taoto. O lona uiga, o le taofiga o le mai tonu lava lea, ae lea se puipuiga, e le o faataua le puipuiga. O le puipuiga la, o le faagaioi lea o le tino ma taumafa ina ia le gasegase ai. O lona uiga, e faigofie le mea lena o le le gasegase na i lo le gasegase ona ave loa lea tele tupe e alu ai.

Ae pei o le ala lea na ou tulai atu ai, ona e faaataata a lafoga a tatou talanoaga, a o le tele o le tatou atunuu o lo o faafogafoga mai e le o malamalama i vaega ia e lua. O le ala lena sa ou fai atu ai, ona ou te le iloa po o le a le uiga a o lea la faatoa faamalalamalama mai e le sui usufono mo Faleata Sisifo, o le prevention lea tatou te talanoa ai, o le puipuiga, ona o lea e alu a tatou faasalalauga, tatou te le o talanoa foi lea ina ia malamalama na o tatou, a ia malamalama mai foi o tatou itumalo, aemaise lava i latou ia o lo o mamai i le taua o le vaega lona lua lea. I atunuu uma lava o le lalolagi, na o le lua lava matafaioi a so o se Soifua Maloloina. O le vaega muamua o togafiti, tui, taoto, fualaau. A o le vaega lona lua, e faatauaina e ui ina tatou talanoa pea i ai i taimi uma, o le puipuiga. E lelei le togafitia, ae lelei le puipui nai lo le toe togafitia.

**FOFOGA FETALAI:** Malo faafetai fesoasoani mai i lau Afioga i le Palemia mo le faamalalamalama atili o felafolafoaiga.

Tulai mai lau Afioga i le Minisita e faaauau le saunoaga.

**Afioga Hon TUITAMA TALALELEI TUITAMA:** Lau Afioga i le Fofoga Fetalai, o lona ua saunoa atu le Palemia, ma o lea ua faafogafoga mai foi le atunuu, o le agaga moni lava lea o le faaliliuga o le upu faa-Peretania lea sa saunoa i ai le la foi Itu ma sui usufono sa aumaia le tulaga i le prevention, o le puipuiga mo le soifua maloloina.

18 MATI 2014

Tulafono Tau Faaofi o Teuteuga o le Tulafono o le Faalapotopotoga  
Faavae Tau Fatugao a Samoa 2013 – faitauga faalua

E faaauau la sau faamatalaga lau Afioga, ona o lea sa fesiligia le tau, po o le a le tele o le tupe o lo o ave i le puipuiga. A o lea sa ou taumafai la e faamalamalama atu i lea vaega o le puipuiga, e tasi lava, na o le taumafaiga i exercise nei e fai po o siva faamalositino lea e fai nei i tua, le tele lena o le commitment po o le faatauaina e le Soifua Maloloina o le prevention po o le puipua o le taumafai lea ina ia ave le auaunaga lea i tua e galulue ai lava le nuu ia ma faatino ai e latou le auaunaga lea, ina ia faaitiitia ai le tino puta, e faapea foi ma le faamalositino o le tino e faagaioi ai le tino ina ia maua pea le soifua maloloina.

E i ai nisi sa faitio i le faiga lea, lea ua faapea mai aisea le mea e maumau ai le taimi lea e o ai e sisiva i le aualatele ae le o e faaafu tino e fai galuega? O le mea lena e tau o le productive exercise po o le faamalositino foi lea e maua mai ai se tau, e pei la o le galue e faamama le togafai, fua mai fai ua lelei, pe vele le maumaga, a ola lelei talo ua tetele io ua maua ai le meatausami a le aiga. A o le latou taofi, o le ituaiga faamalositino lea e fai na o le sisiva lava e lea se mea e alu ai, ia manatua foi, o tatou uma, e le o uma i le maumaga. O le autalavou lea e o e fai galuega la e maua ai a latou faamalositino, ae faapefea la le tina ua maua i le tino puta ma le tama ua maua i le tino puta? E mafai ona e alu atu e tuli lou tama e alu i uta i le maumaga e vele le vao ma alu e fai sana faaafu i totonu e gasese mai meatausami e aai ai le aiga ae nofonofo le autalavou o la e le tino lapopoa? O le tulaga lena. O lea la e fai le fuafuaga lea ina ia le gata ia i latou able bodied po o tagata e lelei tino ae ia faapena foi ma le aumatutua ma i latou ua puputa ma mamafa tele o latou tino e maua ai le avanoa e fai ai le faaafu ina ia galulue, aua e amata loa ona fai faamalositino ma maua le malosi, ona faaosofia loa lea o le fia galue, ua mafai ona fealuai, koleni ma mafuta i uo ma tulaga uma o mea faapena e faagaioi ai le tino. E le taugofie la lena vaega, e taugata aua e le gata i le ave o tupe e faatau ai mea nei o masini e faatino ai le auaunaga lea, a ia faaauau pea le auaunaga lea ma le lagona o tagata e fia faia le faamalositino lea, e fai tauvaga e faaosofia ai lagona o tagata ina ia aveai foi lea ma auala e tosina mai ai ma isi o lo o faatutugata, omai tatou o lea e fai tauvaga. O na tauvaga, e le faia i ni faafetai pe tauia i ni a, e ave foi i ai le seleni.

**FOFOGA FETALAI:** Ou te vaelupeina le saunoaga a le Afioga i le Minisita mo le Soifua Maloloina, ou te faamalulu atu ou te iloa ua see ma ua sagatonu lau o le fo i lau saunoaga. Ae ona ua tatou taunuu i le tatou taimi malolo, o lea o le a toe tuuina atu le avanoa pe a tatou toe taliu mai i le tatou lafo faatu i le itula e 7 i le afiafi a nanei.

E momoli atu le faafetai tele i le paia ma le mamalu o le Maota i lenei itula o le aso. E i ai le talitonuga o le a vavae foe ae fai le tatou faatiliga malosi, o le a tatou toe potopoto iinei e pei ona i ai le lafo i le itula e 7 e faaauau ai la tatou galuega tuua seia aulia le itula e 11.

18 MATI 2014

**Tulafono Tau Faaofi o Teuteuga o le Tulafono o le Faalapotopotoga  
Faavae Tau Fatugao a Samoa 2013 – faitauga faalua**

Ou te faasilasila atu o le a faataatia ese Taulumaga a le Fono Aoaio Faitulafono mo lana malologa ona tatou toe tauaofia ai lea i le itula e 7 i le afiafi a nanei.

*Na motusia Felafolafoaiga ina ua faataatiaese Galuega a le Fono Aoaio i le itula e 1.00 i le aoauli seia aulia le itula e 7.00 i le po.*

*Na toe faaauau Taulumaga i le itula e 7:00 i le po.*

**TULAFONO TAU FAAOFI O TEUTEUGA O LE TULAFONO O LE  
FAALAPOTOPOTOGA FAAVAE TAU FATUGAO A SAMOA 2013  
– faitauga faalua**

*Na toe faaauau felafolafoaiga.*

**FOFOGA FETALAI:** E toe faafeiloai atu i le paia o le Maota i lenei itula o le afiafi. E manatu ua maua se faasiliga malosia ina ua tolopo le Fono mai le aoauli analeila ma sa tatou faatasi atu foi e faaauau nisi o galuega ma tuatuaanoa o le aso ma galuega fai, a o lenei ua tatou toe potopoto i lenei afiafi ona o le faaauauina o a tatou galuega. E momoli atu le faafetai tele i le paia o le Maota i a outou Afioga i sui usufono mamalu aemaise o le Taitai o le Malo ma lea tala-na- atoa i lau Afioga i le Sui Taitai o le Itu Agai ma sui usufono uma.

E momoli atu foi le faamalo i le tapuaiga a lo tatou atunuu i lenei aso i le feagai ai ma galuega ma tiute aemaise o le fatuaiga tausii i le tautuaina o lo tatou atunuu i ona vaega eseese.

Lau tapuaiga Samoa, e manatu e manuia lo matou alofaiva ona o la outou mau iumaea. O lenei afiafi e faafetai atu i le tatalo a le aufai tatalo aemaise foi le tapuaiga mau i alii ma faipule, aemaise tamalii ma failauga, faletua ma tausii, saoa ma tamaitai ma le loaloa o lo tatou atunuu i ona mamalu ma ona paia sauoo.

O lenei afiafi o lea ua tatou taunuu mai i le faaauauina o a tatou galuega e pei ona faatulagaina i le aso analeila. O lea ua amata a tatou galuega seia aulia le itula e 11.00 i le po ananei.

E faia le tatou malologa o lo o faagasolo le talifuaitau a le Afioga i le Minisita mo le Soifua Maloloina. O lea ou te toe tuuina atu ai le avanoa e faaiu mai le saunoaga lau Afioga i le Minisita e ala i le Tulafono Tau Faaofi ua faataatia i luga o le Laulau a Fono.

Tulai mai lau Afioga i le Minisita mo le Soifua Maloloina.

18 MATI 2014

**Tulafono Tau Faaofi o Teuteuga o le Tulafono o le Faalapotopotoga  
Faavae Tau Fatugao a Samoa 2013 – faitauga faalua**

**Afioga Hon TUITAMA TALALELEI TUITAMA:** Faafetai i lau Afioga i le Fofoga Fetalai, ma e piiama foi so matou taofi e tusa ai o le faatalofa atu i le mamalu o le tapuaiga a Samoa o lo o mafai ona maua mai faasalalauga o lenei fonotaga i lenei itula o le aso. E moni foi lau saunoaga ua toe matua faaatoatoaina le malosi i lea foi malologa ua tuanai atu ma ua lagona foi le fia galue i le po atoa, ae lafo atu pea i lau Afioga i le Fofoga Fetalai mo le faasoaina o o tatou taimi, ae ua manaia le malu o le afiafi i le faagasologa o a tatou fonotaga.

Lau Afioga i le Fofoga Fetalai, e tolopo le Fonotaga o lo o ou i ai i luga i le mataupu lea o le puipuiga leaga o lea na fesiligia po o le prevention. O lea la o le a tau faaiuiu sau faamatalaga i le tasi vaega o le prevention, i le tulaga lea i faamalosi tino. Ou te talitonu ua lava ma totoe lea faamalalamalama na avatu i lena vaega e tasi, ae na o se iota laitiiti lava lena o le prevention. Ona i ai lea o le manatu se i faasolo pea aua e tele le anoanoai o prevention activities ma prevention measures o lo o tauave nei e le Matagaluega ona o lea e matau atu, e le o silafia e le lautele o lenei fonotaga. Ua ou fiafia lava ina ua laga mai lea mataupu aua atonu o se avanoa lelei lea e mafai ai ona faavasega atu ituaiga puipuiga o lo o agai nei i ai le isi vaega tele o le seleni lea sa fesiligia, pe ua avea le faatino o le auaunaga o le faamamaina o le toto ma auala o le a le avea ai ma le lava ai se seleni e ave i le puipuiga po o le prevention. O lea la ua uma ona ou faailoa atu i le mamalu o lenei fonotaga, e leai e le faapena a o lea e taumafai e ave lua, ma o le upu moni lava e matua tele le anoanoai o le seleni lea e agai nei i le prevention po o le puipuia mai faamai.

O le vaega lona lua o le prevention ou te fia talanoa i ai lau Afioga i le Fofoga Fetalai, o le tulaga lea i tui puipuia o mea o immunisation. Mo se silafia o lenei Maota, o tui puipuia e pei lava ona faaigoaina ai o tui puipui, e puipui mai ai alo ma fanau mai mai ma puipui mai ai foi lo tatou atunuu lautele i faamai. E anoanoai la tui puipuia o lo o faagasolo nei, e le gata o lea e puipuia ai tamaiti ae puipuia ai foi tagata matutua e pei o le tui puipuia o le typhoid, o lo o i ai tui puipui o le TB po o le fatafata vaivai, o lo o i ai tui puipui e puipui mai ai le atunuu mai le faamai o le fiva samasama hepatitis. O lo o i ai foi tui puipui e puipuia ai tatou mai le misela. O lo o i ai foi le polokalame o tui puipuia e puipui ai le atunuu mai le mai pipili. O lo o i ai foi tui puipui e puipui mai ai tatou mai le mai lili.

A silasila la lau Afioga i le Fofoga Fetalai i le anoanoai o nei polokalame o lo o faagasolo nei mai lava i le pepe seia oo i le tagata matua, e anoanoai. E le faigofie la ma e le taugofie le faatinoga o lenei galuega. O le tulaga i tui puipuia nei meamanu ua maua foi lenei avanoa leaga e toatele matua ua pei ua taofi a latou tamaiti mai le tuuina atu e faatino i ai le auaunaga lea i tui puipui, ma o lo o i ai foi nisi talaiga sese lea ua tau faasese ai le atunuu e faapea e mamai ai pe tupu ai le mai.



18 MATI 2014

**Tulafono Tau Faaofi o Teuteuga o le Tulafono o le Faalapotopotoga  
Faavae Tau Fatugao a Samoa 2013 – faitauga faalua**

O la foi e tupu i Niu Sila le mea lena. O lo o i ai pea le vaega o le atunuu o lo o manatu o mea nei o tui puipuia e leai se aoga, ae silasila foi, o le tui puipui e faatino lea e le siama o lo o mafua ai le mai ma ua fai i ai aiaiga faasaaienisi e faavaivaia ai ma aveesea ai lona malosiaga na te faatupuina ai le mai lea. E pei la o le typhoid, e avatu le siama o le typhoid ona fai lea o le galuega i ai ina ia suia lona malosiaga ina ia aua ne i tupu ai se typhoid pe afai e tuu i totonu o lou tino. A maea la le galuega lea, ona tui loa lea o le siama lea i totonu o lou tino. O le taunuu atu la i totonu o lou tino o le a galue ai loa lou tino e fausia le autau e tetee atu ai i le siama lea. Ia manatua foi o le siama ua leai sona malosiaga? A o le a i ai pea lona malosiaga e faatupu ai lou mafai ma le atoatoa o lou tino e tetee atu ai i faamai e mafua mai i lea siama.

**FOFOGA FETALAI:** Malie lau Afioga i le Minisita, sei tuu atu le avanoa i le sui usufono mamalu.

**Tofa Lealailepule Rimoni Aiafi:** Faafetai i lau Afioga i le Fofoga Fetalai. O le galuega tonu lava lea a le Afioga i le Minisita e tataua ona fai i le televise i po taitasi. O lea ua matagofie le talanoa mai i le afiafi lenei ia tatou ua umi ai le tatou fonu, ae ai se manaia pe ana faasolosolo sana polokalame i po taitasi aua ua tele tui puipuia lau Afioga i le Fofoga Fetalai, ae ua pepesi le faamai mata. E i ai se tui puipui o le faamai mata? A o atu i le fale talavai ua leai ni vai e tului ai mata, e leai se tui e puipuia ai le tino vaivai, faafetai.

**FOFOGA FETALAI:** Na tuu atu le avanoa ae vaai atu e ese le mea lea e agai i ai lau faauilavea le sui usufono mamalu mo Faleata Sisifo.

Se i tulai mai lau Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai, na ou faalogo nei i le faamanatu a le isi toeaina. E leai lava se mea e te tau alu ai fua e tau sue se vai mata ona o la e tele vai mata. O le vai mata e masani ai tatou o le faatulutulu ifo o le suasusu o le loomatua, ona uma ai lava lea o le mai.

O le mea lea ou te fia fesili atu ai i lau Afioga i le Minisita, se i aumai lava sina au faamalalamalama ona o le taua tele ona o lea lava e alu atu le polokalame lea o le fonotaga i tua. O lona uiga e le tau moomia ai nisi faasalalanga i televise po o leitio ona o lea lava e alu atu polokalame o le fonotaga lenei, aua o le avanoa e le au maua lenei.

E i ai nai fesili faaopoopo ia faamolemole. E mafai ona e faalautele mai, o le a lea mai o le typhoid, o le fiva samasama ma le polio? E taua tele ona ua tele naunau tagata e gasegase ai ma avatu i le Kapeneta ina ia ave i ai se fesoasoani, a o lea ua maua e i ai vaega e mafai ai ona puipuia. E mafai lava ona faalauaitale gasegase nei ina ia malamalama atili ai le mataupu lenei?

18 MATI 2014

Tulafono Tau Faaofi o Teuteuga o le Tulafono o le Faalapotopotoga  
Faavae Tau Fatugao a Samoa 2013 – faitauga faalua

**FOFOGA FETALAI:** Tulai mai lau Afioga i le Minisita e faaauau le saunoaga.

**Afioga Hon TUITAMA TALALELEI TUITAMA:** Faafetai mo le faauilavea aua o le isi lea mea na misi ia te au, o le taugata o le faasalalauina i luga i televise ma luga o leitio, a o lea lava e avatu i luga i le televise ma le leitio. O le faalavelave foi e le o tofu aiga ma televise, e le faalogologo uma foi pe matamata uma i le televise, a o le aoga lea aua o lea e avatu polokalame i tua i nuu taitasi ina ia faasopolia le atunuu i tulaga ia. Faafetai i le faauilavea a lau Afioga i le Palemia, a o le a ou amata mai i le typhoid.

O le gasegase lea o le typhoid lea sa faaigoa e o tatou tuua sa tomua i malae i le tulaga i auaunaga faasoifua maloloina, sa taua e i latou ma o upu tuusao lea ou te tautala atu ai, sa taua o le palagaau. O le mafuaaga o le faaupuga e sau lava mai le uiga o le gasegase. O le siama e nofo i totonu o le taufale poo le intestine ma le puta. E nofo ai la e mitiia e mea o lymph glands e siomia ai totoga ia o le tagata, totoga ia e faamalu ai meaai po o le intestine. Ona fanafanau ai lea i ina ma faatupulaia ai. O le tulaga la e oo i ai pe a oo ina faaputu, faaputu ma ua tele anoanoai ma multiply le siama, ua amata loa ona palagia le intestine. Afai la e le togafitia, e oo lava la ina amata mai i totonu ona ati seia oo ina ati i fafo ma le taufale, ona afaina atoa ai lea o le manava. O i latou ua oo i le tulaga lea, e le i mamao tele atu foi isi o lea e maua ai. A o le tulaga foi lea, e faigofie ona salalau le siama lenei aua foi afai o lona uiga o totonu i le taufale lea e fanafanau ai, o le a mafai ona alu atu ma alu ese atu ma lou tino i otaota lafoai o le tino. O i ina la lea e mafua ai le tele o le pipisi ma e alu foi i le feau lata le siama. Afai la e le togafitia ma o le tulaga lea o lea e aoao atu ai pea e le Matagaluega ina ia aua le uivale, po o le otaota lafoai, aua le uivale, aua le alu fua i tuafale o le isi aiga.

Ou te taunuu tonu lava i Epadine ae sau loa le talaaga o le tautaua o Sikotilani aua e maua foi i atunuu malulu. Ua sau le talaaga o le tautaua o le isi fomai ona ua ia maua le mafuaaga na pipisi ai le typhoid i totonu o Epadine, ae na sue, sue, sue ma saili e lea alii ae maua ane o le apa pisupo e aumai mai South America. O le tulaga la na ala ai ona ulufale le siama i totonu o le pisupo ona ua maua i saililiga, a uma ona fai le pisupo ma faamau le ufiufi ona tao loa lea faavela le meat i totonu. A maea ona ave lea faasee i totonu o le vaivai lena e faapea o se vai e faamaalili ai. O le apa pisupo la ua le malu ona seal ua sao i ai i totonu le vai, a o le vai lena o lo o infection\_with typhoid bacteria. Ia, ona aumai ai lea i ina i Sikotilani ma pepesi ai i le vaimea lea o Sikotilani. O le auala foi la lea, o tatou, e mafua ona oo le siama i le vaivai po o le vaitaele po o tafatafa o le fale o le isi aiga, ona o le uivale i ai o tagata. E le faapea na o tagata matutua, e aafia ai foi tamaiti.

18 MATI 2014

**Tulafono Tau Faaofi o Teuteuga o le Tulafono o le Faalapotopotoga  
Faavae Tau Fatugao a Samoa 2013 – faitauga faalua**

A o le tulaga lea o lea e faamalasia atu ai, a uma ona faaaogaina faleletaua, fufulu mama lima i le fasimoli, aua e le iloa po o oe lea e carrier, aua e i ai i latou e taua o carriers. O le carrier, o le tagata na te feaveaia le siama lea ae le o i ai ni foliga o le mai e maua mai le siama lea. O lona uiga ua amata ona tau immune laitiiti lona tino ua le iloa ai o lo o maua i le gasegase lea ae o la e lava o lo o ia faasalalauina le faamai. E pei o le tagata foi lea o lo o carrier ae o lo o faafaigaluega i se faleaiga po o lo o ia gaseseina meatausami a le aiga, o le auala lena e pipisi atu ai ma aafia atu ai ma isi tagata. E tele la le aafiaga.

O le ala lea o lea e taumafai ai nei le taumafaiga o lo o i ai hot spots i totonu o Samoa i le taimi nei, e le tau atua igoa o afioga ia nei tei ua afaina ai o latou finagalo, ae o la e ua uma ona faamau, o lo o agai i ai fuafuaga a le Matagaluga o le Soifua Maloloina. O hot spots la ia, e mafua mai, o lo o tauave la i tulaga ia e taumafai atu pea ia tumama ma faamama aao pe a uma ona faaaogaina faletaele faapena foi i le tagofia o meatausami po o le vai.

O le isi foi la lena mea o lea e tau faaeteete i ai, a e silafia sa e i se fonotaga, e faatalofa atu i lea, faatalofa atu i lea, faatalofa atu i lea, e le iloa po o le tele o isi na e te faatalofa i ai e le i fafano, ona e alu lea ma oe i lou aiga ma afaina ai lou aiga. Aua o tulaga uma lava ia o puipuiga, prevention.

O lona lua lau Afioga, o le TB.

**FOFOGA FETALAI:** Ioe lau Afioga e i le Minisita ua ou tatalo atu ma le agaga faaaloalo, ou te manatu ua matua malamalama le Maota i le tulaga o le prevention, pe a pe a e finagalo malie ua lava ia le typhoid e faamalalamalama le tulaga tau prevention, ae ona o le naunau i le tatou taimi, ona o le tatou Tulafono Tau Faaofi o lea ua matua malamalama ma manino le Maota i le atugaluga o le Maota i mea tau prevention. O lea foi ua tau agai lau Afioga e laulau mai, o lona uiga a laulau uma faamai nei o lona uiga e uma le tatou Fono e lei uma le folasaga. Ae tatalo atu ona o lea e taatia le tatou Tulafono Toe Teuteu i Fatugao, e manaia pe a e saunoa sao i le prevention o fatugao ae taatia uma isi tatou gasegase e i ai isi taimi e le uma ai a tatou Fono.

O le tatalo atu lea ma le faaaloalo i lau Afioga i le Minisita, ni a fa au, ua malie le faafogafoga, ou te manatu foi o avanoa le au maua, ae ona ua faaopoopo le tatou Fono ona o le taimi i le tulituliga o le tatou galuga ma le faaaloalo. Sei tulai atu le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, sei maea lava nai mea ia, ona o le taua ia o le ala foi lena sa ou tulai atu ai.

18 MATI 2014

Tulafono Tau Faaofi o Teuteuga o le Tulafono o le Faalapotopotoga  
Faavae Tau Fatugao a Samoa 2013 – faitauga faalua

E i ai le polokalame lea e fai nei o mea o tui puipua, ma ou te tau atu lava ua agai ina toatele, o le tele o vaiaso e silia i le sefulu gasegase e ave i Niu Sila, o le matua taugata lava. Ae mafua mai i gasegase nei, ae taua lava aua o lea foi e faafogafoga le tatou atunuu, o le taua ia, toe lua lava nai mea ia sa ou fesili atu ai sei maea mai lava ona o le taua tele i le matou faalogologo atu, aemaise foi le faafogafoga mai a le atunuu.

**FOFOGA FETALAI:** Ia, tulai maia lau Afioa ae faapuupuu mai.

**Afioa Hon TUITAMA TALALELEI TUITAMA:** O lea lava ou te i lalo o tui puipua, ae leaga o lea e faamalamalama faamai ia o lo o i ai tui puipua e puipui mai ai le atunuu. O lona lua la o faamai e faaaoga i ai le tui puipua, o le TB po o le tuberculosis, o le faapuupuu lea o le TB. Ia, o le fatafata vaivai sa taua ai e tatou, ae mo le silafia, o le TB e le na o le mama e aafia ai, e aafia ai lava so o se itutino, e oo foi i le taufale, e oo foi i le pau, e maua ai foi i le TB, e i ai foi le TB o le pau ia e tai foliga o se toga po o se matapapala, ae o le TB o le siama e mafua ai.

O le siama la lenei o le TB, o lo o tele ina feaveai ma o lea ua amata ona mou atu ona o le tele o vailaau fou sa maua ai, a o le taimi nei o lea ua amata ona toe faatupulaia i le taimi nei, ona ua le agai foi i ai mafaufau o le tele o tagata e puipui ai latou, ua mua ona agai mafaufauga o tagata i le HIV ma faamai o lea ua taatele nei ma faafefe tagata ia i tatou, pei ua galo ai i tagata, o lea lava e ia tatou le TB. O le TB la, o le siama lea po o lea e taua e nisi pei o le faaupuga o le typhoid, po o le mamapala, ona e matua faaleagaina ai ma pala ai vaega o le mama e aafia i lenei faamai. A o le tele lava o lenei faamai, e mafua mai, e mafai ona feaveai i le anuvale. Aua o le tele o le fatutale, a tale, sau le fatutale, o le tele o le fatutale lena o lo o tauave ai le siama pe a faapea o oe e te lavea i le TB. O a la uiga o lea faamai? O uiga vaaia la o lea faamai, o le tino ua amata ona fai atu le tino po ua tino vale le tagata, ua amata ona pei ua pale pe ua pula le tino, pae ma ua le manogi se tausami, a o le tale lava seia iu ina anutoto ma faaumatia ai lava le soifua o le tele o nisi tagata.

O le tasi faamai o lo o ave i ai le taumafaiga o le puipuiga o le hepatitis po o le fiva samasama. E ala ona tau o le fiva samasama aua foi e afaina uma ai lou tino pe a afaina le ate. O le siama lea na te infect ina pe aafia ai le ate. A o le tele o i latou e aafia ai, e feaveai i le toto aemaise le tele o tagata manunua, o le mea foi lea e ala ai ona faaeteete le soona fetagofi i e o lo o faamanualia ma piliki po o lo o i ai le toto, aua e tatau foi ona puipua oe aua e le iloa po o i ai le siama lea i i a o lea o le a e tagofia nei ma e tei ua ave lena ma auala e sao atu ai le siama i totonu o lou tino ma afaina ai oe.

18 MATI 2014

**Tulafono Tau Faaofi o Teuteuga o le Tulafono o le Faalapotopotoga  
Faavae Tau Fatugao a Samoa 2013 – faitauga faalua**

O uiga la ia e le gata ina tiga lou itu taumatau i lalo ifo o lou oo aua o i ina tonu e nofo ai le ate, ona ua faatupulaia ma fufula pe fefete le ate ma tiga, e fiva ma amata ona samasama mata. O mata lava e amata ona iloa ai e isi le aafia i le tulaga lea pe a tilotilo atu ua amata ona samasama mai mea papae foi nei o mata. O lona uiga ua aafia i le fiva samasama pe o se isi aafiaga o le ate e tai foliga faatasi ma le fiva samasama. O lea la faamai, e mafai foi ona puipuia i le tui puipuia o lea e faagasolo nei mo tamaiti i le puipui mai le aafiaga o le faamai lea o le hepatitis. Ae ia manatua foi, e le tasi se ituaiga hepatitis, tusa e tolu ituaiga hepatitis, o le A, B ma le C. O le hepatitis C la, o le precaution lena po o le amataga lena o le cancer o le ate, ae feaveai lava e le siama lea e aafia i totonu o le faavasegaga lena o ituaiga fiva samasama nei e tolu o lo o taatele, o le A, B ma le C, o i latou na o lo o aafia i le fiva samasama.

Lau Afioga i le Fofoga Fetalai, o le a faagata ai la i i se faamalamalamaga e tusa ai ma le faafesili ma le faauilavea a le Afioga i le Palemia, ae o le a ou see atu i le isi ituaiga puipuiga. O le isi puipuiga o lea ou te fia faailoa atu, o tulaga nei i le tapaa. Ia manatua foi, o lea ua uma ona tatou pasia le Tulafono o le Tapaa. Aisea na fai ai le Tulafono? O le faamoemoe o le tatou Matagaluega, ia puipui mai ai le Matagaluega mai le aafiaga o le tapaa. O lea la ua fau ai le Tulafono ina ia puipuia ai oe mai le aafia fua i le tagata ulaula pe afai e te le ulaula ae aafia ai fua oe e te le ulaula. O lena e avatu i totonu o le tatou Tulafono, e faasa ai le saoloto o le ulaulaina o le tapaa i totonu o nofoaga faitele, po o totonu o pasi, po o totonu o taxi, po o totonu o faletifaga po o totonu o ni taligamalo. O totonu foi o malae vaalele i le mea e tumutumu ai tagata, e le tatau ona ulaina ai se tapaa. Ma ou te faapea atu, o lea ua maea nei ona tapena le Regulation, afai loa e amata ona faamamalu le Regulation, o lona uiga o le a mafai loa ona molia i latou e solia Tulafono nei. O le puipuiga foi la o le fanau mai ia aafiaga, lea e faasa ai le tamaitiiti ona alu e faatau le sikareti taitasi, faasa ai foi le faleoloa ona faatau taitasi le sikareti. O puipuiga uma ia, o mea ia o puipuiga e ala ai ona fai le Tulafono lea e puipui mai ai le mamalu o le atunuu mai le aafiaga o le tapaa.

**FOFOGA FETALAI:** Malie lau Afioga i le Minisita mo le Soifua Maloloina sei tuu atu le avanoa i le Afioga i le Sui Palemia.

**Tofa Hon Fonotoe Nuafesili Pierre Laufofo:** Lau Afioga i le Fofoga Fetalai, ona o lea ua oo le saunoaga a le Minisita i le tulaga lea o pepa tapaa mo le puipuiga. E faafesili atu i mea o Tulafono Faatonutonu lea sa taua, pe manaomia ni lapataiga foi nei i luga o pepa sikareti po o pepa tapaa lea e te taua? O i ai i totonu o tatou Tulafono Faatonutonu se aiaiga faapena? O le faafesili lea lau Afioga.

18 MATI 2014

Tulafono Tau Faaofi o Teuteuga o le Tulafono o le Faalapotopotoga  
Faavae Tau Fatugao a Samoa 2013 – faitauga faalua

**FOFOGA FETALAI:** Ia, tulai mai le Afioga i le Minisita e faaauau lau folasaga.

**Afioga Hon TUITAMA TALALELEI TUITAMA:** Faafetai mo le saunoaga a le Sui Palemia. O le mataupu lea ua leva ona fefaloai ma le kamupani o lo o faia a tatou sikareti. Ia manatua foi, e le faigofie le tatou Tulafono Faatonutonu ia o lea e suia ai ata o lo o i tua o le pepa sikareti, ma o lo o i ai foi ma le pepa o le warning i totonu o le sikareti. E ui lava la i ia faigata, a o lea lava ua augofie le kamupani e faatino, ona o tulaga o le Tulafono ua uma ona pasia ma o lea ua aumai ne i e le tatou Tulafono Faatonutonu. O Ausetalia lava ia, o lea ua amata, o le isi laasaga tele lea ua ausia e Ausetalia o le sa ona toe i ai o ni faaupuga i tua o le pepa sikareti, a ua ave le sikareti i mea o plain packages, e le toe i ai ni igoa ma ni ata faatosina ae ua pei lava o se isi atigipusa foi lele o lo o faatau ai le sikareti.

O le tulaga ia Niu Sila ia ua uma ona declare le latou... o le 2025 e oo atu i ai ua faaitiitia mai le latou tapaa i le 5% o le population e ulaula ai. Mo i tatou, o lo o taumafai pea le taumafaiga ae le faigofie. Ae ua ala ona ou taua le tapaa, ona o le tasi lea puipuiga o lo o tapenaina e le tatou Matagaluega ia i latou e le o silafia le tele o le afaina e maua i le asu o le sikareti, aemaise o fanau iti pe afai e tasi se tagata e ulaula i totonu o se fale e tasi. Ou te talitonu ua faamanu tagiao foi se leo i totonu o lenei Maota i le faamanatu atu pea, o le sikareti, e tutusa ma le 400 vailaau e ono mafua ai le cancer o lo o i ai i le asu o le sikareti, e le gata i le o lo o ulaina le sikareti, a o i latou o lo o latou manavaina le asu lea, e le faapea foi o le tele o vailaau ia e i ai ni o latou tino vaaia, aua e gata lava lau vaai i le asu i le taimi faatoa tuua ai le fofoga o le tagata, ae oo loa ina salalau atu i le pito lale, e le toe iloa se asu, ae o la lava e taamilomilo ai ia vailaau nei i totonu o le ea ma mafai ona e manavaina pe afai e te manava mai i le la pito po o le la pito. Ia a o tulaga matautia lea o le sikareti, o lea e le o lausilafia ia pe faatauaina e le tele o tagata.

O le isi vaega lau Afioga, o le tulaga ia i Tulafono o Meataumafa, lea sa ou taua nei lava ia le typhoid, ia o le tasi lea auala e salalau ai, o meataumafa, aemaise o le gaosiga i totonu o faleaiga ia ma le gaosiga foi i totonu o aiga pe afai o lea e tauave e se isi ia le faamai. O lea ua uma foi ona pasia le tatou Tulafono o Taumafa, o le tasi lena taumafaiga o puipuiga, puipui mai ai i faamai. A silasila la i le lautele o le galuega puipui lea o lo o agai i ai le Matagaluega, e le o se tamai galuega, pei lava o mea o lo outou fofoga taumafa, o tapaa, ia o lo o i ai foi le Tulafono o Narcotics po o vailaau. O le mafuaaga foi o ia Tulafono, ina ia puipuia ai ia le aafia o tupulaga i vailaau faasaina, aua o le tasi lea vaega e aafia ai fatugao, o le tausami foi ma mea tausami e aafia ai foi fatugao. O tulaga foi i mea ia o le tapaa, e aafia foi le fatugao, e ono maua ai le cancer o le fatugao.

18 MATI 2014

**Tulafono Tau Faaofi o Teuteuga o le Tulafono o le Faalapotopotoga  
Faavae Tau Fatugao a Samoa 2013 – faitauga faalua**

Lau Afioga, o le isi vaega ou te fia oo i ai se tautalaga, o lea ua uma ona tatou pasia foi le Tulafono o le Health Promotion Foundation. Ia o le isi vaega tele lea o le puipuiga ua faapitoa i ai se faamoemoe o le a latou tauaveina ma latou mataituina ia le faatinoga o nei Tulafono uma ua uma ona fai mo le puipuiga o le soifua o le tagata. A o lau talosaga le mamalu o lenei Palemene o lo o faafofoga mai foi le atunuu i e o lo o mafai ona maua ia lenei avanoa, o lau talosaga, o le puipuiga, muamua, o oe lava, o oe lava ma totonu o lou aiga. Pei lava ona ou fai atu, e faigofie ona o atu Matagaluega faasalalau i TV, o atu ma tautau atu, faafeiloai fai fonotaga ui i ekalesia, o lea matou te galulue faatasi foi ma ekalesia e galulue i tupulaga i mea ia, tapaa, ava malosi, ia o puipuiga mai i faamai pipisi lea e feaveai i feusuaiga le talafeagai, tasi lena auala o puipuiga. O le anoanoai o nei auala e fai, ae afai ae le mafai, ona o atu lea o le Matagaluega e tilotilo i le faatinoga o mea ia, o lea e lafoai atu i le tofa ma le faautautaga i matua, o matai, o taitai o nuu ma aiga, o latou ia o lo o i ai le faamoemoega e puipui ai le soifua manuia o tagata Samoa. O lona uiga, o le galuega fai faatasi a tatou uma, tatou uma tatou te galulue o oe lava ia ma lau fanau, ia e mautinoa, e le o soona ta saoloto i masima, e le o le soona saoloto i meaai suamalie, e le o soona saoloto i meaai taumafa lololo.

**FOFOGA FETALAI:** Malie lau Afioga i le Minisita, sei tuu atu le avanoa i le faauilavea a le sui usufono mamalu.

**Afioga Hon Aeau Peniamina Leavaiseeta:** Lau Afioga i le Fofoga Fetalai, sei malolo lau uo. Lau Afioga i le Fofoga Fetalai, ou te maitau atu i le Afioga i le Palemia ma le Sui Palemia e fiafia tele e faafofoga i talaaga o faamai nei. Ua ou tulai atu, ona o vaega nei ua pasi uma, e tusa o le tatou mea lea e fai o le first year o le medical school, o le vaega la lenei ua pasi uma le first year lau Afioga, ae pei ua umi tele o le fia faafofoga o le aualii ia, aua leaga e le o se mea lea a le Palemene e fai. O le faiga o tatou galuega lea ua maua e fai i tua, ae le faia i i.

**FOFOGA FETALAI:** O lea ua maua le faauilavea le sui usufono mamalu, ae sei tuu atu le avanoa i le Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai, o le mea lea e talanoa mai i ai le Minisita o lea e faamalamalama le upu lea, prevention, lea sa saunoa manino mai i ai ia le sui usufono mo Faleata Sisifo, lea sana faitioina, o le lē lava o mea ia o auala e puipuia ai ia mea nei o faamai. O lea la e taumafai le Minisita e tau atu le tele o galuega ia e faatino, e le o malamalama i ai le Itu Agai, aua ana le fesili le Itu Agai, e le faamalamalama. Vaai la i le taua tele.

18 MATI 2014

**Tulafono Tau Faaofi o Teuteuga o le Tulafono o le Faalapotopotoga  
Faavae Tau Fatugao a Samoa 2013 – faitauga faalua**

O lea la e foliga mai e le o malamalama le sui usufono mo Faleata Sisifo, ae o lea e fai mai ia le Sui Taitai, o le matua malamalama, pasi uma outou. O le mea moni, o lea e aoga tele lea e le gata i le Itu Agai a o le faafogafoga mai foi a Samoa, aemaise lava le finagalo lea sa faaalia. E taua ia o le finagalo lea sa faaalia e le sui usufono mo Faleata Sisifo, o mea nei e tatau ona faasalalau atu i le atunuu. O lea la e faatino le faasalalau lea. O lona uiga, o le matua tele o le aoga o le Tulafono lenei. E le gata ina malamalama ai le Itu Agai, ae malamalama ai foi ma le atunuu atoa.

**Tofa Levaopolo Talatonu:** Lau Afioga i le Fofoga Fetalai...

**FOFOGA FETALAI:** Malo. Malie le sui usufono mo Gagaemauga Nu. 2, sei tuu atu muamua le avanoa i le faauilavea a le Afioga i le Tuiatua Faanofonofu, tulai mai le sui usufono mo Aleipata Itupa i Lalo.

**Afioga Tafua Maluelue Tafua:** Faafetai lava i lau Afioga i le Fofoga Fetalai. Ua manaia foi le faalogologo i lenei afiafi i le saunoaga a le Afioga i le Minisita mo le Soifua Maloloina, ma e atonu o lea e i ai lava nai mea tau relevant i le saunoaga a le Afioga i le Minisita, aua o lea ou te faitau atu o le numera 12 lea ua i ai le tatou faasologa, Tulafono Tau Faaofi o Teuteuga o le Tulafono o le Faalapotopotoga Faavae tau Fatugao a Samoa 2013 faitauga lona lua. O lea lava la atonu o lea e alu i luga o le laina le faamalamalama a le Afioga i le Minisita, ae manaia foi i lau faalogologo ona e talu ai e leai se totogi o lea e free consultation le mea lea tatou te faafogafoga i ai aemaise o le atunuu. E ui lava e faatagiao le saunoaga o lea o le a alu le tolu itula, ia ae e tasi lava lau fesili ma le faaaloalo lau Afioga i le Minisita, o le tulaga lea e i ai le gasegase lea o le nunu i Samoa, tasi lea faamai o le matua maoae le tele o tagata e maliliu o le tatou atunuu – ma atonu o i tonu lava e aoga ai se saunoaga a lau Afioga i sina faamalamalama puupuu i le nunu le mafuaaga o le nunu, ia aemaise o lea e aafia ai foi le fatugao e relevant i le tatou Tulafono lea e talanoa i lenei afiafi? Ma lou faaaloalo lava. O le aoga o le fatugao o ona tiute tauave i le tino o le tagata aemaise lava i le nunu, o lea e tele tagata maliliu o Samoa, ia saunoa i se vaega foi lea e puipui ai le nunu, ma le faaaloalo.

**FOFOGA FETALAI:** Malo. Tulai mai le sui usufono mamalu mo Gagaemauga Nu. 2.

**Tofa Levaopolo Talatonu:** Lau Afioga i le Fofoga Fetalai, leai faafetai lava i le Afioga i le Minisita, ona o au lea sa taua foi le vaega lea o le prevention, po o le puipuiga o le puapuagatia o le atunuu.



18 MATI 2014

Tulafono Tau Faaofi o Teuteuga o le Tulafono o le Faalapotopotoga  
Faavae Tau Fatugao a Samoa 2013 – faitauga faalua

Lau Afioga i le Fofoga Fetalai, e leai lava ma se isi o le Itu Agai na fia malamalama i le mea lea e tau o le prevention, e matou te malamalama uma lava. Na pau lava le vaega lea sa avatu ai sa matou tuualalo, ia faataua i le Afioga i le Minisita le faatinoina o le mea e tau o le prevention, ia aua ne i toe tele tupe a le Malo e alu i mea ia i le faamama toto, pei o le vaega tonu lena. Ae ua faataliga tagiao foi ia le...na fai foi i le isi Fonotaga lea na tea nei ma tua atu, ua ta le lava faalogologo i lea mea.

**FOFOGA FETALAI:** O lea ua maua le finagalo o le sui usufono mo Gagaemauga Nu. 2. O le taumafai mai o le Afioga i le Minisita ona o le saunoaga a le Afioga i le sui usufono mamalu mo Faleata Sisifo na agai sao e faauigaina le TV, o lona uiga na o le TV o la e fai ai prevention. A o lea na faamatala auiliili nei e le Afioga i le Minisita, e le na o le pau lena o le mea lea e agai i ai le prevention a le Matagaluega, o lea na ala ai ona tuu atu pea le avanoa, o siva faamalositino, o aoga i tua, o a uma tui puipuia, o asiasi tumama, o aoaoga ma faleaoga ma mea uma, lea na ala ai ona mafua ona talatala ma faamalamalama lelei le Afioga i le Minisita. Ae onosai mai le tatou Maota, o lea ua lamalama faaiu le saunoaga a le Afioga i le Minisita, ia ona manino ma malamalama uma ai lea o le atugaluga o lea tou te atugaluga i ai.

Tofa Lealailepule Rimoni Aiafi: Faafetai lava i lau Afioga, lau Afioga, leai o le mafuaaga o le laga atu i le itu lenei o le puipuia prevention ma le taumafai mai o le Afioga i le Minisita, ona foi lea e tatou te tilotilo i results i le taunuuga. Afai o le taunuuga o lea e faatupulaia le au-Dialysis le au Faamamatoto, o i ina la. O lona uiga, e le o le work faatasi mea ia e saunoa i ai le Minisita, a? Aua ana faapea o lea e ola ai ..., ou te faafetai i ai, a o le iuga o nei mea, o lea e faaumiumi, e manaia foi i le faalogologo o le alualu pea i luga o le tele o i latou o faamama toto, faafetai.

**FOFOGA FETALAI:** Ia o lea ua maua le saunoaga a le sui usufono mamalu, ia sei tulai mai le isi fomai lea e i tua, tulai mai le sui usufono mo Palauli.

Afioga Afoafouvale John Moors (Palauli): Lau Afioga i le Fofoga Fetalai, e tulai atu e faatu le lafo, *Ina ia toe faapoopo se taimi o le Minisita.*

Ma lou faaaloalo lava.

*E lei tuuina atu le fesili i le lafo.*

**FOFOGA FETALAI:** Faafetai Palauli. Sei tulai mai foi le isi fomai lea.

18 MATI 2014

**Tulafono Tau Faaofi o Teuteuga o le Tulafono o le Faalapotopotoga  
Faavae Tau Fatugao a Samoa 2013 – faitauga faalua**

**Tofa Tuisa Tasi Patea (Sagaga le Falefa):** Faafetai mo le avanoa i lau Afioga i le Fofoga Fetalai, e ese le taua o le mataupu leni o le puipuiga, ua maua atu foi i le saunoaga matagofie a le Afioga i le Minisita, pei e le o avea se faamamafa i le ava malosi. O le ala la lea o le fesili ona e ese le taua foi o le ava malosi i le aafiaga o le fatugao. Pe mafai lava ona faalautele mai lau Afioga i le Minisita, po o le a tonu lava le vaega o le ava malosi lea e aafia ai le fatugao, aua o le toatele lava o le Vaega Faaupufai lea e fetagofi i le ava malosi, ina ne i te i foi ua toe aafia ai se fatugao o se isi, i le ava ma le faaaloalo, faafetai.

**FOFOGA FETALAI:** Malo, o lea ua maua. Tulai mai le sui usufono mo Aana Alofi Nu. 3.

**Afioga Toeolesulusulu Cedric Pose Salesa Schuster (Aana Alofi Nu. 3):** Faafetai lau Afioga i le Fofoga Fetalai mo le avanoa. Leai e faafesili e tusa ai foi o faiga faavae ma taualumaga a le Fono, e maitau atu o nisi o sui usufono o lo o tulai mai e lei lauga i lea mataupu. Pe faatagaina e lau Afioga i le Fofoga Fetalai ona faaopoopo ni o latou manatu a o lea ua tali le Afioga i le Minisita, faafetai.

**FOFOGA FETALAI:** Ia ona o le taua tele o le tatou consultation lea e fai o lea lava e tatala le avanoa i mea tau fomai, ae ua leva o lea ua outou faafofoga mai ua uma ona ou talosaga i le Afioga i le fomai le Afioga i le Minisita mo le Soifua Maloloina e faauma maia lana tali.

Ia lafo atu ia i lau Afioga i le Minisita mo le Soifua Maloloina e faaii maia le saunoaga.

**Afioga Hon TUITAMA TALALELEI TUITAMA:** Faafetai lava i lau Afioga i le Fofoga Fetalai. O lea sa ou tau faaiiui a o lea ua toe faaopoopo mai ia isi vaega ia, ae e tusa lava ma tulaga masani o a tatou Fonotaga, ia o le a ia te au le faitalia pe ou te tali i ai pe leai, ae afai lava foi ou te tali i ai, leaga o lea sa ou taua foi muamua i isi au faamalamalamaga ia vaega ia o lea ua toe fesiligia ai.

Lau Afioga i le Fofoga Fetalai, ia atonu o lea ua manino le tulaga o le puipuia po o le prevention, ia le auala lava lea sa tau avatu e taumafai e faamanino atu ona o lea e vaapiapi ia le silasila a le Maota i le tulaga puipuia e peiseai o se galuega faatauvaa ma le laitiiti. O le agaga la lea sa taumafai i ai e fofola atu se ata lautele sei silasila i ai ma le vaevaega o le tamaoaiga ma le seleni a Samoa o lea e faasafua i ai, aua o nei galuega uma, o tupe uma lava ia e faatino ai, tai pei foi ona ou avatu i le taimi muamua, e laitiiti lava se vaegatupe lea pe a faatusatusa lea e alu i le faamamaina o le toto pe a faatusatusa i le anoanoai o le seleni lea o lo o alu i tulaga o le puipuiga. Ma o le faafesili lea e faapea mai, aisea ua...

18 MATI 2014

**Tulafono Tau Faaofi o Teuteuga o le Tulafono o le Faalapotopotoga  
Faavae Tau Fatugao a Samoa 2013 – faitauga faalua**

**FOFOGA FETALAI:** Sei tulai mai le sui usufono mamalu, malie lau Afioga i le Minisita.

**Afioga Toeolesulusulu Cedric Pose Salesa Schuster:** Faafetai i lau Afioga i le Fofoga Fetalai mo le avanoa, e faafetai atu i le Afioga i le Minisita mo le faamalamalama. E agatonu se manatu lau Afioga i le Fofoga Fetalai ona o lea ua taua e le Afioga i le Minisita le vaega o seleni o lo o faaluina i le faamamaina o le toto. Peitai lau Afioga i le Fofoga Fetalai, o se manatu sa paia foi i se tuualalo a lenei Itu, o le vaega lea i le faaitiitia o seleni, aemaise e fitoitonu i le tatou Tulafono Tau Faaofi ona o lea ua taua mai le toafitu o i latou o le Komiti Faafoe. O le tuualalo sa tuu atu pe mafai ona fuafuaina le vaega lea o le tele o le seleni e alu ese mai le faatinoina o le faamamaina o le toto. A o lenei Komiti Faafoe pe fia seleni o le a alu ai i le faatinoina ma le faaogaina o tiute o lenei Komiti Faafoe, a o lo o moomia le fesoasoani i le faamamaina o toto mo i latou o lo o gasegase o le atunuu. Faafetai.

**FOFOGA FETALAI:** Ia, tulai maia lau Afioga i le Minisita e faaauau mai le saunoaga.

**Afioga Hon TUITAMA TALALELEI TUITAMA:** Ia, pei e maniti ota tino i lea ituaiga faafesili lau Afioga ona o lea faatoa sau nei faapea e sili ia ona ou amata atu i i, e ui lava o lea e solitulafono le fesili, e le o le taimi lenei e tataua ona aumai ai. Silasila lau Afioga, a oo loa ina faamasino tiute ma galuega fai, o ai na te fuaina le mea lena? Ae mafai ona faafesili tatou ia tatou po o a tatou mea ia e fai? Ae fia le tupe lea e alu i le totagiina o tatou? O tagata faigaluega uma ma a latou matafaioi, ua uma ona i ai taiala ua faataoto e pulea ai ma seleni faaagaaga mo le faatinoga o na tiute. A o tulaga tatou te tilotilo agai i ai, o le a le fua la o lena tupe faaalu? Ia, sei ou avatu se tala faataitai; ua uma ona ou tau atu i le taimi ua mavae, o le tupe lea na amata ai le fale lea i le 2005, e \$5miliona, e oo mai lava i le aso, o lea ua 75 gasegase o lo o i ai, o lea lava e \$75miliona. E le o se ata faataitai la lena o le tele o le seleni o lea e faasaoina, aua afai e fua i le 6 mai lea sa togafitia, o lona uiga la i le taimi lenei, o lea ua faafia? Ua ova i le faasefulu toetiiti lata i le faaluasefulu le \$5miliona lea, a o lea e \$5miliona lava. E le o le fua lena o galuega aoga lea e fai nei a le Komiti Faatonu ae toafia i latou ia e faia? E toafitu. O le a le uiga o lea ituaiga mea? Ta te maasiasi i lagona faapea, aua a tatou o loa e faamasino tagata ma a latou galuega faatino po o faapefea ona faatino, o le mea lena na o le Atua na te silafia.

O le mea lea lau Afioga i le Fofoga Fetalai, e lagona lou faanoanoa i ia ituaiga mafaufauga faapea pe afai e filogia ai se galuega lelei ma se taumafaiga lelei o lea e faamaonia mai le agai i luma o le lelei o le auaunaga lenei, ma le lelei pulea o ana seleni faaalu, talu ai o le faateete ma le fai alofa i le utiuti o le faaso a Samoa.

18 MATI 2014

**Tulafono Tau Faaofi o Teuteuga o le Tulafono o le Faalapotopotoga  
Faavae Tau Fatugao a Samoa 2013 – faitauga faalua**

Na pau lea o sau tali i le tulaga lea, ae o le a faaauau lau faamalamalamaga i le tulaga e tali atu ai pea i mataupu sa laga.

Lau Afioga, ou te talitonu o le a ou alu ese mai le prevention, o lea ua lava ma tataua ona nofofale ia Satuiamaa se taumafaiga o lea sa taumafai atu ai e faailo atu le anoanoai o le galuega o lo o fai nei, e agai lava i le tulaga o le puipuiga po o le prevention. Ma e le pau ai lea lau Afioga, ae ua ou faapuupuaina atu ona o lea ua e saunoa e tusa ai ma le manumanuga i le tatou taimi.

Lau Afioga sa i ai le atugaluga o le sui usufono mo Gagaemauga Nu.2 i le tulaga o mea o apa foi nei e faatau faapea o la e i ai ni apa meaai o faatau e leai ni label. Ia, e le o se galuega a le Soifua Maloloina le o e taamilomilo i faleoloa ma vaai fata o lo o teu ai apa nei pe i ai ni apa e leai ni label ae i ai ni apa... O le galuega lea e fai o le galuega faitele aemaise o le tagata faatau o lana matafaioi lea, aisea le mea o le a faatau ai lea apa ae leai se label o i ai? E faapefea ona iloa o le mea la e i totonu o le apa o le mea tonu lea o lea e manao i ai?

**Tofa Levaopolo Talatonu:** Lau Afioga i le Fofoga Fetalai o le mea e fia faasao.

**FOFOGA FETALAI:** Malie le sui usufono mo Gagaemauga Nu.2 o lea o le a uma mai le faamalamalamaga a le Afioga i le Minisita ona tuu atu lea o le avanoa.

**Tofa Levaopolo Talatonu:** Ona o lea o le a sese tele lava le agai a le Minisita i le mataupu lea lau Afioga. Lau Afioga i le Fofoga Fetalai...

**FOFOGA FETALAI:** O le a le mea na e saunoa i ai le sui usufono mo Gagaemauga Nu.2?

**Tofa Levaopolo Talatonu:** Ma le agaga faaaloalo, ou te le i fai atu a mea e i ai ni apa e le o i ai ni label. Masalo ua matua foi le Minisita. O le agaga tonu sa avatu ai se lagona, o apa meaai foi nei e aumai e faa-Saina uma label, lea sa avatu ai le tuualalo sei silasila ifo i le tulaga ina ia manino lelei lo tatou atunuu pe afai e o e faatau apa ia, ia latou silafia lelei le apa e taumafa ai ma apa ua expire ma apa e le i expire.

**FOFOGA FETALAI:** O lea ua maua le finagalo o le sui usufono mamalu lau Afioga i le Minisita. E i ai label i gagana a atunuu ese, o le faasaoga lena o le mea na saunoa i ai le sui usufono mamalu.

**Tofa Levaopolo Talatonu:** O le isi la mea lau Afioga i le Fofoga Fetalai, e faamalulu atu o lea ua saunoa le Minisita e le o se galuega lena a le Matagaluega o le Soifua Maloloina, a o le galuega a ai? O le galuega a ai e silasila lelei i taumafa e taumafa ai le atunuu? Ma le agaga faaaloalo.

18 MATI 2014

**Tulafono Tau Faaofi o Teuteuga o le Tulafono o le Faalapotopotoga  
Faavae Tau Fatugao a Samoa 2013 – faitauga faalua**

**FOFOGA FETALAI:** Ia, o lea ua maua le finagalo o le sui usufono. Tulai mai le Afioga i le Minisita.

**Afioga Hon TUITAMA TALALELEI TUITAMA:** Ua uma ona faasalalau tulaga o taumafa, o lea ua i ai le Tulafono o Taumafa e puipuia ai le vaega lea, e sa ona faatau ni apa e leai ni igoa, e tataua ona i ai i luga o le label o le apa po o le meataumafa le aso na fausia ai ma le aso e gata ai lona aoga, ma le vaitaimi e sili atu ona lelei ai lona faaogaina. O vaega uma ia o lea ua i totonu o le tatou Tulafono lea na tatou pasia nei. Lau Afioga, o le fesili mai, o le a le galuega a.... a le galuega lena ua uma ona fai atu, lea e sa mea ia.

**Tofa Levaopolo Talatonu:** Lau Afioga i le Fofoga Fetalai, o le Minisita, o le matua lelei lava o le theory a o le practical o le matua oti lava. O le mea lena o lea ou te vaai atu i ai i le Afioga i le Minisita.

**FOFOGA FETALAI:** O lea ua uma ona avatu le faamalamalama le sui usufono mo Gagaemauga Nu.2, o lea e agai mai le Minisita o le galuega e faifaatasi e le na o le Soifua Maloloina, o le galuega foi lena a le faioloa ma i latou o lo o tuua oloa i luga o fata o le vaavaai i le manufacture date ma le expiry date. Ia tulai mai lau Afioga i le Sui Palemia.

**Tofa Hon Fonotoe Nuafesili Pierre Lauofo:** Lau Afioga i le Fofoga Fetalai, ua ou tulai atu e fesoasoani atu i le mataupu lea, mo le silafia e le sui usufono mo Gagaemauga Nu.2, o lea ua uma ona pasia le mea e tau o le labeling standards, o lea ua i ai. O le tulaga tonu lava lena o lea ua toe faamalosia atili i totonu o le Tulafono lea e saunoa i ai le Afioga i le Minisita, o le Tulafono o Taumafa. O labeling standards la na o lea ua i ai uma lava i totonu mea ia pei ona saunoa ai, ma isi lava mea, tusa e faamatala mai ai le tulaga o mea la e i totonu o le apa taumafa ma tulaga faapena o lo o i ai uma. E faapena foi le ata o le label ma mea uma o lo o faamatalaina ai i luga.

**FOFOGA FETALAI:** Ia, tulai maia lau Afioga i le Minisita e faaauau lau folasaga.

**Afioga Hon TUITAMA TALALELEI TUITAMA:** Faafetai. Ia o lena ua faamalamalama atu, a o le tiute lava o le tagata faatau, a vaai atu e le malamalama i mea la e i totonu o le apa ae faatau lava e le malamalama i ai? O lona uiga e tataua ona alu muamua e ao le faa-Saina po o le faa-Iapani ona sau lea tilotilo i le apa ma malamalama i mea la e i totonu o le apa ona faatau lea. A e faatau atu la le apa e le tutusa mea ia e i totonu o le apa ma mea la e tusi mai fafo, ia, o le tiute o le tagata faatau le lipoti i authorities talafeagai mo tulaga faapena.

18 MATI 2014

Tulafono Tau Faaofi o Teuteuga o le Tulafono o le Faalapotopotoga  
Faavae Tau Fatugao a Samoa 2013 – faitauga faalua

Afai o se meataumafa ua gasegase ai se isi, ia, o le tiute lena o le Ofisa o le o lea e aveese mea ia ua mamai ai tagata sei sailili po o le aano o manu po o le aano o le pateta po o ni tulaga faapena lau Afioga.

Ona ou oo mai lea lau Afioga i le faafesili po o se manaoga lafo po o se faatalauula i le Afioga i le sui usufono mamalu mo Gagaifomauga Nu.1. Ou te talitonu ona pau lea o le sui usufono o lea na te lagona atoatoa le aoga o le auaunaga lenei ma le taua o lenei auaunaga aua o lea ua oo i ai. Atonu e le o se tulaga lea e faapea e manaomia e nisi o lenei Maota le fia oo i ai i le tulaga o le faamamaina o le toto, ae ou te fautua atu ia i latou uma o lea e i ai le avanoa e puipui mai ai ia aua nei oo i ai, ia, o le tulaga lena e tatau ona toe faamanatu atu, o le taimi lenei o lea e maua le avanoa. Ia amata nei loa, afai o oe e te suka, ia amata nei loa ona e toaga e faaititia lou suka ma faaeteete i taumafa ma tulaga uma faapena e afaina ai i le suka nei oo i ai i le tulaga lea.

Ae o le vaega o le auaunaga lea na saunoa i ai le sui usufono, e faapea o le fautuaga lea, ua ou manatu lava ua tatau ona ou oo i ai ina nei tei ua faaseseina pei ona ou fai atu, ua lata i le 300 i latou o lo o i le lisi faatalitali, nei avea lea ma tulaga e taofia ai lo latou oo mai e fai a latou siaki pe faafaigata ai foi ona fai sa latou filifiliga pe a oo i le taimi e manaomia ai le faamamaina o latou toto ona o le latou faafofoga mai o lea e faapea o le faamamatoto e uma ai lou toto. O le faamalamalamaga la, e leai, e leai lava ma se mea e tasi e aveesea o lou toto, o le gaoioiga lava ma le auaunaga, o le faamamaina o lou toto. O lona uiga, e tui ese mai lou toto faau i totonu o le masini, faamama ai, ma toe foi mai lava i lou tino, e leai ma se mea e tasi e aveesea o lou toto i le taimi e fai ai le faamamaina o le toto. Na pau lava le galuega o lea e faatino, o le faamamaina o le toto.

Ae na ou taua lau Afioga i le Fofoga Fetalai i le taimi o le faamalamalamaga o le Tulafono Tau Faaofi, o lea e i ai le faamoemoe ma se fuafuaga mamao a le auaunaga, ina ia tufa atu le auaunaga i tua i falemai i tua. O lea foi la ua tilotilo e i ai vaega moomia e tilotilo i ai, e le faapea na o le manaia o le fale, pei o le tele o falemai ia e i tua, o la e ua mama lelei mo le faatinoina o le auaunaga lea, ae i ai isi manaoga, e tatau ona lava le sapalai o le suavai, a o le vaega aupito sili ona taua, e tatau ona lava le aufaigaluega e mafai ona autovaa atu, aua e faatolu i le vaiaso ona faatino le auaunaga lea, ae manatua foi o lea ua faaoga Motootua faapea foi ma Tuasivi, ua vaeluaina foi la le aufaigaluega e o ese atu mo le faatinoga o lea auaunaga. E tilotilo la agai i ai mo se vaitaimi po o se vaitau e talafeagai ai ia fuafuaga uma, e le gata i le nofoaga e faatino ai, ia lelei le suavai e faatino ai le galuega e aoga tele, faapena foi ma le aufaigaluega e mafai ona faatinoina lea galuega.

18 MATI 2014

**Tulafono Tau Faaofi o Teuteuga o le Tulafono o le Faalapotopotoga  
Faavae Tau Fatugao a Samoa 2013 – faitauga faalua**

A o lea la ua i ai le fuafuaga faapena, ma o lea lava sa faatalatalanoa mo Safotu pe a faapea e talafeagai i fuafuaga ia ua ou tolaulauina atu, e faatino ai mo se isi itu o Savaii, atonu ona faagasolo mai ai lea i nisi vaega o Upolu pe afai e manaomia pea lea auauunaga i tua. O le a lafo pea i le Susuga i le Pule Sili ma le Komiti Faatonu ma le auauunaga faamamatoto, o le a i ai le latou tofamamao ma le faautautaga loloto.

Lau Afioga i le Fofoga Fetalai, o le sui usufono mo Faasaleleaga Nu.2, o lea sa saunoa e uiga i le auala, ia e talu ai e le i faaaogaina ia auala i totonu o masini ia o lo o faamama ai nei e faaaogaina i le tatou auauunaga, o le ala lea e faamalie atu ai i le sui usufono, e leai se mea e faia i lou auala, ae o le a tilotilo totoa i ai i le sootaga o le auala lea ma le faamamaina o le toto.

O le inisia lea e taua i totonu o le....

**FOFOGA FETALAI:** Ia sei tulai mai le sui usufono e saunoa.

Susuga Papalii Lio Faavaivaioamanu Taeu Masipau: Lau Afioga i le Fofoga Fetalai o se mea laitiiti lava lea, faafetai lava. O le uiga o lau talosaga i le Afioga i le Minisita, musumusunu ane i le Afioga i le Minisita mo Galuega, Felauaiga ma Atinae Eseeese, aua e manatua foi, a oo i le taimi e faamama ai toto o gasegase ae faafuasei mai se Tsunami, o lena e te silafia e tietie le falemai i luga o le sami, ioe. A o le aoga o le talosaga e fesoasoani atu ai i le Matagaluega, aua a faafuaseia, a o la e latalata atu, aua e talitonu lava o le auala lea toetiitiiti lava o la ua i ai i le taimi lea o la ua feooloo ae sei faamama teisi atu i uta leaga e fai sina maualalo i le mea lea e i ai le falemai ma tulaga faapena. O le uiga lena, sei mumusumu ane i le Afioga i lou uso a Minisita, ae faafetai.

**FOFOGA FETALAI:** Ia tulai mai lau Afioga i le Minisita.

Afioga Hon Manualesagalala Enokati Posala (Minisita mo Galuega, Felauaiga ma Atinae Eseeese): Lau Afioga i le Fofoga Fetalai, o le mataupu na laga mai e le sui usufono, ia o le tasi lea vaega o lea sa faamamafa i le saunoaga a le Afioga i le Minisita, prevention, ia ma le exercise e taua, o auala ia afai e faatino i vaega faapea, ia o le aoga foi lena mo le fetamoeai foi lele agai i uta ma agai i tai ma mafai ai ona faaitiitia le tulaga e aafia ai ia fatugao. Pei o le agaga lena lea sa taumafai ai, ae leai se sootaga ma fuafuaga a le tatou pulega o auala, ia o la e faasoa i tupe, e ese le vaega lena, ma le faaloalo.

**FOFOGA FETALAI:** Ia malo, tulai mai lau Afioga i le Minisita e faaaau le saunoaga.

18 MATI 2014

**Tulafono Tau Faaofi o Teuteuga o le Tulafono o le Faalapotopotoga  
Faavae Tau Fatugao a Samoa 2013 – faitauga faalua**

**Afioga Hon TUITAMA TALALELEI TUITAMA:** Ia lau Afioga i le sui usufono mamalu, ou te le tau musumususu i ai, o lea e lagona atu lau....o lea la ua maua lou fanoga, ia o le a taoto atu i ai lau mataupu lea.

O le tulaga lea i le inisinia lea sa faafesiligia. Ia manatua foi o masini nei e manaomia le inisinia e siakiina po o lelei atoatoa....o lea la e i totonu foi o le staff a le faamamatoto ia inisinia i latou ia e faapitoa mo...ua uma ona aoga i le lipeaina o masini ia, ne i te i ua i ai se mea e faaletonu ia ma faaumiumi le ola o nai masini lea ona e fai sina taugata o masini, o le ala lena o le i ai o le inisinia lea.

O le vaega lea sa saunoa i ai le sui usufono mamalu mo Faleata Sisifo, e ese le manaia o le finagalo lea sa faaalua, aua o lea ua uma ona faatalatalanoa i totonu o le Matagaluega a o lo o tilotilo i se auala e mafai ai ona faatino le faamoemoe lea, o se faamoemoe aupito sili ona lelei, na mafua foi lava lenei tulaga ona o le matauina o le tulaga o lo o i ai nisi i atunuu i fafo, ae o le tasi lea auala e mafai ai ona faaosofia ia lagona o le aufaigaluega aua ou te le tau atua lenei vaega, ae ou te talitonu o lea ua silasila ma matauina e le Maota lenei tulaga o....tulai mai nei aemaise lava i latou o Faauluuluga o Matagaluega i le manumanuga o lo o i ai latou soifua, ona o le pisi tele i totonu i le faatinoga o latou galuega ua tau le maua ai ni avanoa e o ai e koleni ia ma fai a latou faamalositino, ae o le tele la o i latou nei i galuega nei e tau o white collar jobs po o galuega ia faa-Ofisa, ua tele ina faigata ona control ia latou mamafa, ua amata ona tino puputa – ma o le faateleina o le puta, o le faateleina foi lena o le suamalie o le tausami ma atili faigata ai lava ona fai le exercise pe fai faamalositino ma toe faamaui. O se luitau tele lea mo i latou ua pasi ma le marching foi lea e tataua ona gata ai ia le lapoa o lou tino, e pasi atu loa ua e sili atu, o le matuai galuega faigata le toe taumafai e toe faafoi mai i lalo lou mamafa.

O lea sa i ai se faatalatalanoaga ma se mafaufauga pei o lea na saunoa i ai le sui usufono mo Faleata Sisifo, faafetai lava i le sui usufono mo Faleata Sisifo, ae ona pau lea o se mea aoga ua maua i lenei aso i le tatou Fono ua saunoa le sui usufono ae tele foi lou sao i lenei taumafaiga e ala i le faatofalaiga ma le tofa faasoa mai mo le tatou Fonotaga.

O le mea lea sa saunoa i ai le sui usufono, o ni fale faamalositino foi ia i totonu o Matagaluega taitasi. Sa amata ona fai sa taumafai, ae ua te i ua toe nofo, ou te le iloa po o le a le mea ua ala ai ona toe nofo. A o le tulaga lea e taumafai i ai, a faapea e tofu le fale faigaluega ma se latou tamai gym foi lele ae ia compulsory ia fai faa-Tulafono, o tagata faigaluega uma i totonu o lea fale faigaluega, ia i ai se latou 15 minute po o se 20 minute e faamalositino ai e tataua ona alu e fai sana faamalositino, a maea, toe foi mai faaauau le galuega.



18 MATI 2014

**Tulafono Tau Faaofi o Teuteuga o le Tulafono o le Faalapotopotoga  
Faavae Tau Fatugao a Samoa 2013 – faitauga faalua**

Ae le faapea pei o le mea lea e i ai nei tatou i le taimi nei, e faatali sei manava ona alu lea e fofou se taimi pe tau faaavanoa e fai ai se faamalositino, po o le malae pe savali, ia po o le aiga po o fea le mea e fai ai, ia o le tele o nisi taimi, a ova, ia ua faigata tele ona faatino mea na.

Peitai, afai e i ai vaega ia i totonu o se fale faigaluega, e faigofie lava e oo loa i le taimi aua e fai le time table e te tilotilo i ai, o, o lou taimi lea ou te alu ai ou te exercise, ia a oo loa i lou taimi, ia tuu lau galuega ae e alu i lou gym fai lau exercise, ae i ai foi ma sina neti foi lea volipolo o la foi ua omai foi ma isi vaega e fai foi a latou exercise, toe taimi faatasi, fai sina popoga polo faaafu le tino, ia a uma o lo o i ai ma fale e faamalulu ai ua uma ona saunia i totonu o lea nofoaga, a maea toe omai toe fai le galuega. A o lena faiga, o le a maunono ai, o tagata uma o lo o faigaluega i totonu o lea fale faigaluega, o le a i ai se faagaoioiga o le tino i se itula po o se taimi o le aso. Afai la e tofua uma fale faigaluega ma tulaga e le gata i galuega a le Malo, e faapea foi i isi fale faigaluega o kamupani, ia o se tulaga lelei tele. Faafetai mo le agaga faasoa mai, e faatupu manatu foi mo le Matagaluega e silasila i ai ma vaavaai a o se tulaga lelei e matua tele lou lagolagoina o se faamoemoega faapea pe a mafai, aua na o le pau lea o le auala, ou te talitonu au, e mafai ai e i latou o lo o faigaluega faa-Ofisa ona maua se avanoa e fai ai ni faamalositino ma faaitiitia ai le aafiaga i faamai o lo o tatou taumafai ai nei ina ia puipui.

Ia lau Afioga ona o lea e taoto le talosaga o le tulaga i le gasegase lea o le nunu, ona o lea sa ou taua o le tasi lea foi gasegase e afaina ai fatugao, o lea ua i ai le manatu, ia e sili ia ona fai i ai o sina tala e faamalamalama ai, aua ou te talitonu, o le tasi lena faamai taatele o lo o i totonu o le tatou atunuu...

**Afioga Hon Aeau Peniamina Leavaiseeta:** Lau Afioga i le Fofoga Fetalai, o le mataupu lea o le nunu, e matua malamalama ai le Itu Agai. Pe mafai o na fai se latou fono faapitoa leaga o lea e malamalama ai, fai lea o sa outou fono i tua, o le a uma lena po o tatou talanoa i si tamai mea lea, a o le itu lena, ua matua malamalama lelei lava i le itu lena.

**FOFOGA FETALAI:** Ia o lea ua maua, malie le sui usufono mamalu ona o le folasaga a le sui usufono o lo o fia malamalama, ia o lo o talanoa i luma o le Palemene, o le ala lea o le tuu mai, ae o le a tuu atu pea le avanoa lau Afioga i le Minisita mo le Soifua Maloloina, o lea ua faai mai masalo o le tali mulimuli lea.

**Afioga Hon TUITAMA TALALELEI TUITAMA:** O le faamai lea o le nunu po o lea ua lauiloa nei o le gout, aua e mafua mai i le masima lea e tau o le uric acid, o le uric acid e maua mai i meaai foi nei e i ai aano o manu, o meaai atigi e i ai ula ma paa, e maua mai i le ia oka, e maua mai i mea o figota foi lea pei o sea, ia e tele foi i mea o tamato, ae faapena foi i mea o polo feu.

18 MATI 2014

**Tulafono Tau Faaofi o Teuteuga o le Tulafono o le Faalapotopotoga  
Faavae Tau Fatugao a Samoa 2013 – faitauga faalua**

O ia vaega uma e faatupulaia ai ia le vailaau leni e taua o le uric acid i totonu o lou tino. Ae mafua ona faaputupu i totonu o le tino o le tagata ona o le tino o le tagata e le o i ai ia le mea e na te stabilize ina e fesoasoani e stabilize ai le uric acid pe na te faaaogaina pe talepeina le uric acid e le oo i ai le vailaau lena e taua o le uric case, o le uric case e maua i manu, ma o le ala foi lea e le nunu ai manu, ae o le human being, e le o maua ai ia le vailaau lea na te faamaluina le uric acid, o le ala lea o le faaputupu o le uric acid i totonu o le tino, a faapea la e maualuga le concentration o le uric acid ona liu crystal loa lea pe crystallize, a oo la ina crystallize ona deposit lea pe faaputupu i sooga o ponaivi. O le mea la lea e te vaai i ai, e patupatu ia ivi o tagata nei e nunu e papatu foi ia, o faaputuga masima na po o uric acid salts lea e faaputu ai, a oo foi la i se taimi pe te i ua pa mai, e te vaai la i ai e paepae pei o le masima e ninii foi e faapena foi, ae aua e te tofo ai aua ou te iloa e le oona e pei o le masima. O le ala la e aafia ai fatugao, ona a crystallize le uric acid i totonu o le fatugao, ona form mai lea o le maa, o i ina e maua mai ai le maamaa lea e mafua ona faaputupu ma tetele i totonu o fatugao ia ma iu lava ina afaina ai le fatugao ma mate ai lava le fatugao i le tele o i latou. O la e i ai tagata i uta e mafua mai ona o maamaa i totonu o fatugao, e tele foi tupe a le tatou atunuu lea e ave e fealuai, fealuai lava lea ma lana maa, ia te i ua poloka ia feau lata ua poloka i le maa, ia ave faatopetope i Niu Sila e fai taotoga, ia e tetele tupe o lo o alu ai a le tatou atunuu i lea vaega. O le mea la lea e taua tele le fesili lea ua maua ai foi le avanoa ia mo le silafia a nisi ua soso i ai po o ua latalata i ai i le tulaga lea o le gout.

Lau Afioga i le Fofoga Fetalai, o le tele o nisi fesili lea sa ou....

**FOFOGA FETALAI:** Malie le sui usufono, sei tuu atu le avanoa i le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaai: Lau Afioga i le Fofoga Fetalai, ona o lea ua faamatala mai le mafuaaga e maamaa ai le tele o tatou ia e avatu e taotoo i Niu Sila. O le a la se faiga e faataugofie ai le mea lea, aemaise o lea sa oo lau upu o lea ou te faamaua i lalo i i? O le a lea autau na e taua? E tofu lava le tagata ma le autau i totonu o le tino. O ni fitafita? Ou te fia malamalama i le upu lea, po o le a tonu lena autau?

**FOFOGA FETALAI:** Ia tulai mai le Afioga i le Minisita e faaauau le....faaiu mai le saunoaga.

**Afioga Hon TUITAMA TALALELEI TUITAMA:** O le....

**FOFOGA FETALAI:** Ia malie lau Afioga i le Minisita, o le a se mataupu?

18 MATI 2014

**Tulafono Tau Faaofi o Teuteuga o le Tulafono o le Faalapotopotoga  
Faavae Tau Fatugao a Samoa 2013 – faitauga faalua**

**Tofa Lealailepule Rimoni Aiafi:** Leai o le vaega lea e tulituliloa lau Afioga i le mea lea o le faamai o le nunu lea na saunoa i ai, o lea ua saunoa i mafuaaga o le faamai, o lea foi la ua matou faalogologo atu, ae leai se fofu o offer ma tau mai e le Afioga i le Minisita, aua o le mea e faamatala le mafuaaga o le mai ma faamatala mai mea e fai e puipuia ai oe mai le oo i le mai, aua o lea foi e saunoa na o meaai, e leai ni meainu? Po o le mea e fefe e tau o le beer e mafua ai? Ni mafuaaga faapena ona malamalama atili ai lea, ma le faaaloalo lava.

**FOFOGA FETALAI:** Ia tulai maia lau Afioga i le Minisita e faaiu mai le saunoaga.

**Afioga Hon TUITAMA TALALELEI TUITAMA:** O le mea lea e finagalo i ai le sui usufono lea, e manao e spoon fed, ou te ofo o lea e lei tau atua loc auala e puipuia ai a o lea na faalogo mai i le auala na mafua ai? Faavasega i lou faiai, afai o le mea lea na mafua ai, aua le toe tago i ai. O le puipuiga la, aua e te toaga e aipovi, aua le toaga e aitele i le ota, ia faaitiitia le tausami i mea o paa ma ula. O mea ia o lea e faatupulaia ai le uric acid i totonu o lou tino. Ma le isi, toaga e inu vai e free ai lau water way ina ia aua nei poloka i crystals ia.

**FOFOGA FETALAI:** Tulai mai le sui usufono mo Faleata Sisifo.

**Tofa Lealailepule Rimoni Aiafi:** Lau Afioga i le Fofoga Fetalai, o le ala lea o le fesili atu, o meataumafa ia e laulau mai e le Afioga i le Minisita o ula ma paa, e leai se isi o matou e ai i ia mea e taugata. O lona uiga, e i ai nisi mafuaaga, e tatau pea ona tatou e faamalamalama, afai o lea ua fai le tatou workshop i le soifua maloloina i leni afiafi, ia tatou matua fuli loa e fai, aumai mafuaaga, aumai mea e fofu ai ma mea e foia ai faafitauli.

**FOFOGA FETALAI:** O lea ua maua atu le finagalo o le sui usufono mamalu, e ala ona outou le taumamafa ona o le le maua e lena Itu o le Maota. A o le taumafataga lena o lo o taumamafa ai alii ma nuu ma afioaga o paa ma ula. O lea la e taumafai le Minisita e faamalamalama, ia faaeteete i le taumafaina o tulaga na, aua na o le pau lena o mea o lo o maua e afioaga. Sei tulai mai lau Afioga i le Minisita e faaauau le saunoaga.

**Afioga Hon TUITAMA TALALELEI TUITAMA:** O lo o i ai foi le fualaau lau Afioga e aveese ai le uri-gacid lea mai le tino pe a toaga e inu ai, o le alopurinal. A o le fofu lava e sili ona taua, o lou faaeteete e te tausami i mea e te silafia, aua e le o tagata uma e nunu, i ai tagata e grown i le nunu, e i ai foi tagata e le grown i le nunu, o lona uiga e lelei le latou system e grown ai le uri-gacid e le nofo i totonu o le tino.

18 MATI 2014

**Tulafono Tau Faaofi o Teuteuga o le Tulafono o le Faalapotopotoga  
Faavae Tau Fatugao a Samoa 2013 – faitauga faalua**

Lau Afioga i le Fofoga Fetalai, ou te talitonu o le faaiuga lena o se taumafaiga e tali atu ai i fesili na laga mai e le Itu Agai, ua mafua lava ona umiuni faapenei le tatou taimi, ona o le faafofoga lava o lena Itu i le tulaga o le taua tele o le aoga o lenei suiga ma teuteuga o lenei tamai Tulafono Tau Faaofi.

E momoli atu ai le faafetai tele i lau Afioga mo le taimi na tuuina mai e faatino ai lenei galuega. Ma lou faaaloalo. Ia manuia le Fono.

**FOFOGA FETALAI:** Malo faafetai i le saunoaga malamalama a lau Afioga i le Minisita mo le Soifua Maloloina.

**Afioga Hon TUITAMA TALALELEI TUITAMA:** Lau Afioga toe tasi lava ua misi ia te au, o le autau leaga o lea sa fesili ai le Afioga i le Palemia. O le autau lea sa ou taua, o antibodies lea e fausia e latou te faatinoina le galuega lea o le fetau ma siama ia pe a oo atu loa le siama moni, a o lea ua uma ona tapena le autau lea e taua o antibodies, na mafua ona o le siama foi lea e le mai ai se isi lea na tui ai, ona fausia ai lea o mea ia o antibodies. O le taimi la e oo atu ai le siama moni, a o lea ua tele le autau lea ua faatalitali i le taunuu atu o se siama faapea, ona o loa lea faaumatia. Ma le faaaloalo.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga sei ou toe fesili atu lava i le mea lea, o lea la e maua e taua tele le autau. E faapefea la ona ota maua le autau lena ina ia faamalosia atili ina ia tape ai siama ia?

**FOFOGA FETALAI:** Sei tulai mail au Afioga i le Minisita.

**Afioga Hon TUITAMA TALALELEI TUITAMA:** O le autau la lea, e mafua ona e maua, ona o tui puipua, o tui puipua lea e tui ai oe ona maua ai lea. E i ai foi la le taimi e te maua ai i se faamai. O la e la ua uma ona tapena e lou tino le autau, ae inu atu loa lau antibiotic, pe ai loa le siama, ae o la e ua uma ona tune up lou system, e tapena ai mo se siama faapea pe a toe oo atu. O le auala lena e maua ai le autau lau Afioga.

**FOFOGA FETALAI:** Malo faafetai. Ou te manatu ua saausi le faafofogaaga a le Maota i le faamalamalama a lau Afioga i le Minisita. E itula ma le fasefulu minute. E manatu e le o se taimi laitiiti ma e tuumamaina foi. E tatou te faaataata a lafoga, a o le ala lena o le tuuavanoa atu o le Nofoa ona o le taua o lenei mataupu. Ou te manatu foi o lo o faataua tele i le faafofoga a le atunuu i lenei itula afiafi ona e le gata o lau Afioga i le Minisita o le Soifua Maloloina, a o oe o le fomai toe Ulutaia o le tatou Matagaluega.

18 MATI 2014

**Tulafono Tau Faaofi o le Teuteuga o le Tulafono o Fefaatauaiga  
Talafeagai 2013 – faitauga faalua**

O le ala foi lea e faatauaina ai le avanoa, afai foi o le a sau faafogafoga i le tutulai atu o lea Itu o le Maota, e leai, o le agaga lava ina ia maua le malamalamaaga ma le tuufesili atu ae sagatonu lava lau o le fo i lau faamalalamalama, ma e manatu ua matua manino ma atoatoa, na tatou amata ma ii le Teuteuga o le Tulafono o Fatugao, tatou taamilo atu a ii le vaitau atoa o le suesuega o le soifua maloloina, a o lea ua tatou toe faatino mai ua malamalama mea uma.

*Na faamaonia le lafo ma faitauina le Tulafono Tau Faaofi i lona faitauga faalua.*

**FOFOGA FETALAI:** E tusa ai ma le Tulafono Tumau, o le a tuuina atu le Tulafono Tau Faaofi i le Komiti o le Soifua Maloloina, Mataupu Tau le Va Fealoai, Galuega Tau Lotoifale, Atinae o Afioga ma Agafesootai mo le iloiloaina ma toe lipoti ma ii le Fono Aoa o se Fonotaga o lumanai.

**TULAFONO TAU FAAOFI O LE TEUTEUGA O LE TULAFONO O  
FEFAATAUAIGA TALAFEAGAI 2013 – faitauga faalua**

**FOFOGA FETALAI:** Mo le silafia e le Palemene, o le Tulafono Tau Faaofi leni sa faia lona faitauga muamua i le Aso 24 Ianuari 2014. Tulai mail au Afioga i le Minisita mo Pisinisi, Alamanuia ma Leipa, lau Afioga i le Sui Palemia.

**Tofa Hon FONOTOE NUAFESILI PIERRE LAUOFO:** Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Fefaatauaiga Talafeagai 2013 i lona faitauga faalua, ma ou te fia tautala faamalalamalama i ai.*

*Faaluaina e le Minisita mo Tupe Maua ma le Minisita o Tupe.*

**FOFOGA FETALAI:** Tulai mai lau Afioga i le Sui Palemia e saunoa faamalalamalama i le Tulafono Tau Faaofi.

**Tofa Hon FONOTOE NUAFESILI PIERRE LAUOFO:** Faafetai i lau Afioga i le Fofoga Fetalai. Out e tulai atu foi i leni itula o le afiafi, e muamua lava ona faatalofa atu ma ofo alofa atu i letatou Maota i leni itula o le afiafi, faamalo le onosai. E ofo alofa atu foi i le tapuaiga a le tatou atunuu o lo o tapuai mai i maota ma laoa i leni itula o le afiafi aua lava le Fonousu a le atunuu.

18 MATI 2014

**Tulafono Tau Faaofi o le Teuteuga o le Tulafono o Fefaatauaiga  
Talafeagai 2013 – faitauga faalua**

Lau Afioga i le Fofoga Fetalai, o le Tulafono Toe Teuteu lenei, o se Tulafono Tau Faaofi taua tele, e moni e puupuu ma itiiti, ae tele lona taua ma lona aoga. O se Tulafono Tau Faaofi e toe teuteu ai le Fuaiupu 49 ma le Fuaiupu 51(7) o le Tulafono o Fefaatauaiga Talafeagai 1998. A o le teuteuga e faasagatonu i le poloaiga o tau o oloa, po o le tulaga foi lea o le lisi o tau o oloa o lo o tuuina mai e le Komiti Faatino e pulea tau o oloa o lo o faavaeina i lalo o le Tulafono lenei. Ma o le tulaga lea sa sau ai le Tulafono mai la aso ua leva, masalo pe ua silia ma le 40 tausaga pe a ona faaauau mai lava lea i le Tulafono lea i le 1998.

O le Komiti Faatino e pulea tau o oloa lau Afioga i le Fofoga Fetalai, o lo o i i i le vaega tonu lea o le Matagaluega o Pisinisi, Alamanuia ma Leipa, ma o le Komiti Faatino foi lea e toavalu ona sui, faatasi ai ma le failautusi. O le galuega la a le Komiti lenei, e pasia le tau o oloa, e tai tolu masina ma fonu le Komiti Faatino lenei, ona tuufaatasia lea o le tau o oloa, o oloa ia o lo o aiaia i lalo o le Tulafono. A maea loa ona pasia e le Komiti Faatino, ona faapena lea ona tufatufa atu i tua i faleoloa uma lava o le atunuu e faatulaga ai le tau o oloa mai lea tolu masina i lea tolu masina. O le faiga la e fai ai, e tuufaatasia e le Matagaluega tau fou pe a oo ina usuia le fonu a le Komiti, e fuafua la le tau o oloa nei mai mea o lipoti ma pepa foi nei a kamupani nei e faauluina mai oloa mai fafo, e lipoti i le Matagaluega ona faapena lea ona fesootai le Matagaluega ma le Matagaluega o le Tiute, o i ina la e tuufaatasia ai le tau o oloa ua faapena ona aofia i ai i totonu ma le tupe mama po o le tupe faasili lea a le faioloa. A maea la ona tuufaatasia ma pasia e le Komiti Faatino le tau o oloa fou, ona tufatufa lea i faleoloa. O le Tulafono, e moomia le faailoa e faleoloa le lisi lea i luma o faleoloa taitasi uma lava i totonu o le atunuu o lo o faatau ai oloa eseese pei ona i a ii luga o le lisi lea.

O le galuega la a le Matagaluega, e alu asiasiga, e alu lava asiasiga i masina taitasi, e asiasi i faleoloa uma i Upolu faapea foi faleoloa i le motu i Salafai. O le motu i Salafai, o la e foi ua i ai le Ofisa o le tatou Matagaluega, o lo o i ai foi le latou taavale e faatino ai a latou asiasiga, e faasolosolo la i faleoloa taitasi uma lava. O le faamoemoe la, e asia faleoloa nei po ua faapipii i luma foi lea o faleoloa i luma po o le faamalama po o luma o le faitotoa po o luma lava o le tino o le faleoloa lisi nei o tau o oloa, e tatau ona silafia e tagata faatau, a alu atu le tagata faatau e faatau i le faleoloa ona mafai lea ona tilotilo i le lisi lea ma na silafia ai le tau o lea oloa ma lea oloa o lo o i luga o le lisi o le tau o oloa. O se faaitaiga o apa eleni po o le araisa po o le falaoamata. O tulaga faapena ma oloa uma. Ae o le a ou oo atu i se taimi lau Afioga i le Fofoga Fetalai i le lisi o oloa. A o le tulaga lea, o lo o faamalasia pea la e le Matagaluega asiasiga ma faleoloa aua e manaomia e le Tulafono ona faailoa lisi ia o tau o oloa i taimi uma. Ma le isi tulaga e aofia i totonu o le asiasiga a le Matagaluega, o le asia lea o faleoloa, aua e manaomia le tuuina atu i le faleoloa ni lisiti o faatau o mea ia e asiasi e le Matagaluega, ona e tatau lava ona faailoa le tulaga o lisiti, ma o lo o faamalasia pea.

18 MATI 2014

Tulafono Tau Faaofi o le Teuteuga o le Tulafono o Fefaatauaiga  
Talafeagai 2013 – faitauga faalua

E i ai isi faleoloa ua asia o lo o faapena ona latou solia le Tulafono lenei, e i ai faleoloa e maua atu e le o i ai le lisi o le tau o oloa i luma foi lea i se tulaga e faigofie ai ona silafia e le au faatau. E faapea foi isi faleoloa i tulaga o lisiti. Ia manatua foi e taua tele lisiti pe a fai sau faatau. Aua a faapea e i ai sau faasea i le tau o oloa po ua maualuga tele, ua sili atu i le tau lea o lo o aumai i totonu o le lisi o le tau o oloa, o lau lisiti la e faavae ai pe lagolago ail au faasea e momoli ma ii le Matagaluega, ona faapena lea ona asia e le tatou Matagaluega le faleoloa lea ua faasaga i ai le faasea, ona faapena lea ona faagasolo le tulaga o le Tulafono ma aiaiga o le Tulafono ina ia usitaia e faleoloa le lisi o le tau o oloa.

Lau Afioga i le Fofoga Fetalai, o le lisi la o le tau o oloa e pei ona ou fai atu, e tai tolu masina ma toe iloilo e le Komiti Faatino lenei e faasino tonu i ai le Teuteuga lenei. O le tulaga la e i ai o lea ua ou vaai atu, faafetai i lau Afioga i le Fofoga Fetalai ona o lea ua i luga o le Laulau a Fono le poloaiga lenei o le tau o oloa o lenei foi tolu masina lea na faia i le aso 4 o Fepuari 2014. O lo o manino i ina, a outou silasila ifo i ai o lo o manino i ina i le lisi lena le tau o oloa i ituaiga oloa o lo o aiaia i le Tulafono, faapea ma ona tau. E le gata la o le tau i Upolu nei ae faapea foi le tau i Savaii, Manono ma Apolima o lo o faataatia mai i totonu o le lisi lenei o le tau o oloa. A silasila i ai o lena e i luga le oloa lenei o le suka. O le suka e lua ituaiga taga suka, e eseese le mamafa, e eseese foi pauna; o le 110 pauna ma le 55 pauna ma o le suka enaena ae e le o le suka paepae. A faasolo ona e silasila ifo i lalo i le lisi lenei o le tau o oloa, o lo o sosoo ifo ai ma le masima, sosoo ifo ai ma le araisa.

Lau Afioga i le Fofoga Fetalai, a silasila i ai e fa ituaiga taga araisa na o lo o i ai. O le araisa o le Island Sun Rice e 40 pauna, o le Island Sun Rice 20 pauna ma le araisa foi lea o le FRC, ae i ai ma le araisa lea o le Pacific Rice. O lena foi ua faataoto le tau e le gata o le taga atoa ae faapea foi lona faatauina taitasi pe faatau pauna.

A silasila foi i le isi oloa taua lea, o le oloa lea o le falaoa mata. O le falaoa mata e iva ituaiga taga falaoa mata o lo o faatauina i totonu o lo tatou atunuu. O lo o tele lava la ituaiga falaoa mata e filifili i ai lo tatou atunuu, a o nei falaoa mata, o falaoa mata e matua lelei uma e pei o le normal flour. O le normal flour i le tau o le 110 pauna o le taga falaoa mata iinei i Upolu e \$88.00. Ona faasolosolo lava lea aua e eseese foi le tau o isi taga falaoa mata.

Faasolo atu i le pepa saimini, ma e pei o oloa ia o lo o manaomia pe alumia tele i totonu o le atunuu o lo o faapena ona taumafai le Komiti lea e faatonutonu ma faatulaga lelei tau ina ia aua le taugata tele aua o oloa moomia e pei foi la o le susu. O ituaiga susu eseese lea e i ai le susu o le devondale ma le HT milk. O le tau o le pepa susu lena i Upolu e \$4.80, o le tau i Savaii e \$5.20. Ona i ai lea ma le anchor regular, o le anchor light ma le medow fresh. O le medow fresh low fat, ona faasolosolo atu ai lava lea o susu uma lava na o lo o maua i faleoloa pe a outou silasila i ai.

18 MATI 2014

**Tulafono Tau Faaofi o le Teuteuga o le Tulafono o Fefaatauaiga  
Talafeagai 2013 – faitauga faalua**

O lea ua tau atu ma tau mo lo outou silafia, aua a outou o i faleoloa ona outou silasila lea i le lisi o tau o oloa nei, e tutusa lelei le lisi o le tau o oloa la e faapipii i luma o faleoloa ma tau ia ou te tauina atu iinei. O le taua o le mea lea lau Afioga i le Fofoga Fetalai ina ia aua ne i faaseseina ai tagata faatau, ia aua ne i faaseseina e le tagata faioloa le tau o oloa aua e tataua lava ona usitaia le Tulafono. O susu vaivai na po o susu suavaia, o susu vai, ae i ai foi ma mea ia o susu pauta.

O susu pauta la e i ai le milk powder o le anchor, o le milk powder, o le instant, o le milk powder ma le anchor lea e mamafa atu ma le milk powder instant e mama ifo foi. A silasila foi la i tau e fuafua tau, ona e taugofie teisi lava tau o Upolu nai lo le tau o Savaii. O le mafuaaga e pei ona silafia aua a ave i Savaii, e le gata e ave i le loli po o le taavale oloa.....

**FOFOGA FETALAI:** Malie lau Afioga i le Sui Palemia, e leai se felafolafoaiga i le taimi lenei ona o lea e saunoa faamalamalama le Minisita ona avatu ai lea o le avanoa.

Ona o lea ua tatou taunuu i lo tatou taimi malolo, o le a taatia ese Galuega a le Maota mo lana malologa masani o le afaifi, ona tatou toe taliu mai ai lea e toe faaauau le tatou fono.

*Na faataatia ese Taulumaga a le Fono Aoa mo lana malologa masani i le itula e 8.44 i le po ma toe faaauau i le itula e 9.24 i le po.*

**FOFOGA FETALAI:** Ou te faasilasila atu ua toe amatalia nei Taulumaga a le Fono Aoa Faitulafono. E manatu ua lago lelei le taliga o le sua i lenei vaega o le afaifi. E manatu foi ua maua se faasiliga malosi aua le tatou malologa sa faia i le taimi ua sola.

E faia le malologa o lo o faaauau le tali atu a le Afioga i le Minisita mo Pisinisi, Alamanuia ma Leipa, Afioga i le Sui Palemia.

Tulai mai e faaauau le saunoaga.

**Tofa Hon FONOTOE NUAFESILI PIERRE LAUOFO:** Lau Afioga i le Fofoga Fetalai, e momoli atu foi le faafetai i lau Afioga ma le Ofisa i le taumafataga i lenei afaifi. O lea ua maea ona tali le sua ma ua taumamafa foi sui usufono o le Maota faapea Faauluuluga o Matagaluega ua tatou faatasi i lenei itula o le afaifi, faamalo faafetai.

E pei foi ona ou tolaulau atu ituaiga susu ma o susu la nei e pei ona ou tolaulau atu. O le susu lea o le low fat, o le susu lea e aoga mo tagata o lo o mamafa o latou tino po o le au puputa lea na saunoa i ai le Afioga i le Minisita mo le Soifua Maloloina le susuga i le alii fomai. O susu la ia low fat e aoga i tino o tagata o lea e mamafa ona e le tele se fat. O le mafuaaga lena e faaigoa ai o le low fat ona e leai se fat, pe laitiiti foi le



fat. A o isi la susu ia e pei o le regular ma le anchor lea e masani ona faasusu ai ti, o susu na e feoloolo le fat e i ai i totonu. E i ai la ituaiga susu e le o maua i le lisi, a o susu ia e pei la o le isi suasusu lea sa taua e le Afioga i le Palemia lea e tului ai lou fofoga pe a e maua i le mai fofoga. E le o maua la iinei le susu lena, ae tasi lena susu taua aua e i ai o latou aoga. E i ai la isi ituaiga susu ia e le o maua iinei, e i ai le ituaiga susu foi lea e taua o le susu totoo, le susu suamalie foi lea e le suavaia, ae totoo lava le susu lena. E le o maua la i le tatou lisi lea o susu, i mea lava ia tau susu.

**Tofa Lealailepule Rimoni Aiafi:** Lau Afioga i le Fofoga Fetalai.....

**Tofa Hon FONOTOE NUAFESILI PIERRE LAUOFO:** Lau Afioga i le Fofoga Fetalai, o lea e faamalamalama le Tulafono Tau Faaofi, e le faatagaina ni faauilavea i le taimi nei.

**Tofa LEALAILEPULE RIMONI AIAFI:** Lau Afioga i le Fofoga Fetalai, e i ai le mea lea e tatau ona faasao i le susu lea e saunoa i ai le Minisita e tului ai mata ona o lea ua feteenai ma le finagalo o le Matagaluega, o lea ua faasalalau mai e faasa ona faaoga, a o lea ou te vaai atu o lea e soiso le Minisita mo le Soifua Maloloina, ae e tatau ona se i saunoa ane ona o lea e pei e le o malamalama i ai le Palemia ma le Sui Palemia. O le susu lea e le faaogaina i ni mata, e faaoga mo tamaiti e malosi ai le tino ma e leai se sootaga o le susu lea ma susu ia e faatau i wholesale.

**FOFOGA FETALAI:** O lea ua maua atu Lealailepule. Tulai mai lau Afioga i le Sui Palemia e faaauau lau saunoaga. Aua e te tali i le susu lea.

**Tofa Hon FONOTOE NUAFESILI PIERRE LAUOFO:** O lau tala na fai atu, o le susu foi lea e faaoga i fofoga. O lea e faaoga le upu fofoga i le tulaga lautele, ae silasila, o susu uma nei e pei o le susu lea e taatele lava, o le susu lea o le anchor. O le susu lena o lona tau i Upolu e \$4.70, a o lona tau i Savaii e \$5.00. O susu taatele ia aua ia manatua, leaga o lea e faafofoga mai le atunuu e tatau ona silafia lelei le tau o susu ma ituaiga susu, e i ai la le susu lea e taatele o le anchor regular milk. Ona sosoo mai ai lea ma le isi ituaiga susu lea aua e ese foi le vaega lea o susu pauta.

O susu pauta la e pei ona silafia lea e tele ina faaoga aua le tausiga o alo ma fanau iti, o nai pepe ma nai fanau iti faapena lea e faaoga ai susu pauta ia e i ai le milk anchor. O le anchor la i le 400 kalama, o le tau i Upolu nei e \$19.30, a o Savaii e \$20.70. E i ai uma lava la aua e eseese size o susu pauta nei.

Ona faasolo ifo lea i le pata, ia manatua o le galuega lenei ma o le mafuaaga o le taua o le lisi lenei ou te tolaulau atu, o le galuega lea a le Komiti Faatino, latou te lauliliuina ma iloilo le lisi lenei o le tau o oloa i le faaiuga o le tai tolu masina. E uma lea tolu masina ona toe iloilo lea, e aumai foi pepa a le aufai oloa ma i latou o lo o aumaia oloa i totonu o le atunuu, ona fesootai foi lea o Matagaluega e lua o le Tiute ma le Matagaluega o Pisinisi, Alamanuia ma Leipa, ona aumai foi lea o le tau a le aufai oloa, ona faapena lea ona faavasega le tau o oloa.

18 MATI 2014

**Tulafono Tau Faaofi o le Teuteuga o le Tulafono o Fefaatauaiga  
Talafeagai 2013 – faitauga faalua**

O pata la e tele ituaiga pata, e ono ituaiga pata ia o lo o i ai. O pata la nei e i ai pata e i ai le masima, ae i ai foi pata e leai ni masima. E tele lava le eseese o nei ituaiga pata ma e faapena foi ona eseese o latou tau. O le taumafa la e sili ona taua o lo o faapena ona ave i ai le faamamafa o le silasila a le Komiti Faatino lea e mafua ai le Teuteuga o le Tulafono Tau Faaofi lenei, o le taumafa lea o le ia tuu apa.

O le ia tuu apa po o le tauina faafaigofie foi lea o le apa eleni. O le ia tuu apa lau Afioga i le Fofoga Fetalai, o lo tatou atunuu o le atunuu ua faamanuiaina i le tele o ituaiga ia tuu apa eseese. O lona uiga e tele ituaiga apa eleni e fai ai lau filifiliga. O le taimi lenei e 24 ituaiga apa eleni. O ia tuu apa uma lava la nei e eseese foi o latou tau. O isi lava apa e tutusa ma isi ituaiga apa, a o le 24 o apa eleni ia manatua e 24 ituaiga e maua i Samoa ona o le oloa e aupito sili ona alumia lea i totonu o le atunuu. E le po se lilo o lea e silafia, e ese mai i le taumafaina o le apa lava ia, a o lea tatou te faaogaina tele i tatou faalavelave, o le tele o faalavelave o saofai, o maliu, ia o a lava faalavelave faapena o tutupu e faaoga ai ia tatou eleni. Ma i faamaumauga lata mai, o Samoa e sosoo ma le atunuu lenei o Papua Niu Kini i totonu o le Pasefika i le tele o le eleni latou te taumafaina, o lona uiga e aupito tele lava ia Papua Niu Kini sosoo atu ai ma Samoa, o le mafuaaga la lena e ave ai foi le faataua a le Komiti Faatino o le tau o oloa pe a oo ina silasila toe iloilo tau o oloa nei. Ia o le 24 nei o apa ia po o apa eleni, 24, o le anger, o le anger foi lea i le suauu, o le anger suauu lea e tuuapa i le suauu, o lona tau i Upolu e \$4.30sene, o lona tau i Savaii e \$4.70sene, ia ona faasolo ifo lea i lalo. O le mackerel tuu suauu e \$3.00, e taugofie la le mackerel, e \$3.00 i Upolu ae \$3.10sene i Savaii. O le macoy e \$3.50sene i Upolu ae \$3.80sene i Savaii. O le ocean queen, o le apa la lea o le tasi lea apa alumia, ona pei e fiafia foi lele i ai tagata e lololo, aua e eseese uma lava, e lololo uma lava eleni nei, ae eseese foi, e lololo o isi apa e tau suavaia laitiiti a o isi apa e sili atu le lololo, ma e fiafia ai tagata e taumafa. O le ocean queen e \$4.60sene i Upolu ae \$5.00 i Savaii, ia ona faasolo ifo lea i lalo i le apa lea o le pacific king suauu ia ma le pacific king tamato sosi. Ona i ai foi lea o apa ia mea o sardines, sardine tamato sosi, pei la o le apa taugofie lena e \$2.50 i Savaii, ae \$2.30 i Upolu. O le sea boat tasi foi lea apa e alumia foi, o le sea boat la tamato sosi e \$2.40 i Upolu ae \$2.60 i Savaii, o lona uiga e na o le .20sene le eseese. Ia ona faasolo mai laia i le apa lea o le soifua, o le apa lea o le soifua e taulia tele i faalavelave e pei ona outou silafia, e i ai le soifua suauu e i ai foi le soifua tamato sosi. Ia o le soifua la suauu e \$2.90 i Upolu ae \$3.10 i Savaii. Ia ona oo mai lea i le apa lea e taugata le apa lea o le taiyo, o le taiyo e lelei i le taumafa ia ae fai la sina taugata.

**Tofa Levaopolo Talatonu:** Lau Afioga i le Fofoga Fetalai, e agai atu lau fesili i le...ou te le faalavelave lava i le saunoaga a le.....

18 MATI 2014

**Tulafono Tau Faaofi o le Teuteuga o le Tulafono o Fefaatauaiga  
Talafeagai 2013 – faitauga faalua**

**FOFOGA FETALAI:** Malie lava lau Afioga i le Sui Palemia, sei tuu atu le avanoa i le faauilavea.

**Tofa Levaopolo Talatonu:** A o lau fesili atu lava ma le agaga faaaloalo i lau Afioga i le Fofoga Fetalai, ona o le tulaga o Tulafono e tele lava ina e fautuaina i matou i le matou see ese ma le Tulafono, ae o le matou faalogologo i le saunoaga a le Sui Palemia ma aga o le Tulafono ma le tulaga e fitoitonu i ai le Tulafono, ia ua ta i sasae sisifo ae tuu le Tulafono. Ia pe na o le pau lena o se mea e....faafetai.

**FOFOGA FETALAI:** O lea ua maua le finagalo o le sui usufono mamalu. O saunoaga faamalamalama a Minisita i Tulafono, ia o lena tou te silafia e tuutalaloa ina ia malamalama le Tulafono, a o lauga a outou e agai tonu i mea na outou laga i lauga, a o le agaga ma le faamoemoe ina ia manino ma malamalama lelei le taumafai mai o Minisita, aua a malamalama ua uma foi le tatou fesili soo. Ae onosai le sui usufono, o lea ua tatou o foi i le tulaga sei faamanino mea uma ona malamalama lea e tusa ma Tulafono ua tulai mai, a o lea e tuu atu le avanoa. Tulai mai lau Afioga, toe fia apa eleni na e totoe?

**Tofa Hon FONOTOE NUAFESILI PIERRE LAUOFO:** Faafetai i lau Afioga i le Fofoga Fetalai, ua toe sefulu lava nai apa eleni ia e totoe.

Ia ona ou oo atu lea i apa pisupo, a, e feoloolo foi nai apa pisupo. Ae o le agaga tonu lena lau Afioga, o lea ua e saunoa tonu lava i le auga ma le faamoemoe o le taumafai atu, a lelei ona faamalamalama Tulafono, e leai foi ni fesili, pei o le sao lea o le mea lea i lou talitonuga, a?

**FOFOGA FETALAI:** Ia e fautua atu pea i lau susuga i le Sui Palemia, ona o le tulaga o lea e faamalamalama ina ia manino aua o le tasi lea mea e vavao ai le Itu Agai o le tau o le soifuaga, ia o isi faatauoloa ua sii lava a latou tau, ae pei a alu atu sao i i ona malamalama foi lea o le atunuu i le faatulagana. Ae tulai maia lau Afioga.

**Tofa Hon FONOTOE NUAFESILI PIERRE LAUOFO:** Faafetai lau Afioga. Ae pei o le auga tonu lena, pei foi ona ou fai atu, o le taumafa lenei e aupito i sili ona alumia i totonu o le atunuu, o le ia tuuapa, apa eleni. O le sea star, tasi lena apa lelei, e tau tutusa foi le tau. O le triple A, AAA i le suauu e tau fai foi sina taugata, o le matua manaia foi ia o le apa lea. E faapena foi le three star, ia e oo atu i le sea ram, ioe, ia ona alu ifo laia i le first choice, ae faaiu la le lisi i le blue sea, o le blue sea la e \$4.70 i Upolu ae \$5.10 i Savaii.

18 MATI 2014

**Tulafono Tau Faaofi o le Teuteuga o le Tulafono o Fefaatauaiga  
Talafeagai 2013 – faitauga faalua**

O apa la na o lo o alumia lava i totonu o le atunuu. Oi e i ai la ma nai isi apa ia lea ua ou vaai atu i ai, o le manaia, tasi lea apa, ia sei silasila la, ona o lea ua tulai ese le sui usufono lea sa fesili i mo lables fai mai e aumai le faa-Saina e le malamalama ae silasila ia o lea ua faa-Samoa a tatou lables. O le eleni e igoa o le manaia. Ia ua faigofie foi la ona malamalama....

**FOFOGA FETALAI:** Malie lau Afioga i le Sui Palemia.

**Tofa Tuisa Tasi Patea:** Lau Afioga i le Fofoga Fetalai, e tasi le apa ese le taua lea e misi mai, a o le manaia foi ia o le lololo o le taiyo. Faamolemole lava po o i ai i lau lisi?

**FOFOGA FETALAI:** Ia o lea ua uma ona lau atu le faakaikaio.

**Tofa Hon FONOTOE NUAFESILI PIERRE LAUOFO:** O le taiyo, ia o lea foi e maua le taiyo, o le taiyo pei foi ona ou fai atu, o le apa aupito i sili ona taugata lea, a o lea la ua tatou malamalama o lea e taumafa ai le Afioga i le Minisita Lagolago lea, o le apa eleni e aupito sili ona taugata.

**FOFOGA FETALAI:** Malo.

**Tofa Hon FONOTOE NUAFESILI PIERRE LAUOFO:** O le apa la lea e aumai i Iapani o le apa mai i Iapani.

**FOFOGA FETALAI:** Ia sei malie lava le sui usufono mamalu, po o le a le isi apa eleni lea e tulai mai ai le sui usufono mo Faasaleleaga Nu. 4. Tulai mai le sui usufono mamalu.

**Afioga Peseta Vaifou Tevaga (Faasaleleaga Nu.4):** Faafetai tele lava i lau Afioga i le Fofoga Fetalai mo le avanoa. Ia e le o i ai se tulaga foi lele e faauilavea i le faamalamalamaina e le Sui Palemia o tulaga nei o apa eleni. E lua lava ia nai vaega ia o apa lea e tau fia avatu ai se manatu te i ua see ese i le tulaga lea o le apa lea o le taiyo.

Silasila foi lau Afioga, o le mea lea e tupu nei i le apa lea, masalo pe tasi lava se apa lelei taiyo i totonu o se pusaapa, o lea ou te maitau pea i le tele o taimi ou te faatauina mai ai e au ia, e i ai le taimi e ta te alu atu i lea faleoloa, e faatau mai le apa e sau o le manaia ia, pei o le apa foi lea o le tolu taimane e na o le lua lava ia, ae lololo manaia foi lele i le taumafa. Na tupu la i le vaiaso lea na tea nei ina ua ou maua le faleoloa lea i Lotopa manaia ia o le aumaiga, lea sa ou toe tuliina ai lea o lou atalii e aumai ni apa se tolu, ia a o le tolu lea, ia e suavaia uma lava le taiyo ae mo 'ia foi ia pei ni mable po o le eleni lena.

18 MATI 2014

**Tulafono Tau Faaofi o le Teuteuga o le Tulafono o Fefaatauaiga  
Talafeagai 2013 – faitauga faalua**

Sei toe silasila ifo lava lau Afioga po o taiyo nei e i ai taiyo lelei lea e lelei lona sua, ae faalafi mai ai ma isi taiyo e le talafeagai mo le taumafa. A o le faalavelave o lea e tutusa tau ia e faatau ai. O le isi apa mulimuli lea lau Afioga i le Sui Palemia o le apa foi lele o le pink salmon o le apa lea, ua ou alu soo ma ma tauaimisa ma le isi faleoloa, o le pink salmon lea mai Alaska e \$9.00 i le isi faleoloa lea e tele lava pei foi o Vaitele. Ae i ai le isi fale lea, sei ou tau atu i lau Afioga i se taimi, e \$15.00 lona tau ae \$9.00 i Vaitele. Ma e ua ou alu soo lava ma ou faatau pea i le tele o faleoloa, a eseese lava pe \$9.20, ae i ai lava le faleoloa lea e matautia tele le sii lea e sii ai, e \$15.00, ona ou alu loa lea aumai le apa lea e \$9.00 na ou alu lava ma au i le faleoloa lea, ua ou vaai atu, e tutusa uma lava pink salmon mai Alaska, ou te iloa la po o le a le....O lea e fautua atu ai i lau Afioga i le Sui Palemia, sei silasila ifo lava po o talafeagai nei oloa, ma lou faaloalo lava.

**FOFOGA FETALAI:** O lea ua maua le finagalo o le sui usufono, na ona faamanatu atu o le avanoa ona o le ava atu ae o le avanoa mulimuli lona ou te le toe faatagaina se faauilavea i saunoaga faamalamalama a le Minisita, ae ona o le taua o manatu ia e tuu mai o lea e i ai faleoloa ia e siitai latou tau e tataua ona malamalama i ai le Matagaluega i le faatugana. Tulai mai lau Afioga i le Minisita e faaaau le saunoaga.

**Tofa Hon FONOTOE NUAFESILI PIERRE LAUOFO:** Faafetai i lau i le Fofoga Fetalai, e pei ona ou avatu i le amataga o le folasaga, pei o le mafuaaga lea e faatauaina ai a tatou lisi o le tau o oloa e faapipii i luma o faleoloa, ia aua ai ne i sii e le faioaloa le tau o ana oloa. A o le saunoaga a le sui usufono, ia e sao oe i le tau o pink salmon, ia ae manatua foi e ese lava le mea o le siamani e ese foi le mea o le eleni, o le eleni o le mackerel po o le sardine, a o le summon, e ese le pink salmon lea e saunoa ai le sui usufono, e taugata atu la, o apa la na po ituaiga ia la na e le maua i i le tatou lisi, o apa la na e taugata na o le auvaega la ia e lava a latou tupe e faatau ai ia le samani lona, ia o la lava e saoloto i latou e faatau, aua e ese foi le pink salmon, ae e i ai foi le mea e tau o le red salmon, ia e eseese foi ituaiga samani, a o apa na, e le o maua i le tatou lisi lenei.

E i ai foi la isi apa ua maua i sailiiliga a le tatou Matagaluega mo apa eleni, e le o i luga la o le tatou lisi, a o apa ia e taua ai lou talanoa ma le taua e le vaega lea, ona sa maua ia le apa e tai pei e foliga i le lanu tutusa ma le taiyo ae le o se taiyo le apa, e ese lava lona tauga, ae o le apa la e sailiili atu po o fea le mea e sau ai, ae maua ifo, o mea o pusaapa foi ia e aumai o mea o faamomoli, a, e aumai i faamomoli foi ia a nai aiga ai la po o le a le tulaga e aumai e faaoga i faalavelave ua o la faatau i faleoloa, ona oo ai laia i totonu o faleoloa faatau ai lea o ituaiga apa na, ae le o ni apa eleni foi ia o lea e oka mai e le tatou faioaloa ia e auina mai apa eleni mai fafo, e ese ai la ituaiga apa na.

18 MATI 2014

Tulafono Tau Faaofi o le Teuteuga o le Tulafono o Fefaatauaiga  
Talafeagai 2013 – faitauga faalua

O lea la e fautuaina ai le mamalu o le atunuu, sei silasila lelei o apa la na e le lavea i i leaga e le o ni apa foi ia na oka sao mai, ae pei o apa e aumai i pusa foi ia o faamomoli a nai aiga, e faamoemoe lava nai a latou faalavelave po o le taumafaina o apa na.

E i ai foi la ma le isi apa lena e le taua e pei e foliga o le taiyo ae le o le taiyo, o le teio, ese la le taiyo ese le teio, o le teio e ese foi la lona tau. Ia pei la o apa na e tatau ona malamalama i ai le atunuu i le eseese ma le eseese o tau.

Lau Afioga i le Fofoga Fetalai, o le vaega lena o le vaega tele lea e feagai ma le Komiti Faatino lena e aofia ai la ma pisupo, ituaiga pisupo eseese, e 15 ituaiga pisupo foi ia e faatau i totonu o le atunuu, e eseese foi o latou tau. Ia e faatasi ai ma nai isi oloa e faapea foi oloa o lo o gaosi i Samoa nei, e i ai la le tatou ava malosi, le Vailima ma le isi beer foi lea ua i ai nei o le Summer po o le Taula. Ia o lea foi la e aiaia uma ai ia le tau o na oloa o lo o gaosia i Samoa nei.

Lau Afioga i le Fofoga Fetalai, o le teuteuga e pei ona ou talanoa atu, o le teuteuga lena o lo o teuteu ai le saina o le poloaiga lena, a maea ona fono le Komiti Faatino ona tuufaatasi lea o le lisi lea ua latou pasia ona saina loa lea e sui o le Komiti, o sui o le Komiti e tovalu, o le Tulafono tuai la ma le tulaga sa sau ai i ia aso ua leva, e saina uma lava le tovalu lena, seiloga e saina uma le tovalu faatasi ai ma le Failautusi ona faatoa mafai lea ona faasalalau ma faalauiloa le lisi fou ma tufatufa atu i tua i faleoloa. A o le Teuteuga lena o le a le toe manaomia ai le saina uma o le tovalu lea, ae ua lava na o le Taitaifono e saina. A le avanoa le Taitaifono, ia agavaa le Sui Taitaifono e saina i le poloaiga o le tau o oloa mo le atunuu e pei ona i ai e tai tolu masina ma faasalalau ma tufatufa i faleoloa mo le silafia e le mamalu o le atunuu. E pei o le taua lena o lena Tulafono Tau Faaofi.

Lau Afioga i le Fofoga Fetalai, ua faaumiumi se faamatalaga ona ia malamalama e le gata ina malamalama ai le tulaga o le galuega o lo o faatino e le Komiti Faatino, ae ia malamalama foi i le tulaga o le Tulafono ma le galuega lea i le lisi po o le poloaiga e tufatufaina atu i tua i faleoloa. E taua foi mo le faafofoga mai o le atunuu e silafia ai le mafuaaga ma le tulaga lea ina ia aua ai nei faaseseina tagata faatau.

E pei o lou tulai atu lea lau Afioga i le Fofoga Fetalai e faamalamalama lena Tulafono Tau Faaofi taua tele. Faafetai mo le avanoa.

**FOFOGA FETALAI:** Faafetai saunoa i lau Afioga i le Minisita mo Pisinisi, Alamanuia ma Leipa. E manatu foi ua taua le folasaga malamalama ma manino e atili taua ai ma faailoa aloaia le mafuaaga ua toe teuteu ai le tatou Tulafono. E faamalo atu i sui usufono mamalu le onosai mai. Ua tuneva le po a o faasolo pea a tatou galuega.

Tulai mai le sui usufono mo Aana Alofi Nu 3.

18 MATI 2014

**Tulafono Tau Faaofi o le Teuteuga o le Tulafono o Fefaatauaiga  
Talafeagai 2013 – faitauga faalua**

**Afioga TOEOLESULUSULU CEDRIC POSE SALESA SCHUSTER:** Faafetai i lau Afioga i le Fofoga Fetalai mo le avanoa. O se fesili e fia malamalama ai e tusa ma le saunoaga maeaea ma le malamalama a le Afioga i le Sui Palemia po o le Minisita e a ia le Tulafono Tau Faaofi. Ona o lea ua ia taua a le avanoa le Taitaifono ona saina lea e le Sui Taitaifono, peitai lau Afioga i le Fofoga Fetalai, o le Tulafono Tau Faaofi lea ua taoto mai a le avanoa le Taitaifono ona saina lea o le CEO po o le Pule o le Matagaluega. Pe ua i ai se eseese ua i ou luma ma le vaega ua faapea ona saunoa i ai le Afioga i le Minisita?

O lona lua, atonu e leai sou lagona e tele se faamalamalama a le Minisita ona e vaai atu e lua lava vaega taua o le Tulafono Tau Faaofi lea o lo o aumai. Muamua, o le faataga ona saina e le Pule o le Matagaluega pe a le avanoa le Taitaifono.

Ma le lua, o le Failautusi o le Komiti Faafoe lea o lo o taua, ua suia mai i le Pule Sili. A o lea ua faapea ona faamalamalama uma vaega o aiaiga ma galuega fai a le Komiti Faafoe, ae le o mafai ona maua i ai se manatu ona e le o sau i totonu o le Tulafono Tau Faaofi o lo o faapea ona faataatia.

Ona oo ai lea o se lagona lau Afioga i le Fofoga Fetalai ona e maitau atu, e pei foi ona saunoa le Palemia i le taumafaiga o tatou a Fonotaga, e vaavaai atu e silia i le 100 a tatou Tulafono ma Lipoti o lo o fia faataatia, a o le talosaga ia mafai ona e pei foi ona saunoa lau Afioga i le Fofoga Fetalai, e tataua ona faapuupu'u atu o matou manatu ma fitoitonu i mataupu o lo o faapea ona faaalua i a tatou Tulafono. O le tuualalo lea lau Afioga i le Fofoga Fetalai. Faafetai.

**FOFOGA FETALAI:** Malo faafetai. Ia, se i tulai mai lau Afioga i le Sui Palemia.

**Tofa Hon Fonotoe Nuafesili Pierre Laufo:** E leai, se i avatu lava se tali vave i le fesili a le sui usufono mamalu. A silasila i le tatou poloaiga aoao o tau o oloa lena e pei ona i luga o le Lualua a Fono, o sui o le Komiti, o le Sui Taitaifono, o le Pule Sili foi lena po o le CEO. O le tulaga lena o lo o i ai, o lona uiga a le avanoa le Taitaifono, e mafai la e le Sui Taitaifono ona saina le poloaiga. E faapea foi le tulaga faa-Failautusi lena e pei ona i ai, o lo o faasee ese le CEO ae tuu i ai le ACEO o le vaega tonu lea e nafa ma le tapenaina o le lisi lea o tau o oloa.

Ma le faaaloalo lau Afioga i le Fofoga Fetalai.

**FOFOGA FETALAI:** Malo faafetai. Tulai mai le sui usufono mo Falealupo.

18 MATI 2014

**Tulafono Tau Faaofi o le Teuteuga o le Tulafono o Fefaatauaiga  
Talafeagai 2013 – faitauga faalua**

**Afioga Hon AEAU PENIAMINA LEAVAISEETA:** Lau Afioga i le Fofoga Fetalai, ou te tulai atu ma le faaaloalo i le pau o le Palemene i lenei itupo ona o se lagona po o se manatu e tusa ai ma le Tulafono Tau Faaofi o lo o i le Laulau a Fono.

O le tulaga muamua lau Afioga i le Fofoga Fetalai, e ava tele i taualumaga o le Fono. O le Tulafono Tau Faaofi lenei o lo o i le Laulau a Fono, ne i te i ua faapea e le o... ae faataatia uma nei lagona ona o le ava i le tatou vatapuia. Ua uma le taimi atoa o saunoa le Afioga i le Minisita i le tau o oloa ma mea na. O le Tulafono Tau Faaofi lenei lau Afioga i le agaga faaaloalo, e puupuu lava. E tasi lava le agaga o le Tulafono Tau Faaofi lenei, o le faavaeina o le Komiti Faatino fou. Ona pau lava lea. E leai lava ma nisi gaogaosa. O lea la o le a tuu le...

**FOFOGA FETALAI:** Malie lau Afioga i le sui usufono mamalu se i tuu atu le avanoa i le Minisita.

**Tofa Hon Fonotoe Nuafesili Pierre Laufofo:** O le mea e fia faasao lau Afioga i le Fofoga Fetalai, o lenei Tulafono Tau Faaofi e le o le faatuina o le Komiti Faatino fou. Na o le pau lava le mea lea e taua lea e tau agai mai ai le sui usufono mamalu, o le sui o le saina. O le a le toe saina uma lava le Komiti atoa e toavalu, a o le a lava na o le Taitaifono e saina.

O le faasaoga lena o le tatou Tulafono Toe Teuteu.

**FOFOGA FETALAI:** Tulai mai le sui usufono mamalu e faai mai le saunoaga.

**Afioga Hon AEAU PENIAMINA LEAVAISEETA:** Ona pau lava lea o le agaga atoa o le Tulafono Tau Faaofi lenei, o le faavaeina o le Komiti Faatino fou, e leai lava ma nisi mea. O lea la o le a alu sao lou manatu agai i le Tulafono Tau Faaofi.

O sui o le Komiti Faatino lenei lau Afioga lea ou te fia tautala i ai, o lo o i ai sui o le Matagaluega o Pisinisi, Alamanuia ma Leipa, Matagaluega o Tupe, Matagaluega o le Va i Fafu, o le aufaipisinisi atoa ai ma le Pulega o Tagata Tafafao Maimoa Mai Fafu. Ia, o le ala lena o lou tulai atu. A fau se manatu, o le taua o sui nei, o fefaatauaiga, ae atonu e le na ma le laina i le taimi lenei i le lagona o le leo o le atunuu i le tele o le tamaoaiga e fia ave i fafu, ae le iloa po o fea le mea e o i ai. O lea tonu lava la e i ai le Tulafono Tau Faaofi lenei.

O le vaega lea o fefaatauaiga lau Afioga...

**FOFOGA FETALAI:** Malie lau Afioga i le sui usufono mamalu, se i tuu atu le avanoa i le Sui Palemia.



18 MATI 2014

**Tulafono Tau Faaofi o le Teuteuga o le Tulafono o Fefaatauaiga  
Talafeagai 2013 – faitauga faalua**

Tofa Hon Fonotoe Nuafesili Pierre Lauofo: Lau Afioga i le Fofoga Fetalai, o se mea e fia faasao. O le Tulafono Tau Faaofi leni, e le o se Tulafono i le tulaga e aiaia ai oloa e avatu i fafo. O le Tulafono Tau Faaofi leni e faatulaga ai le tau o oloa o lo o aumai i totonu o le atunuu, lea e aumai e le aufaioloa ia aua ai nei taugata tele le tau o a latou oloa, aemaise lava oloa ia e aupito sili ona alumia e fesoasoani ai i le atunuu ina ia tau taofiofi ai i lalo le tau a le aufaioloa ia aua ne i maualuga tele, ae le o se mea o ni oloa e ave i fafo.

**FOFOGA FETALAI:** Mo le faasaoina o le taimi lau Afioga i le sui usufono mamalu, se i tuu atu le avanoa i le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o le isi lea faitioga a le Itu Agai e faapea e le o lava le transparency - e le o malamalama mea o lo o fai e le Malo. O lea la sa taumafai atu le Sui Palemia e matua faamalamalama mafuaaga o le Tulafono Tau Faaofi aua o latou tiute fai. O lea ua faamatala uma atu galuega o lo o faatino ina ia malamalama ai ina ia aua ne i tuuaia le Malo i le faapea mai o ni mea faanunumi. O lea e faamalamalama ma ou te lagona foi lau Afioga, e tataua ona faafetaia le Sui Palemia i le manino o lana folasaga, aemaise o le faatinoga o tiute o le aufaigaluega ina ia lagolago i le taumafaiga ina ia taofiofi le siitai o oloa. O lea ou te matau atu, e toatamai sui usufono ia e tutu mai i le faamalamalama atili o mea. E pei ua ese le mea sa faitio mai ia faamalamalama, a o lea la ua faamalamalama atu ae pei e foliga mai ua malamalama tele. Ua le iloa la po o le a le mea a fai, a malamalama tele ua ita, ae a faamalamalama atili atu foi ua feita.

Lau Afioga i le Fofoga Fetalai, se ua le iloa po o le a le mea a fai. O le Fonotaga leni, o le Fonotaga ua manatu au nei ma sui o le Kapeneta, ia aua ne i i ai ni mea e nanaina ae ia faamalamalama uma mea ia malamalama ma le o soo faasalalau faapea e leai se transparency. O le transparency o le faa-Samoa, malamalama. O lea la e faamalamalama atu ina ia aua lava ne i i ai se tulimanu e toe pogisa ai le Maota nei.

O le tasi lenei taiala e mafua ai ona maualuga le vaai mai a atunuu i fafo i le Malo leni, good governance ina ia malamalama mea. O le fesoasoani atu lenei, ae ese lenei po a faamalamalama atu mea a o lea foi ua toatamai ona ua malamalama tele, ae mananao ia aua le faamalamalamaina tele. O le a faapea la, a mumusu lava outou e faamalamalama, o le a fai pea le galuega a le Kapeneta ina ia matua malamalama.

**FOFOGA FETALAI:** Tulai mai le sui usufono mamalu e faaauau le saunoaga.

18 MATI 2014

**Tulafono Tau Faaofi o le Teuteuga o le Tulafono o Fefaatauaiga  
Talafeagai 2013 – faitauga faalua**

**Afioga Hon AEAU PENIAMINA LEAVASEETA:** Faafetai i lau Afioga. Ou te le o malamalama i le mea lea sa talanoa i ai le Palemia. O le a tuliloa pea so matou manatu i le Tulafono Tau Faaofi i le faavaeina lea o le Komiti Faatino. Ok, o le fefaatauaiga, e tau loa le upu lea fefaatauaiga, e taua tele. Po o le alu i fafo po o le sau i totonu, o le Komiti tonu lava lea. O lea la ua uma ona lau atu i latou e i ai i le Komiti lea.

O le fautuaga lau Afioga i le Minisita, o se sui i le Komiti o le aufaifaatoaga, le Komiti lea o fefaatauaiga. Aisea? O le mea tonu lava lea o lea e gugulu ai le aufaifaatoaga. Ia faafofoga la lau Afioga i le Fofoga Fetalai? O le trade, e aafia ai le Ofisa o le Palemia e aafia ai le Ofisa o Fefaatauaiga ma le Agriculture. A omai la tagata o fea e o i ai? E fetulinai solo. O le Komiti Faatino lenei, ia i ai se sui o i latou nei aua o lea e matauina le mafatia.

Na saunoa le Afioga i le Palemia talu ai ne i i le paie, ia galulue. Ia ua lelei, omai loa ua galulue, o le matua tele lava. O fea la a ave i ai? Fai mai le Palemia, faifai lemu. Ia a faifai lemu a o le a le mea na fai mai ai e paie? See? O fea le trade? O fea tonu lava le mea e sulu i ai? O le Ofisa o le Palemia, o le Ofisa o le MCIL po o le Agriculture e o i ai le atunuu? O le mea tonu lava lea na fai atu ai e tataua ona i ai se sui o i latou ne i i le Komiti lenei ona ua le iloa po o..... e tele mea o le le mafai ona ave i fafo o oloa toe leai se faamalamalama, leai se sulufaiga....

**FOFOGA FETALAI:** Malie le sui usufono se i tuu atu le avanoa i le Afioga i le Minisita.

**Tofa Hon Fonotoe Nuafesili Pierre Lauofo:** Lau Afioga i le Fofoga Fetalai o le mea e fia faasao. E pei o lea e manino lava sui o le Komiti. O lea foi e aafia ai ma i latou o faifaatoaga. E toatolu sui o le atunuu o lo o i ai i totonu o le Komiti lea, o i latou o faifaatoaga o lo o malamalama lelei i le tulaga o tau o oloa ma mea faapea, aemaise nuu i tua ma Savaii. Ma e ese lava le Komiti e nafa ma mea tau trade, ese le Komiti lea. O le Komiti lea o lea e nafa tonu lava ma le faavasegaina o le tau o oloa e auina mai i totonu o le atunuu. O lona uiga o oloa e gaosi i fafo ma nai isi la vaega ia e i ai oloa ia pei ona ou taua o lo o gaosia iinei e i ai le ava malosia. Ia pei o le tulaga lea lau Afioga i le Fofoga Fetalai, o lea o lo o malamalama, o le Komiti o lo o i ai e silafia ma malamalama uma mea ia e fesili mai i ai le sui usufono mamalu.

**FOFOGA FETALAI:** Malo faafetai. Ua maea lau folasaga lau Afioga i le sui usufono mo Falealupo?

Tulai mai le sui usufono mamalu.

**Afioga Hon AEAU Peniamina Leavaseeta:** Se i toe faamalamalama atu le mea lea ona uma ai lea.

18 MATI 2014

**Tulafono Tau Faaofi o le Teuteuga o le Tulafono o Fefaatauaiga  
Talafeagai 2013 – faitauga faalua**

**FOFOGA FETALAI:** Tulai mai le sui usufono mamalu.

**Afioga Hon Aeau Peniamina Leavaiseeta:** E le o malamalama foi lau uo i le mea lea. O le igoa o le mea leni o le Trade, Commerce and Industry. O le sao lea. O le a la le mea lea e fai atu ai? Ona pau lena o le fautuaga. O le mea lea e manao i ai e i ai le Sosaiete a Farmers po o le afaifaatoaga, e leai la se sui o i ai iinei. E faigofie lava, ona amanaia ai lea o i latou i tonu fai.....

**FOFOGA FETALAI:** Malie le sui usufono mamalu o lea se i faamalalalama atu.

**Tofa Hon Fonotoe Nuafesili Pierre Lauofo:** E le o malamalama foi lau uo. A silasila i ai, o oloa mai fafo. O lea foi o le a toe fai atu, o oloa e aumai i totonu o le atunuu e faaulufale mai fafo. E le o aofia ai la ni oloa tau faatoaga iinei i faatoaga ia a tatou o lo o i Samoa nei. E le o aofia ai iinei i le Komiti Faatino leni. O le sao lena lau Afioga i le Fofoga Fetalai ma o oloa ia e pei ona ou tolaulau atu, o apa susu, o susu ma ituaiga susu eseese e aofia ai ma ituaiga eleni eseese. O fea la e oso mai ai faatoaga? E pei o le mea lena.

**Afioga Hon Aeau Peniamina Leavaiseeta:** Ou te masalo e le o maua mai a o lea o le a ou toe fai atu. O lea o lo o fia iloa e tagata aua ia manatua o le Trade lea o fefaatauaiga, e i ai le trade i o i le Ofisa a le Palemia, e i ai le MCIL, e i ai le afaifaatoaga.

**Susuga Hon Tuilaepa Fatialofa Lupesoliai Aiono Neioti Sailele Malielegaai:** Lau Afioga i le Fofoga Fetalai.....

**Afioga Hon Aeau Peniamina Leavaiseeta:** Na ona fesoasoani lava i le afaifaatoaga aemaise lava le itu lea i fefaatauaiga.

**Susuga Hon Tuilaepa Fatialofa Lupesoliai Aiono Neioti Sailele Malielegaai:** O le faalavelave e le o faitauina lelei le Tulafono. Se i tilotilo ane i le vaega tonu lena e teuteu e fitoitonu lava i le Vaega 49 ma le 51 o le Tulafono Tau Faaofi lena o lo o manino. Ua fuafuaina le Tulafono Tau Faaofi ina ia teuteu ai le Fuaiupu 49 ma le 51(7) o le Tulafono Tau Faaofi. O lona uiga na o le pau lava na o mea e lua ia e talanoa i ai, ae e le o talanoa i le Tulafono atoa. Na o vaega lava ia e lua ia e talanoa i ai. O lea ou te vaai atu o lena faatoa faitau lelei mai le pepa a le sui usufono. O le faalavelave lea ona o le tatou po lava ma e faamalulu atu foi ona o tulaga lava o le po, o isi e momoe, momoe, momoe, te i mai le talanoa i le Tulafono Tau Faaofi ae talanoa solo.

18 MATI 2014

**Tulafono Tau Faaofi o le Teuteuga o le Tulafono o Fefaatauaiga  
Talafeagai 2013 – faitauga faalua**

**FOFOGA FETALAI:** E manatu ua malamalama le finagalo o le sui usufono ma o lea foi ua tali manino le Afioga i le Sui Palemia o lo o i ai sui o le atunuu. Ou te talitonu o sui o le atunuu o sui foi na o le aufaifaatoaga aua e tofu lava sui o le atunuu ma faatoaga.

Tulai mai le sui usufono mo Gagaemauga Nu.2 ona sosoo ai lea ma le sui usufono mo Faleata Sisifo.

**Tofa Levaopolo Talatonu:** Faafetai lava i lau Afioga i le Fofoga Fetalai mo le avanoa. E momoli muamua atu lava lau faafetai i lenei itu mo le faamalalamalama o le Tulafono Tau Faaofi ua manino atoatoa ai Teuteuga ia na aumai o le Tulafono Tau Faaofi, ma o le tulaga foi lena ua mafala ai a tatou mea ona o le le agai sao o le Sui Palemia i lana Tulafono Tau Faaofi ma le Teuteuga lea.

O lau fesili lau Afioga i le Fofoga Fetalai i le Afioga i le Sui Palemia, pe i ai se mafuaaga ua fai ai lea Teuteuga, ua le toe saina atoa ai le vaega lea e toavalu, a o lea ua saina na o le Taitaifono. E i ai le fasi fuaitau lea e faapea ua toatele naunau ona e faigata ona sue ina ia sainia le poloaiga lea o le tau o oloa, ailoga o se mafuaaga tataua lea mafuaaga.

O lona lua lau Afioga i le Fofoga Fetalai, o le tulaga lea sa saunoa i ai le Afioga i le Sui Palemia e faapea a le avanoa le Taitaifono ona sainia lea e le Sui Taitaifono ma o le Faauluuluga foi lea o le Matagaluega. O le fesili lau Afioga i le Fofoga Fetalai, pe ua toe sui foi lea faiga faavae e le Malo o le le toe auai o Faauluuluga o Matagaluega i totonu o Komiti Faatino. O lea la ua umia nei e le Sui Taitaifono e le Faauluuluga o le Matagaluega.

O le isi vaega lea na salaese ai le saunoaga a le Afioga i le Sui Palemia i le Tulafono Tau Faaofi, o mea ia o lisiti i faleoloa. Po o i ai la se Tulafono po o se faiga faavae e aiaia ai tulaga ia i faleoloa e le o mafai ona aumai lisiti i tagata faatau?

E pei o nai fesili na lau Afioga i le Fofoga Fetalai e fia malamalama ai.

**Tofa Hon FONOTOE NUAFESILI PIERRE LAUOFO:** Lau Afioga i le Fofoga Fetalai, masalo e lelei le fai ma tuu atu nai tali ia e faigofie ai ona malamalama le tatou mataupu.

**FOFOGA FETALAI:** Tulai mai pe a faapea o lou finagalo lena ae fai ma tali.

**Tofa Hon FONOTOE NUAFESILI PIERRE LAUOFO:** E tusa ai ma fesili a le sui usufono mamalu e pei ona tulai mai. O le tulaga ua i ai le Teuteuga lea, a uma ona faatino se fonu ona faatoa tapena lea o le poloaiga ae ua tuua le fonu. O le mea lena o lea sa fai mai i ia mau aso ua leva, e pei ona ou taua masalo pe ua 40+ tausaga ma faaauau ai i le Tulafono o le 1998.

18 MATI 2014

**Tulafono Tau Faaofi o le Teuteuga o le Tulafono o Fefaatauaiga  
Talafeagai 2013 – faitauga faalua**

O le faiga lea sa fai mai ai i aso la ma o faiga tuai. Toe pau lava la lea o le Tulafono lea e totoe o lea lava e fai lea faiga o le saina uma lava o le Komiti Faatino atoa, a o le tele lava o Komiti ia ua i ai, a saina lava le Taitaifono o le tulaga lena aua ua maea ona pasia e le Komiti ma ave foi i ai le latou ioega atoa ona faamamalu lea pe a maea ona saina. O se faiga lena e faafaigofie ma vave ai ona faagasolo le faatinoga o galuega a le Matagaluega faapea foi le tufatufaina atu o le poloaiga lea i tua i faleoloa.

O le tulaga foi lea sa sau ai i aso ia e oo mai i aso nei, o le Komiti lea o le Komiti Faatino ae e le o se Komiti foi lea o ni Faatonu. O le Komiti Faatino lea e i ai ma le Ofisa Sili po o le CEO na te tauavea le tulaga lea o le Sui Taitaifono. O le Tulafono tuai lava lea sa sau ai i aso ia lea o lo o i ai i le taimi nei. E pei o le vaega lena o le Komiti e faatinoina le tele o galuega, ae e le o se Komiti foi lea o Faatonu e pei ona masani ai.

Ua tele faasea ua maua e le Matagaluega i faleoloa e le tuuina mai ni lisiti. Masalo e tau manatua foi e le sui usufono mamalu, e le i leva atu foi ona fai ai tusitusiga i lea foi vaega. E pei lava o se faleoloa i le vaimeia lea i Apia, po o Lalovaea ea po o fea. O lena na sau ai foi faitioga a tagata faatau i le tulaga tonu lava lea i lisiti. Na vave lava foi ona gaoioi le Matagaluega ma e le i ai lava se tuai ona tali i le faasea lea. Ona fai lea o sailiiliga ma suesuega ma faatonu ai le faioloa lea i le Tulafono e pei ona i ai, ma o i ina na usitaia ai ma o le taimi nei o lo o usitaia lava.

O le aoga foi lea o le faamatala atu o le tulaga lea mo le silafia e le mamalu o le atunuu o lo o faafofoga mai. O lo o avanoa lava le Matagaluega e momoli mai i ai ni lipoti i faleoloa e le o usitaia le tau o le poloaiga lena faapea foi ma isi vaega ia o lo o manaomia i lalo o le Tulafono.

O le tali atu lea lau Afioga i le Fofoga Fetalai.

**FOFOGA FETALAI: Malo faafetai. Tulai mai lau Tofa Lealailepule.**

**Tofa Lealailepule Rimoni Aiafi:** E faafetai atu i lau Afioga i le Fofoga Fetalai le onosai i lena afiafi. O le mea foi lau Afioga i le Fofoga Fetalai ua tele nai tausaga i le Palemene. O lo ta ita lava malamalama se i uma lauga a sui usufono ona tali lea, ae afai o lea ua sui e le Afioga i le Sui Palemia o le fesili atu lava ma tali mai, e le afaina.

O le tatou Tulafono Tau Faaofi, e tasi lava le auga o le Tulafono Tau Faaofi o le fetuunaiga o le malosiaiga o le Komiti Faatino ina ia faaoga le saina a le Sui Taitaifono po o le CEO pe a le avanoa le Taitaifono. O se mea lelei tele, e practical o se mea ua leva ona tataua ona sui, ave i ai le lagolago. Sa tataua foi ona tuu i ai ma le saina a le Failautusi aua o mea ua uma ona fonu ai le Komiti. Ona pau lava lea o le suiga. O le Failautusi lea ua fai mai e aua le toe Failautusi le CEO ae faa-Failautusi le ACEO.

18 MATI 2014

**Tulafono Tau Faaofi o le Teuteuga o le Tulafono o Fefaatauaiga  
Talafeagai 2013 – faitauga faalua**

O le mea lea e sese o le Tulafono Tau Faaofi, o lea e fai mai le faa-Peretania e tuu e faa-failautusi le Supervisor o le Vaega e vaai le Fair Trading. E leai ni galuega faapea e tau o ni supervisor a o le ACEO. E tatau ona toe faasao i totonu o le Tulafono. Ia vaai i le faigofie, ua uma, ae ua aoga foi la le lauga a le Sui Palemia i le laulau o tau o oloa o lea ua iloa ai ma faafofoga mai Samoa, e 24 ituaiga eleni eseese, e leai ma se eleni o toe i lalo i le \$2 pe \$3 le tau, ua na o eleni tai \$5, \$10 ma \$20. Ua outou tagai la i le mea lea ua tupu? O lea la e faafetai ai, faafetai i le laulau mai. O isi eleni nei e lima pe sefulu tausaga e le i faaaogaina e se aiga aua foi na o le aumai i le isi faalavelave, ave i le isi faalavelave, ave i nofoaga e faatau ai ma ave i isi faalavelave. E oo ane i le taimi e faaoga ai ua matua tele le faaletonu. E tatau ona i ai se Tulafono e faatapulaa ai le taimi e faaaogaina pusa eleni aemaise eleni ia e faaigoa o eleni fai faalavelave. O lona uiga o eleni e aumai e fai ai faalavelave ae e le taumafaina? E mataga tele lea igoa e tuu i a ii lea mea.

O le isi vaega o lea e fesili pea tagata leaga o lea ua laulau, aisea e taugata ai le oloa e fau i Samoa pe a fuafua i oloa mai fafo? E taugata le fuamoia lea e maua iinei i lo fuamoia ia e aumai mai fafo, e taugata le sosisi lea e fai i Samoa i lo le sosisi lea e aumai mai fafo.

O le isi vaega lea e taatia pea i luma Maota lea e fia avatu ai le fautuaga, o lea e faapea i le taimi e tuu mavaevae ai le wholesaler ma le retailer aua e i ai tagata e i ai le wholesale ae toe retail. O le mea lena e mafua ai ona tele le fesootaiga o le tau o oloa. Aua e alu atu ne ii le wholesale lea e iinei ma le retail faatau lana pauna moa, vaeatu lava i le \$2, a o le faleoloa le la e tua atu e le mamao tele atu, e le mafai ona tuua i lalo lana tau aua leaga e gau ai aua e leai se tulafono o le alu i lalo, ae na o le tulafono o le alu i luga. O vaega ia e aoga ona tatou tilotilo i ai.

O le isi mea o vaega ia tiliva oloa ia e taamilo i tua, ua matua faatupulaia le toatele. Po o i ai se vaega e monitor ai le vaega lea aua o le vaega lea na taua e le isi sui usufono, a o atu ae tapa mai faleoloa i ni lisiti ae fai mai e leai ni lisiti. Po o i ai ni o latou nofoaga autu e operate mai ai a latou pisinisi ma e tatau ona fai se Tulafono e iloilo ai ma tagai lelei i mea nei mo le agai i luma.

O vaega la na lau Afioaga i le Fofoga Fetalai lea e fia maua i ai se malamalamaaga, a o le tatou Tulafono Tau Faaofi, e ave le lagolago a lou nei sui usufono aua o lea na o le lua suiga, e talafeagai suiga ia ua aumai i le Tulafono Tau Faaofi.

Ma le faaaloalo lava.

**FOFOGA FETALAI:** Malo, tulai mai lau Afioaga i le Minisita e fai lau tali faaiua ua maea sui usufono sa fia saunoa.

18 MATI 2014

Tulafono Tau Faaofi o le Teuteuga o le Tulafono o Fefaatauaiga  
Talafeagai 2013 – faitauga faalua

Tofa Hon FONOTOE NUA FESILI PIERRE LAUOFO: Faafetai i lau Afioga i le Fofoga Fetalai ma o le tulaga lena e pei ona i ai. O le faaupuga lava o le Tulafono Tau Faaofi o lo o aumai ai le Supervisor o le vaega lea e pei ona taua, ma o le Supervisor o le Vaega lena o le ACEO, a o le ACEO la o lea e faaupu o le Failautusi. E pei la o le tulaga lena e le o tuuina faa-ACEO, a o le Failautusi i le Komiti Faatino ua mafua ai. O le mafuaaga tonu lea e fai ai le tatou poloaiga lena e taofiofi ai i se tau talafeagai le tau o le apa eleni, aua a le faia le tulaga lea i le taimi nei o lona uiga e leai la se apa eleni e i lalo ifo o le \$3 po o le \$4. A o le faiga lea e fai ai lea e mafua ai le tatou Komiti lena e taofiofi i lalo i le \$2 po o le \$2 ma sene. O le mafuaaga lena o lea e taua ai le tatou Komiti lena ina ia taofiofi le tau o le oloa lea i lalo i se tau talafeagai ma gafatia e le mamalu o le atunuu i le tulaga o lo o i ai.

E tele lava le mataupu lea o le taugofie o oloa mai fafo i lo oloa o lo o gaosia i Samoa, ma masalo o lea e malamalama ma silafia lea tulaga. O le tele foi o a tatou oloa ia e gaosi i Samoa nei e faaoga ai mea e aumai mai fafo a le o le gaosiga o le oloa, ae faapea foi le tulaga o le tuu apa pe tuu fagu pe tuu foi i pepa, o le tulaga foi lena, e aumai uma lava mai fafo mea uma ia. O le mafuaaga foi lena e taugata ai isi a tatou oloa o lo o gaosi iinei nai lo oloa o lo o auina mai fafo. Aua o fafo, e tele atu le scale o lo o produce ai po o la e mass produce i fafo mea o oloa. E taifia container masalo pe 10,000 container i le tausaga, ae 20,000 container i le tausaga e aumai lalo o isi atunuu e gaosi mai Asia mai lalo. E faigata foi la ona tauva a tatou oloa e gaosi iinei i ituaiga oloa na aua e tasi lava le gaosiga o oloa faapena, e taifia miliona, fia miliona. A fuafua la i ai, o le mafuaaga foi lena e ala ai ona pau le tau ma taugofie oloa o lo o gaosi i fafo. E le faigofie foi la i le tulaga o lo o faapena ona feagai ai ma tatou i Samoa nei i nai gaosi oloa o lo o taumafai pea iinei.

O le mataupu tonu lea e le faigofie le mataupu na saunoa i ai le sui usufono, o le mataupu lea i le tuuvaevaeina o le retail ma le wholesale. O le tulaga lena e manaomia ai le Tulafono ma o le Tulafono e agai tonu lava i le faiga lea ma isi faiga e o faatasi ma le ituaiga faiga lea, o le tuuvaevaeina o wholesale ma wholesale o lo o tapenaina nei le tatou Tulafono lena, masalo po o le tausaga nei lava e oo mai ai i le Maota. O le Tulafono lena e tau o le Competition Law, o lo o i ai vaega e tataua ona silasila totoa i ai le au tusi tulafono, ona e aafia foi la, e tau vaavaai i le tulaga, po o fea tonu e ofi i ai le tulaga lea o Komiti Faatino o lo o faatulagaina ma faavasegaina le tau o oloa i totonu o le atunuu, aua e aafia uma i totonu o le vaega lea e tau o le competition law po o mea e tau o comparative advantage i totonu o maketi eseese e faaoga ai ituaiga oloa eseese. E tele lava la le vaega lea e saunoa i ai le sui usufono mamalu, ae ou te taofi sei oo mai le tatou Tulafono lena ona tatou agai lea e lauilii i totonu o le Maota lena, ma e le o se Tulafono foi e faigofie lea o lo o galulue i ai le tatou Malo.

18 MATI 2014

**Tulafono Tau Faaofi o le Teuteuga o le Tulafono o Fefaatauaiga  
Talafeagai 2013 – faitauga faalua**

E i ai le tele o vaega ia e faatau savali oloa i le tulaga lea o le faaaoga o taavale, o loli ma tulaga faapena o mea o kiliva. O kiliva uma nei ma loli o lo o faaaoga tusi lisiti, ma o le tulaga lena, e o atu e faatau atu oloa i faleoloa i tua e faaaoga tusi lisiti e faamauina ai faatauga. A faapea e le faaaogaina e se loli, o lona uiga o lena e i ai tulaga e ono aafia ai foi i latou i le Tulafono pe a le faaaogaina ni tusi lisiti. Ia manatua so o se pisinisi lava, e fai foi o latou laisene pisinisi. O lona uiga e manaomia faamaumauga faapena aua la le taimi e fai ai latou returns i le faaiuga o le tausaga. Ma e taua foi le faamau o faatauga faapea i lisiti aua foi le totoigiina o latou lafoga. E le gata la i lafoga a o mea tau GST ae faapea foi lafoga foi ne ii le faaiuga o le tausaga, o mea o income tax returns.

O vaega la ia o faiga na pei ona silafia e aoina mai ai tupe o lafoga nei i totonu o le tatou Malo, ona faapena foi lea ona toe fai le faasoia a le Malo aua tatou atinae tetele ma atinae o lo o galulue le Malo e faatino aua le manuia o le tatou atunuu.

Lau Afioga i le Fofoga Fetalai, e pei o vaega ia na laga mai, o lena ua malamalama fesili. Faafetai.

**FOFOGA FETALAI:** Toe tasi lava le Tootoo lea e fia tuu atu i ai le avanoa toe o le Tuiatua Faanofonofa ona maea ai lea lau Afioga i le Sui Palemia.

**Afioga TAFUA MALUELUE TAFUA (Aleipata Itupa i Luga):** Faafetai lava i lau Afioga i le Fofoga Fetalai. E maitau atu ua leva foi ona faaaaogagase le tatou Palemene i lena aso, malo le onosai i lau Afioga, malo foi le faatoatoa. E puupuu lava si au mataupu e ese mai lou lagolagoina o suiga ia e lua ae sei fai pea sau tala i lau uo lea sa tulai mai e uiga i le taugofie o oloa mai fafo i lo oloa o lo o gaosia i totonu o Samoa. Atonu o le mea foi lea e tupu i Niu Sila, e taugofie atu le apa supokeli ma mea o vegies ma fruits mai Ausetalia i lo apu ma moli o lo o totoina lava i totonu o Niu Sila. E le fuatasi i so o se atunuu, e faapena foi i Hawaii, e taugofie atu mea e aumai Amerika i mea o la e maua i Hawaii. Atonu e faapena foi si o tatou atunuu.

Ae ua ou tulai atu ma le faaaloalo lau Afioga i le Fofoga Fetalai o si mataupu lava lea a ou alu i le fale ou moe ae le i tau atua, e tuualalo ai i le Afioga i le Sui Palemia, o lona uiga ua le faia lou tiute. O le tulaga lea sa e saunoa lau Afioga i le Sui Palemia, e tai tolu masina ma aumai le tau o oloa fou e faapipii i luma o faleoloa i faamalama ma faailo foi nei e iloa lelei e tagata faatau. O le manaia ia o lea fuafuaga, ae faafetai tele i le Matagaluega a le Trade and Commerce i le faiga o lea faiga lelei e le gata i le faalauiloa, ae o faailoilo foi e faapipii i faleoloa.



18 MATI 2014

**Tulafono Tau Faaofi o le Teuteuga o le Tulafono o Fefaatauaiga  
Talafeagai 2013 – faitauga faalua**

Ae na pau lava o lea lau Afioga e fia faailoa atu ma le faaaloalo, e manaia lava pe a faalapopoa tusitusiga la e i ai ina ia iloagofie e tagata le tau o oloa e pei o le lapopoa lea e i le pepa lea e iloa mamao atu lava pea e alu atu e fai lau faatau, ona faigofie lea e le gata i le faatauolooa ae faapena foi mo tagata e o atu e fia faatau ia oloa, e silafia ai le tau sao o le a latou totogiina. Ma le faaaloalo.

**FOFOGA FETALAI:** Malo. Ia, sei tulai atu le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o le taua ia o mataupu ia na laga, ae ou te lagona foi e tele le malamalamaaga i mea ia e gaosi iinei ma mea mai fafo. O se faamalamalamaaga, sa alumia lava le tatou pisupo hellaby lea sa fai i Samoa. O fea nei o i ai le pisupo lena? Ua tapuni ona e taugofie mamao ai pisupo mai fafo. O le mafuaaga, ona o le taugata o mea nei o apa e aumai fafo, e le gata i lea a o le maketi foi e moomia mea o ituaiga povi ia e aumai fafo e taugofie mamao atu i tatou povi, sei tulou. Ia, faaopopo loa i ai ma tau o le mea lea o le aumai tuu i containers ae cool, e faaaisa ia umi, tuu ifo le tau, ua matua maua lava mamao le tau o tatou pisupo. E i ai la oloa e i ai le faaupuga foi lea faatamoaiga, e fai mea e aupito sili atu ona taugofie ma talafeagai mo lo outou atunuu, the law of comparative advantage. E i ai la mea e le mafai ona tatou faia taugofie, ona tatou o lea e aumai isi atunuu e sili atu lena. E i ai foi la le mea na tupu, ia manatua foi le tatou peepee sa gaosia e le tatou saienisi o Petrana i le 1970, sa latou perfect ai le formula e mafai ai ona gaosi le peepee ae felesi lava pei o la e fou i taimi uma. O tatou la i Samoa nei, sa mua i malae i le gaosia o le peepee ma le ituaiga faiga e tumau ai pea le lelei mo se taimi umi. O le mea la ua tupu, ua alu atu nei le tatou peepee, ua sili atu le taulia nai lo peepee ia e gaosi mai Filipaina ma isi atunuu, a ua alumia na o tatou. O le faalavelave ua publish nei e le tatou saienisi lena le formula faalauaitetele, ae lei faalauiloaina e tatou. O le mea la ua tupu, ua tetei lava ua le toe taulia le tatou apa i fafo, a ua tumu faasoloatoa faleolooa i Ausetalia ma Niu Sila i le apa o lo o tusi ai foi le peepee ae gaosi mai atunuu la e i Asia, ua latou aveina le tatou upu o le peepee, ona taulia ai lea o le latou peepee ae oti faasasao ai le tatou peepee. O le mafuaaga la lena na tapuni ai loa le tatou fale peepee, lea e i i Taufusi.

Lau Afioga i le Fofoga Fetalai, e i ai lava nai tulaga faafaigata e feagai ma i tatou, ae o le itu lava ia i le taulia ma le le taulia, e fua lava i le maketi. Aua a leai nisi e faatauina, o i ina e tau mai ai le tulaga faaletonu ma o ese loa tatou ma lena mea ae fai nisi mea e taugofie ma alumia ma mafai ai ona faaauau a tatou fefaatauaiga.

18 MATI 2014

**Tulafono Tau Faaofi o le Teuteuga o le Tulafono o Fefaatauaiga  
Talafeagai 2013 – faitauga faalua**

Lau Afioga i le Fofoga Fetalai, o nai faafitauli na e feagai, e le na o tatou o lo o feagai ma mataupu faapenei. O lea foi ua outou faafogafoga ua faalala mai e le Yazaki, e ono tuua foi tatou ona o le tulaga lenei o tau aua o tau i le taugofie o tau a tagata faigaluega, o le iuga e tietie i luga o tau o mea ia e faatau. O atunuu la e toatele tagata e pei o Saina o lo o maua ai le aufaigaluega foi lea, e fai lava si toatele o tagata Saina e mafai ai ona totogi i le totogi foi lea e USD\$1 i le aso. E le o toe maua la ni ituaiga totogi faapena. E faapena la mea o kamupani faava o Malo e omai i Samoa, e tilotilo po o fea le vaega o le lalolagi e o i ai, ona taai lea o fala ma o i ai.

Lau Afioga i le Fofoga Fetalai, e faapena le faatinoga o fefaatauaiga ua malamalama uma i ai le aufaipisinisi, e oo foi i tatou aufaipisinisi, ona taumafai loa lea e fai le faiga ina ia taugofie ai ma mafai ai ona fai le tauvaga. O lea foi tatou te iloa le lelei o le tauvaga, aemaise lava le tulaga lea o le va o le Blue Sky ma le Digicel, o lea ua taugofie ai telefoni. A o lei omai, o le taugata ia o tatou telefoni.

Lau Afioga i le Fofoga Fetalai, o le itu taua lena o le tatou talanoaga i lenei po, ona o le anoano o mau mataupu esese e aafia ai tau o mea, ma le tulaga o le taulia ma le tulaga o le tatou aumaia o oloa mai fafo, ma le itu foi e faigata ai a tatou oloa e auina atu i fafo.

**FOFOGA FETALAI:** Malo faafetai. E toe i ai sau tali faaopoopo lau Afioga i le Sui Palemia po ua maea mail au saunoaga?

**Tofa Hon Fonotoe Nuafesili Pierre Lauofo:** Lau Afioga i le Fofoga Fetalai, o lena ua malamalama lelei le mataupu.

**FOFOGA FETALAI:** Malo faafetai. A o lei tuuina atu le fesili, e ao pea ona avatu sau faamalamalama i nisi o finagalo na laga e nisi o sui usufono mamalu. O le tulaga o le tatou Fono lea e faagasolo nei, o lea lava ua outou maitau o lea ua faasolo le tulaga ona o tatou galuega tuua aemaise foi le tele o tatou Tulafono Tumau o lo o faasolo ai le tatou Fono, aemaise o Tulafono Tau Faaofi o lo o ua i ai faitauga muamua, faitauga faalua ma le faitauga faatolu ma Tulafono Toe Teuteu. O le faamalamalama o Tulafono Tau Faaofi e tulai ai se Minisita e faamalamalama, o lea ua outou faafogafoga ma le manino, ia faamalamalama auiliili le tulaga e mafua ai ona toe teuteu le Tulafono pe faamalamalama se Tulafono Tau Faaofi fou, e mafai ai foi ona tuutalaloa a outou fesili ma manatu e tuuina mai. Ae lafo mai pea le galuega o lea ou te faasoasoina atu. Aua tout e atugalua i le tulaga faapea ua umi le folasaga a le Malo, o lea foi out e manatu, o le taua lena o le tatou Fono lea e fai i le taimi lenei. O lea lava ua taupule tatou te au i le Aso Lua po o le Aso Lulu o le vaiaso fou, ona o mataupu tuua, ae le mafai ona tuua ai le mea lena e tulitamoe ai le tatou galuega pe faatatope ona fai.

18 MATI 2014

**Tulafono Tau Faaofi o Tagata Tomai Tau Palama 2013  
- faitauga faalua**

O lea foi e maitauina i nisi o tatou Fono o lumanai ma tuanai atu, e tou te atugalua lava o le le lava o tali e tuuina atu. Ae pei e manaia le faaoga lelei o avanoa ia e tuuina atu, o lea ua oo lava i le tau o oloa ma taimi uma e faatulaga atu, o lea ua matua auiliili. E oo foi i le Tulafono Tau Faaofi na saunoa i ai le Afioga i le Minisita mo le Soifua Maloloina, ona oe faapupula o outou lagona e ala i preventions ma mea na tulai atu.

O le mea lea le tatou Maota, ia lavapapale mai pea ma onosai. O fea tu ma aga e aga i ai tali a le Malo pe fesili tali loa, o le mea lena e faigofie ia i latou ona tuuina atu ma faafaigofie ai le tatou galuega.

*Na faamaonia le lafo ma faitauina le Tulafono Tau Faaofi i lona faitauga faalua.*

**FOFOGA FETALAI:** E tusa ai ma Tulafono Tumau o le a tuuina atu le Tulafono Tau Faaofi i le Komiti o Oloa Gaosia Tulaga Muamua, Mataupu tau Pisinisi, Alamanuia ma Leipa mo le iloiloia ma toe lipoti mai i le Fono Aoaio se Fonotaga o lumanai.

**TULAFONO TAU FAAOFI O TAGATA TOMAI TAU PALAMA  
2013 – faitauga faalua**

**FOFOGA FETALAI:** Mo le silafia e le Palemene o le Tulafono Tau Faaofi lenei sa faia lona faitauga muamua i le aso Fono 24 Ianuari 2014.

Tulai mai lau Afioga i le Minisita mo Galuega, Felauaiga ma Atinae Eeseese.

**Afioga Hon MANUALESAGALALA ENOKATI POSALA:** Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Tagata Tomai tau Palama 2013 i lona faitauga faalua, ma ou te fia tautala faamalamalama i ai.*

*Faaluaina e le Minisita mo Leoleo ma Falepuipui, Auaunaga o Tinei Mu ma Faalavelave Tutupu Faafuasei, Minisita mo Punaoa Faalenatura ma le Siosiomaga, Minisita mo Aoga, Taaloga ma Aganuu ma le Minisita mo le Soifua Maloloina, ma le sui usufono mo Aiga i le Tai.*

**FOFOGA FETALAI:** Tulai mai lau Afioga i le Minisita e saunoa faamalamalama.

**Afioga Hon MANUALESAGALALA ENOKATI POSALA:** Lau Afioga i le Fofoga Fetalai, i lenei itula o le afiafi, ou te manatua ai le molimau a le fai-Salamo, ‘e tataua ona tautau i le taeao le alofa o le Atua, ia tautau foi i le po Lona faamaoni.’

18 MATI 2014

**Tulafono Tau Faaofi o Tagata Tomai Tau Palama 2013  
- faitauga faalua**

Aua o le viiga ma le faafetai i lo tatou Atua ia ua mafai ai ona tatou ae manuia mai i leni vaitau o le tausaga, ua tatou maua nisi o atumotu tuaoi ua aafia i matagi ma afa, peitai o Samoa nei o lea tatou te folau i lagima, tatou niumusua i le manuia. Faafetai foi ma avatu le faamalo i lau Afioga aemaise foi le maualuga o leni Maota i le Afioga i le Taitai o le Malo ma sui usufono mamalu uma o le Palemene, aemaise foi o faauluuluga o Matagaluega ma le Ofisa o le Fono, a o le tapuaiga foi a Samoa o lo o faafofoga mai.

A o leni Tulafono Tau Faaofi o Tagata Tomai tau Palama 2013, Tulafono e faatonutonu faale-Tulafono ai tagata tau palama, o matata ma auunaga tau palama, ia ma faamoemoga e fesootai i ai. Ou te manatu o se tasi o Tulafono taua tele, e tau faatonutonu faale-Tulafono le faamauina o tagata o i ai tomai tau palama, ia ma tuuina atu o Tusi Faamaonia mo le faamauina e faaauau ai foi le faalapotopotoga o tagata tomai tau palama a Samoa pei ona tuufaatasia faale-Tulafono i lalo o Tulafono o Sosaiete Tuufaatasi 1952.

I totonu o leni Tulafono ia o lo o atagia ai faamauina o tagata tomai tau palama o lo o i ai le au e i ai faailoga ma ia agavaa e fitoitonu i leni matata o le palama. Ma ua fausia ai se Faalapotopotoga po o le Asosi o Tagata Palama Samoa, o lona uiga, e ao ina resitaraina ia ma faamauina ina ia mafai ona galulue faatasi i lalo o le Faalapotopotoga. I totonu o leni fausia o le Faalapotopotoga, ia e i ai le Komisi o Pulega a le Executive Committee, ia o i latou ia e filifilia, pei ona i ai o le Peresetene, o le Sui Peresetene, o le Failautusi, o le Teutupe, ia ma sui auai e toalima. O i latou ia o le a mataituina ia galuega e avea ma itutino tau Pulega o le Faalapotopotoga, ina ia faatino galuega tauave ma malosiaaga o le Faalapotopotoga, ia faafocina mataupu a le Faalapotopotoga, ia tauave foi isi galuega tauave ma tuuina atu i ai i lalo o leni Tulafono po o se isi foi Tulafono.

O le faatinoina o leni Tulafono, o se vaaiga taulai lea e mataituina ai le faatinoina o galuega i leni foi matata ma agavaa. O lo o i ai foi i lalo o le Komisi o Pulega leni ia le mataituina ma le faafocina o amio pulea i le faatinoga o galuega. E manatu o le tasi leni o tulaga toatuga o i ai le suavai, e tele le suavai maumau, ae mo le silafia, o le galuega a le Pulega o le Suavai, e afua mai i mea o lo o i ai faatanoa tapena o faatanoa o mea e maua ai ma tapue le suavai, faataatitia paipa, ia ma agai mai i so o se vaega o le atunuu. Silasila foi i le tulaga e tataua ona faamama ma ia lelei ia le tulaga i le suavai, ona faataatitia lea o paipa ina ia oo atu i maota ma laoa, fesootai atu i aiga, a oo loa i mea o lo o i ai mita, ia o i ina e gata ai ia le galuega faatino a le Pulega o le Suavai. O le fesootai mai la mai i mita i fale ma so o se vaega eseese, ia o vaega na o lo o faatinoina i lalo o le tomai faapitoa nei o palama.

18 MATI 2014

**Tulafono Tau Faaofi o Tagata Tomai Tau Palama 2013  
- faitauga faalua**

Ua tele faafitauli ma tulaga sa faaoo mai ona o le maitau e fai sina saosaoa tele o mita ia ma taugata le suavai, ona faaoo mai laia i le Pulega o le Suavai ia ma agai e fai a latou suesuega, ma faia suesuega ma maitauina ai e tele le suavai maumau, e tele le faaletonu o galuega ia e faaaogaina i le palama e aiga, ona o le leai o se Tulafono e mafai ai ona vaavaai ia ma mataituina ia galuega faatino faa-Palama, ma ua avea ma mea ua tetele ai pili ona o le leaga o le palamaina o fale o aiga aemaise foi o le tulaga i le faataatitiaina o paipa. O faaletonu ia o lea ua agai ia le Faalapotopotoga leni e fausia le Komisi o Pulega ma i latou o i ai agavaa ina ia mataituina o talafeagai le faatinoga o galuega. O lo o i ai foi la i le Komiti leni le faafoega o amio pulea, afai e i ai ni faasea e toai mai, ia o i latou o lo o faatinoina le galuega leni o le palama, o i latou o lo o i ai agavaa, ia o i latou foi ia e tatau ona responsible po o i latou e tatau ona agai i ai ni faasalaga ona o galuega o lo o mafai ona latou faatinoina, e le o atoatoa ma ausia tulaga talafeagai. O le Komiti lava leni, e i ai foi le silasila totoa i vaega uma ia ina ia mautinoa o lo o lelei pea le faatinoga o galuega, e i ai foi tulaga i soligatulafono offenses o lo o i ai foi i totonu o le Tulafono leni ia le Tribunal po o le Komisi Faamasino ia latou te aiaia ma vaavaai i vaega uma nei, ina ia mafai ona ausia le tulaga o le faatinoina o galuega a palama i se tulaga lelei e faatinoina ai. Atonu o le tasi lea o tulaga ogaoga o lo o vaavaai i ai, ia o le tulaga o le suavai, ua tele ina faaletonu le suavai ma ua utiuti, o lo o faaaoga foi ia vai vili e mafai ai ona maua le suavai mo le tatou atunuu i vaega e faigata ona maua ai le suavai, a o le maitau, ia afai e utiuti le suavai i le manava o le elele, o lona uiga e tatau ona mataitu lelei tulaga e mafai ai ona aputiputi ma ia faatumauina ia le maua pea o le suavai mo le fofoga taumafa.

O le isi vaega taua e silasila i ai ia le Komiti o Pulega aemaise ai o le Faalapotopotoga, o tulaga o oloa ia e auina mai fafo e faaaogaina e pei o paipa ma mea faapena, atonu o le a vaai i ai ina ia auina mai ia oloa talafeagai e i ai paipa high pressure pipes, ia o tulaga na e i ai. Peitai o lo o i ai faafitauli pei ona molimauina, o lo o i ai paipa e le tatau ona faaaogaina ae ua faaaoga lava e nisi o aiga mo le faatinoga o galuega i totonu i le palamaina o latou fale. E le gata i lea, ua tele foi ia atinae a le Malo i fale tetele ma fuafuaga, pei ona i ai le falemai o lo o fausiaina, o tulaga ia o lea o le a vaavaai i ai le Faalapotopotoga leni ina ia mafai ona ausia ma ia lelei pea le suavai ma aua ne i i ai ni faafitauli e tulai mai. O le tasi foi lea o vaega e tele afaina e oo i ai i o tatou maota ma laoa ma fale, pe afai ae liki le suavai, e tele ina faaleagaina ai o tatou fale. O vaega uma ia o le a agai i ai le Faalapotopotoga aemaise ai tomai tau palama ina ia faaleleia ia vaega uma ia. O lo o manino foi i totonu o le Tulafono vaega eseese, pei ona matou taua mo le faatinoga o galuega a le Komisi o Pulega aemaise ai foi o le Faalapotopotoga ma le mataituina o galuega faatino a palama.

18 MATI 2014

**Tulafono Tau Faaofi o Tagata Tomai Tau Palama 2013  
- faitauga faalua**

E momoli le agaga faafetai i tamalii ma faleupolu o e o lo o i ai le tomai ma le agavaa lenei ona o le tulaga lagalaga i lenei Tulafono ina ia mafai ai ona amanaia e faaleleia ai pea le tulaga o le auaunaga tulaga tau palama, atonu foi o se luitau lea mo nisi tomai ma agavaa e le o mafai ona faale-Tulafonoina ma vaavaai ma faia se Faalapotopotoga ina ia mafai ona laasia tulaga faapenei e oo ai i le maualuga ma tulaga lelei e faatino ai ia galuega. Pei o le tulaga lena i lenei Tulafono ina ia mafai ona faia se Faalapotopotoga e i ai le Komisi o Pulega latou te mataituina le lelei faatino o galuega o mea tau palama. E pei o vaega ia ua tolaulauina atu e tusa ai ma lenei Tulafono lau Afioga i le Fofoga Fetalai.

**FOFOGA FETALAI:** Malo faafetai i le saunoaga malamalama a lau Afioga i le Minisita mo Galuega, Felauaiga ma Atinae Eseeese, o lenei foi Tulafono Tau Faaofi taua o lenei foi faatoa faaulufale mai i le Maota lenei Tulafono ua leva ona tataua ona fai, ona e maitau i le tele ma le anoanoai o atinae tetele ma atinae fou o agai mai i lo tatou atunuu, ia o le tasi lenei auaunaga e sili ona faatauaina ona o le tagofia o le oa faalenatura o le tatou atunuu o le suavai. Ma e maitauina pea o lo o lagalaga foi i totonu o le Maota le tulaga o le utituti o le faasoia ma le faaletonu, o le tele ma le anoanoai, ia a o le auaunaga lenei, ia o latou nei o lo o tapueina ma faafocina le tulaga o le fuafuaina faatatau ma le faasoasoina lelei, o le tulaga tau suavai o le au palama.

Ua avanoa lo tatou Maota mo ni sui usufono e fia saunoa i le mataupu. Tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, ou te toe tulai atu lava ma le faaaloalo e fia faaopoopo atili i le saunoaga a le Afioga i le Minisita, ona e maitau o Tulafono Tau Faaofi nei ua aumai mo le resitalaina aloaia e avea o se Faalapotopotoga aloaia faaletulafono ma tatou palama. E i ai Faalapotopotoga o lo o i ai tomai faapitoa ua uma ona faatulafonoina, e i ai le vaega lea o loa, fomai, inisia. Ma o le agaga lea o le tatou Malo, o tomai faapitoa uma lava, e tataua ona faatulafonoina uma ina ia puipuia ai lo tatou atunuu i latou o le a faaogaina le auaunaga lenei mai ni faaletonu e ono tulai mai ona o i latou e i ai tomai e le o atoatoa ona faatino le latou galuega. O lo o i ai foi isi vaega o lo o fuafua mai e aofia ai le au tusiata, e i ai foi ma i latou o lo o faia mea o le fuaina o fanua, fuafua tau. O i latou uma nei o lo o i ai tomai faapitoa, o aga ia faale-Malo ina ia puipuia tagata lautele mai le i ai o ni tulaga faaletonu ae tofua lava Faalapotopotoga ma tagata faaletonuga. Ae maua uma lava i Faalapotopotoga ona faatu lea o latou Tulafono e aumai iinei e faaaloaia ai, o i ina la e avanoa ai loa e molia i latou latou te faaseseina le atunuu lenei ma aafia ai i ni mea tau tupe ona ua fai le latou tautua ae le atoatoa.

18 MATI 2014

**Tulafono Tau Faaofi o Tagata Tomai Tau Palama 2013  
- faitauga faalua**

O lea la ua oo mai le au palama, ae o lea e i ai le isi vaega lea e faasolosolo mai mo le silafia e le atunuu le mafuaaga e lelei ai ona aumai Tulafono e faatonutonu ai le amio a i latou nei ia aua nei aafia ai o tatou tagata ona o le le atoatoa po o le faatogafiti ona faatino o latou tomai e tautua ai i le tatou atunuu.

O le faaopopo atu lena lau Afioga ina ia manino atili ai le agaga foi ua taunuu i ai le Afioga i le Minisita ma le Pulega ma le Malo, ua oo i le taimi e tatau ai ona aumai le au palama i totonu e faatulafonoina ma faatonutonu a latou galuega o lo o fai.

**FOFOGA FETALAI:** Malo faafetai i le saunoaga faaopopo a le Palemia aua lava le faamalalamaina atili o lenei Tulafono Tau Faaofi taua. O lo o maua le avanoa mo se sui usufono o lo o fia saunoa o lea toe sefulu tatou minute.

Ia, o le a talamaea ia lea Itu o le Maota pe a ua lelavava lea Itu o le Maota. Ia tulai maia le sui usufono mo Faasaleleaga Nu.4.

**Afioga PESETA VAIFOU TEVAGA:** Faafetai tele lava i lau Afioga, o le ala ou tulai atu lea ae o lo o fai le malologa a le la Itu. Lau Afioga i le Fofoga Fetalai, e momoli atu le faafetai tele i lenei Tulafono Tau Faaofi e pei ona tolaulau e le Afioga i le Minisita. Ma e tasi lenei matata e ese le taua ona ou te talitonu foi, o lea ua tele ina agai atu le tatou atunuu i le fausiaina o faletetele nei ua tulai mai nei. Ma i lau maitau i le tulaga lea tau palama, o lea tatou te maitau lava i galuega ia o lo o faagasolo i totonu o le atunuu ma o tatou aiga. Ua ou vaavaai au ia i le tele o palama lea e faia le tele o tatou galuega, e ta te iloa lava le tulaga e le o talafeagai ma taiala ma tulafono. O se tala fuafua foi lea po o se paipa, e tele lava ina o atu le toatele, pei lava na ona tipi tulou, ae a le fetau lava le size o le paipa ona lagilagi lea i le afi ma taumafai e faaofi. Ia, ou te talitonu foi au ia, o le tele foi oi latou i le matata lea, e pei e galulue ma isi foi tagata e lava lo latou silafia, ae ou te talitonu o le tele o nisi o i latou e lei oo i le aoga aperenitisi lea e i uta i le APTC. O le taua ia o lea matata eseese. Ma i lou talitonuga i lenei Tulafono, o se Tulafono Tau Faaofi e ese le aoga.

A silasila foi i le Maota lea o sui usufono, le Tofilau Eti Alesana, o le tele o vaega lea ua tele ina sau ai le vai. O lona uiga, e le o lelei ona faatino. Ae o le taua o lenei Tulafono Tau Faaofi, atonu o i lea o le a filifili ai tagata e malamalama ma lava le tomai faapitoa i lenei foi matata. Ou te talitonu foi o lea ua saunoa le Afioga i le Palemia, e le na o le palama, e i ai foi isi matata e tatau foi ona aumai. Aua a silasila foi lau Afioga i le faatuputupulaia pea o galuega tetele i totonu o le atunuu, ou te talitonu e le o lava le malamalama o le toatele latou te galulue ai i totonu o faletetele nei o le a fausia, pei foi la o le fale 15 fogafale lea ua fuafua i ai le tatou Malo. O lona uiga, e moomia lava le uunaia o lenei fuafuaga ia i latou e lava lo latou tomai latou te faatinoina ai lenei foi matata.

18 MATI 2014

**Tulafono Tau Faaofi o Tagata Tomai Tau Palama 2013  
- faitauga faalua**

O lea e tatalo atu ai i lau Afioga i le Minisita, e tatau lava ona aumai le tele o matata ina ia faapea ona lelei le faatinoina o galuega uma lava i totonu o le tatou atunuu. Ae momoli atu le faamalo ma le faafetai o lea ua aumai le palama e amatamea ai lenei foi Tulafono Tau Faaofi. Ma lou faaaloalo lava.

**FOFOGA FETALAI:** Malo faafetai saunoa. O le a tuu atu le avanoa i lea Itu o le Maota. Tulai mai lau Afioga i le sui usufono mamalu mo Aana Alofi Nu.3.

**Afioga TOEOLLESULUSULU CEDRIC POSE SALESA SCHUSTER:** Faafetai atu lava i lau Afioga i le Fofoga Fetalai mo le avanoa. Faafetai atu foi i le Afioga i le Minisita. E talitonu lava o se tasi foi o Tulafono Tau Faaofi taua ma e aoga mo le alualu i luma o le faaleleia o galuega fai a i latou foi o i ai lenei tomai faapitoa.

Lau Afioga i le Fofoga Fetalai, e i ai nai vaega taua e fia maua i ai sina malamalamaaga ae le gata foi i lea o se tuualalo i le Afioga i le Minisita aemaise o le tapenaina o lenei Tulafono Tau Faaofi.

Lau Afioga i le Fofoga Fetalai, o le vaega muamua o le fia malamalama lea i le tapenaina po o le resitalaina o i latou o le a avea ma palama po o i ai se fesootaiga o faailoga po o certificate e manaomia mai le tatou vaega o le SQA lea o lo o faapea ona taumafai e faatulagaina i latou i tomai eseese. Ou te talitonu e i ai se taua o le fesootaiga lea ina ia mafai ona compatible uma standards e le gata oi latou foi o aoga iinei, a o i latou foi e omai mai fafo.

Lona lua lau Afioga i le Fofoga Fetalai, o se popolega ona e taua le resitalaina o i latou uma e palama ma le faatinoina o galuega fai ona faailoa mai. Lau Afioga i le Fofoga Fetalai, e i ai foi i totonu o nisi o afioaga ma alaalfaga foi, e i ai vai tumaoti. O le tele o vai tumaoti i afioaga e pei foi o lenei nuu, a fia tai le vai a le aiga, e faafesootai le komiti o le vai a le nuu, o i latou ia e o atu vili le vai e sau le paipa mai le ogapaipa a le nuu ona alu lea i ai, e tasi le gutu paipa a le aiga. Po o se vaega o lenei Tulafono Tau Faaofi o le a faatulafonoina uma ai i latou o le a faatinoina nei galuega iti i totonu o afioaga ma alaalfaga.

E le gata foi i lea afai e motu lota paipa i le afiafi, pe tatau ona vili se tagata palama lea pe mafai ona ota savalivali atu i se tuaoi o lo o mafai ona faatinoina ai lena galuega faigofie ona faatinoina. O le popolega lau Afioga, ina nei tei ua tamau ai foi le faatinoina o nisi o alo ma fanau a le atunuu e le o mafai ona latou ausia faailoga faaleaoaoga a o lo o maua le tomai faapitoa.

Ona ou see mai lea lau Afioga i le Fofoga Fetalai, pei ua maea foi se saunoaga a se tasi o sui usufono, e talitonu o le taua o le galuega faa-palama, o le tele lava o faletetele.



18 MATI 2014

**Tulafono Tau Faaofi o Tagata Tomai Tau Palama 2013  
- faitauga faalua**

O galuega tetele o lo o faapea ona faatinoina, e le gata i tatou palama, ae faapea foi ona i ai galuega o lo o faatupeina mai i Malo mai fafo, ina ia mafai ona faatauaina ia i latou o lo o omai ona resitala i totonu o tatou Faalapotopotoga nei, ona faatoa mafai lea ona faatinoina nei galuega. Ia aua nei tatou tuulafoai faapea o le aid e aumai ai ma aumai ai ma i latou ona le faatinoina ai lea o le faiga o le resitala, ma e ao foi lava ona tatou tutuaai i latou o le a feagai ma le siakiina ona o lo o vaaia pea le tele o nisi galuega e faatinoina, aemaise lava le galuega tau palama....

**FOFOGA FETALAI:** Ua ou vaelupeina le saunoaga a le sui usufono mamalu mo Aana Alofi Nu.3, ona o lea ua tatou taunuu tonu i le tatou taimi malolo. E i ai le talitonuga ua ta tonu le itula e 11 ma ua tataua ona faia se tatou malologa. O le a faaauau lau folasaga i le aso a taeao e tamua ai le faaauauina o le tatou galuega i le itula e 9 i le taeao a taeao.

Ae momoli atu le faafetai tele i le paia ma le mamalu o le tatou Fonousu i lenei vaega o le afiafi, e manatu ua tuneva le afiafi ua tataua foi ona fai se faatiliga malosi ma se tatou faiga malologa. Ma e talitonu ua tele le tatou galuega ua maea ona faatinoina i lenei aso. Faamalo le onosai, faamalo le tauatai, faamalo foi i le sailiga tofa ma le faaalua o outou finagalo e ala i nisi o mataupu taua ua maea ona soalaupuleina, e talitonu ua faafofoga ma le manino le tatou Maota i tuleiga ma saunoaga, aemaise foi o le faafofogaaga a le tatou atunuu. E i ai le talitonuga tatou te toe potopoto i le itula e 9 i le taeao a taeao ae momoli atu le agaga faafetai tele.

E faafetai atu foi Samoa i lau tapuaiga i lenei itula o le afiafi. Ia, o lo o outou tui mai pea le mulipapaga ma tapuaia le alofaiva a lou Palemene. Faafetai le tatalo, faafetai le onosai, faafetai foi tapuai mai a o faapena ona faagasolo le Fonousu a Samoa. E faafetai atu foi i le paia ma le mamalu o Faauluuluga o Matagaluega i tupu ma ee, o tamalii ma failauga, faletua ma tausii, aemaise le tatou mafutaga i lenei aso i le paia ma le mamalu sauoo ua tatou faatasi.

Ae lei faaiuina le tatou Fonotaga, ou te valaaulia le Afioa i le Minisita mo le Punaoa Faanatura ma le Siosiomaga e faia se tatou tatalo ona tatou malolo ai lea.

*Na motusia Felafolafoaiga ina ua tolopo Taualumaga a le Fono Aoa o le itula e 11:00 i le po.*